

**SIXTH LEGISLATIVE ASSEMBLY OF MIZORAM
(ELEVENTH SESSION)**

LIST OF BUSINESS

FOR EIGHTH SITTING ON THURSDAY, THE 26th JULY, 2012

(Time 10:30 AM to 1:00 PM and 2:00 PM to 4:00 PM)

QUESTIONS

1. **Questions** entered in separate list to be asked and oral answers given.

LAYING OF PAPERS

2. **Pu H. LIANSILOVA**, Minister to lay on the Table of the House copies each of the following :

(1)Report of the Comptroller and Auditor General of India on State Finances for the year ended 31March2011(Report No. 1)

(2)Report of the Comptroller and Auditor General of India on Civil, Revenue and Commercial for the year ended 31 March, 2011 (Report No. 2)

(3)Appropriation Accounts for the year 2010-2011 relating to Government of Mizoram.

(4)Finance Accounts for the year 2010-2011 Volume 1 relating to Government of Mizoram.

(5)Finance Accounts for the year 2010-2011 Volume 2 relating to Government of Mizoram.

FINANCIAL BUSINESS

DISCUSSION AND VOTING ON DEMANDS

3. **Pu R. LALZIRLIANA**, Minister to submit to the Vote of the House Various Demands under his charge.
4. **Pu J.H. ROTHUAMA**, Minister to submit to the Vote of the House Various Demands under his charge.

NGURTHANZUALA
Secretary

....

S P E A K E R : Rorelna fel zawng ula, hnehchhiahna tuarte chu tanpui ula, pa nei lote chu rorelsak ula, hmeithaite chu sawipui rawh u. Isaia 1:17

Zawhna leh chhannaah kan kal ang a, tunah kan zawhna hmasa ber hi Pu B.Lalthlengliana zawhna ani a, amah hi a lo lang lova, a aiah Pu Ramhluna a pe na a, kan dan 50 na ang khan hun ala awm chuan Pu Ramhluna'n a zawt ang a, kan kal kan rih mai ang a. Zawhna No. 122-na Pu K. Lianzuala i lo sawm ang.

Pu K. LIANZUALA : Pu Speaker ka Starred Question No. 122-na Public Works Department Minister zahawm tak chhan atan – Chhingchhip to Hualtu, Hmuntha leh Thentlang PMGSY kawng hi Black top (pavement) engtikahnge thawh tan anih theih ang ?

S P E A K E R : A changtu Minister Pu Lal Thanhawla hi a awm lova, amaherawhchu charge kha Pu R. Lalzirliana a pe a. Tunah Minister zahawm tak Pu R. Lalzirliana chhang turin ilo sawm ang.

Pu R. LALZIRLIANA, MINISTER : Pu Speaker, Pu K.Lianzuala, member zahawm tak zawhna Chhingchhip to Hualtu, Hmuntha leh Thentlang PMGSY kawng hi Black top (pavement) engtikahnge thawh tan a nih theih ang ? tih chhanna chu – Chhingchhip to Hualtu kawng Black top tur hian DPR buatsaih mek a ni a. Tin, Chhingchhip to Hmuntha leh Chhingchhip Thentlang khi Thentlang leh Hmuntha khi an mahniah inkal pawhna awm lova, hmun dang atanga kal a ni a, chu pawh chu black top na turin PMGSY Phase-7 Part-II ah telh tum a ni a. Tunah hian DPR siam mek a, hmalak mek a ni e.

S P E A K E R : A zawttu zawh danah hi chuan Chhingchhip to Hualtu, Chhingchhip to Hmuntha, Chhingchhip to Thentlang ti anga ngaih tur ani. Le zawh belhna hi chu I la lo mai ang u. Zawhna No.123na zaw turin Pu R.L.Pianmawia i lo sawm ang.

Pu R.L. PIANMAWIA : Pu Speaker, R.D. Minister zahawm tak chhan atan ka zawhna MGNREGS Workers Welfare hman mek aia tha zawk tur ruahman theih a ni em tih ani e.

S P E A K E R : A chhang turin a changtu Minister zahawm tak Pu R. Lalzirliana i lo sawm ang.

Pu R. LALZIRLIANA, MINISTER : Tunah mai khan kan ngaithla zo chauh bawk a, a zawhna kha chu, Pu R.L.Pianmawia, member zahawm tak chhanna chu MGNREGS Workers Welfare hman mek aia tha zawk tur ruahmanna a awm anih chuan State Employment Guarantee Council kaltlangin Ministry of Rural Development, Government of India-ah rawtna/ruahmanna thlen theih a ni.

S P E A K E R : Zawhbelhna a awm lova, tunah zawhna No. 124-naah kan kal ang a, a zawt turin Pu K.Liantlinga i lo sawm ang.

Pu K. LIANTLINGA : Pu Speaker, ka lawm e, Soil & Water Conservation Minister ka zawhna Starred Question No. 124-na:-

a) Kum 2011-2012 chhung hian NLUP hnuaiyah Hmunphiah Metric ton engzatnge thar a nih min hrilh theih ang em?

b) Kum 2011-2012 chhung hian Hmunphiah hi tu hnenah nge hralh a nih a, a hralhna rate engzatnge min hrih thei em?

S P E A K E R : Chhang turin a changtu Minister zahawm tak Pu J.H. Rothuama i lo sawm ang.

Pu J.H. ROTHUAMA, MINISTER : Pu Speaker, member zahawmtak Pu K. Liantlinga zawhna chhanna chu hetiang hi a ni e :

a) Kum 2011-2012 chhunga NLUP hnuai a hmunphiah thar zat chu 725.36 M.T. (A ro) ani.

b) Hmunphiah hi mi hrang hrang hnenah hralh a ni a, a leitu langsar deuchte chu Zoram Industry leh Hnam Chhantu te an ni. An hralhna rate pawh hi a hralhna hmun, hralh hun a zirin a in ang lova Rs. 30-50/- per Kg. a ni.

S P E A K E R : Zawhbelhna Pu K. Liantlinga zawhah Pu P.P. Thawla, a dawt leh Pu Lalduhoma.

Pu K.LIANTLINGA : Pu Speaker ka lawm e. Kha tuna kan sawi kha performance budget a alan dan chuan Metric ton 760 a ni a, ama'rawhchu 35 velin a inthlau a, a rate kha 30 tiin a in ziak a. Ka zawh hnu a budget pharh hnu khan performance budget a lo lang nen khan chhanna kha a inang lo deuh hret a, mahse thil paw em em turah ngai lo ila. Hmunphiah hi kan uar sawt viaua, Soil & Conservation Department enkawl in a line department a ni a. Ama'rawhchu Mizoram a thar hi chi thum angin a then theih a, Forest in a ram tla an lak ah hian cheng 7 royalty an lak sak a, plantation farm nei ho ah hian Rs.3.50 per kg. NLUP ah pawh hian Rs. 3.50 per kg a ni a. Coffee ah te, Rubber ah te, Oil Palm ah te leh silk rearing ah hian lak a ni velo in ka hria a, Pu Speaker, ka hriat sual loh chuan, royalty hi a lak loh ve theih mai lawm ni tih ka zawt duh a. Forest Department hian mi pakhat hnen atanga an lakna receipt pathum ka rawn keng a, quintal 20 a thar a, tah chuan Rs.50 pawh in hralh se, Rs. 30 pawhin hralh se Rs.60,000/- a hmuhna turah khan Rs.7000/- vel Forest Department khan royalty an lak sak a, a tih loh theih tawh em, ang khatin a tih theih tawh em ? Tin, Mizoram economy tih that nan NLUP te kan ti in farmer-te incentive pek a ni a. India ram kalphungah hian formal economy ngialnghet tawh te lakah hi chuan tax leh royalty-te lak a ni a, ama'rawhchu informal economy ah hi chuan an la ngai lo a ni. Atlangpuin kum li kum nga chhung an sustained hma hi chuan an la ngai lova, a lak loh theih mai em tih kha Pu Speaker, ka zawhbelhna chu ni e. Ka lawm e. (Speaker : Pu P.P. Thawla)

Pu P.P. THAWLA : Pu Speaker, ka zawhbelhna chu Soil and Water Conservation Division leh P.H.E. Division Saiha a dah kha, PHE Division chu a function nghal mai a, Soil & Water Conservation Division hi tun thlengin a la function lova, hei hi enge a chhan tih leh quarter te, office te sak zawh taka kha engtia hman nge ni ta tih ka zawh belh e. (Speaker : Pu Lalduhoma)

Pu LALDUHOMA : Pu Speaker, kan ngaihthlak tak ang khan hmunphiahah hian royalty chi hrang hrang lak a ni a. Industry-ah te pawh kum engemaw zat chu chhiah te hi awl an ni thin a. Anni pawh hi an ti tan dawn chauh a ni a, hmunphiah atang hian chhiah hi kan it lo thei mai lawm ni, a in tunnun tumtute lah hi dawmkan ngai vek te an ni hlawm si a. Tin, Soil Department ringawtina a lo awl theih pawh kha niin a lang lova, Forest-te nen inkaihhnawih a nih avangin Cabinet te pawhin thutlukna an siam ngai a nih hmel a. Chutiang tur chuan initiative Minister zahawm tak hian a la thei ang em, a vaia chhiah an awl theihna

tur hian kum engemaw zat chhung chu tih ka zawhbelh duh a. Tin, a kuang leh a hnahte hi ran chaw atan value added a tih chhoh ve theih vek a ni a. Chulam te pawh chu Industry lam te nen inbiakrawn a, a vaia utilize dan, commercialise dan hi ngaihtuah a tha in ka hria a. Chungah chuan sorkar in engtinge hma a lak tih ka zawt duh bawk a. Tin, Russia ramah thawnchhuah a ni tih sorkar PR ahte kan lo chhiar a, Russia rama thawnchhuak tute kha tute ber hi nge an nih, kan la thawnchhuak zel thei dawn em tih leh foreign ah te pawh market a awm hnaivai em tih ka zawhbelh duh a ni.

S P E A K E R : Awle, chhang turin a changtu Minister i lo ko ang. A chhan theih chin chhang sela, a chhan vek theih loh pawhin hriatthiam tum ila.

Pu J.H. ROTHUAMA, MINISTER : Pu Speaker, ka lawm e. Hmunphiah variety hi hmunphiah ramtla ti mai ila hmunphiah tualto ve hrim hrimah hi chuan Forest in an la a ni mai thei a, chu chu department dang a nih avangin kan va hriatpui thei lova. Tin, keimahni Soil Department ah hi chuan NLUP hnuaiia hmunphiah tharah hi chuan royalty kan la lo. Tin, Soil Department hmalakna Saiha ami tih kha chu tunah hian staff te kan la indaihloh avangin kan la ti changtlung thei lo a ni e. Tin, Russia rama thawnchhuaktu kha chu ka hre hauh lo mai a, hriat kan lo tum ange.

Pu K.LIANTLINGA : Pu Speaker, Forest Department khan an la a, Rs 7 a ram tla ah khan; tin, farm nei ho private a lo ti ve te pawh an awm a, NLUP bakah khan, khangah khan a lakna receipt fel takin a awm a, he tah hian quintal 20 an tharna ah hian Rs 7000 an lak sak a ni. (Speaker : Kha kha tunge la tu, Soil chu em ni) Forest Department a nia, hei hi a tih loh thei em tih kha a ni ka zawh chu ni.

S P E A K E R : Awle, kha kha chu Soil Minister chuan a chhang thei hauh lo mai a, amaherawhchu member ten...

Pu LALDUHOMA : Pu Speaker, kan zawhna pawh kha a chhang mang lo a (Speaker: Aw a chhang mang lo, House Leader hi chu awm sela han chhantir ka tum a nia) engpawh nisela, 'Keini chuan kan hrelo', tih ringawt kha a fel lo, an hnuaiia ei zawngtute department in royalty an lo lak sak a nih chuan an hre tur a ni a. An dinchhuah an duh a nih chuan ka sawi ang khan Cabinet lamah te pawh Department pakhat mai chan a nih loh chuan initiative a la thei mai lawm ni ka ti a. Tin, Russia rama thawnchhuah flag off tu kha kan Parliamentary Secretary a ni a, hriat awm tak a ni a. Initiative a la thei ang em tih kha ka zawhna a ni, chhan sak lam a ni lo.

Pu J.H.ROTHUAMA, MINISTER : Initiative chu a Department lamin an la ang chu.

S P E A K E R : Duhtawk ilangin, nakinah khang kha sawi chhuah chi pawh a ni khawp mai, kha kha kan sorkar te pawhin ngaihtuahna hman zui chi tak tur a ni e. Tunah zawhna No. 125-na zawt turin Pu Hmingdailova Khiangte i lo sawm ang.

Pu HMINGDAILOVA KHIANGTE : Pu Speaker, ka lawm e, Starred Question No. 125 na ka zawhna chu, PWD Minister zahawm tak hian National Highway 54 atanga Mualkhang hi KM 7 chauh a ni a, kan sorkar hian pucca road a siam tumna a nei em tih a ni e.

S P E A K E R : Awle, a chhang turin Pu R.Lalzirliana i lo ko ang.

Pu R. LALZIRLIANA, MINISTER : Member zahawm tak Pu Hmingdailova Khiangte zawhna kha Mualkhang kawng hi black top tura ruahman mek a ni a, hei hi National Highway 54 atanga kal a ni a. PMGSY road a ni a, hemi black top tur hian pavement estimate hi siam mek a ni a. PMGSY Phase 7 Part-II ah telh tur a ni a. Kumin chhung hian DPR pawh telh ve tum a ni e.

S P E A K E R : Zawhbelhna kan la lovang a, tunah Starred Question No. 126-na zawt turin Dr. R.Lalthangliana ilo sawm ang.

Dr. R.LALTHANGLIANA : Pu Speaker, ka Starred Question No. 126 na Planning & Programme Implementation Department changtu Minister chhan atan - (a) Kum 2012-2013 Annual Plan sum ruahman-ah hian State sorkarin engzatnge tum ve tur a neih ? (b) Loan leh Works atan engzat chiah nge ruahman a nih tih ka zawt e.

* Speech not corrected.

S P E A K E R : A chhang turin a changtu Minister Pu H.Liansailova, ilo sawm ang.

Pu H. LIANSILOVA, MINISTER : Pu Speaker, member zahawm tak, Dr. R.Lalthangliana zawhna (a) Kum 2012-2013 Annual Plan sum ruahman-ah hian State sorkarin engzatnge tum ve tur a neih tih chhanna chu - 2012-2013 Annual plan sum ruahman-ah hian State sorkar-in tum ve tur a neih zat chu cheng vaibelchhe 70.15 a ni. (b) Loan leh Works atan engzat chiah nge ruahman a nih tih chhanna chu - Loan leh works atana sum ruahman zat chu hetiang hi a ni :- Loan-ah (1) NABARD - vaibelchhe 50 (2) NCDC - Vaibelchhe 1.50 total – vaibelchhe 51.50. WORKS ah - (1) 13th Finance Commission Grant - vaibelchhe 113.85. (2) Scheme-wise ACA - vaibelchhe 487.46 (3) SPA for NLUP – Vaibelchhe 370.00 (4) SPA for other projects ah - vaibelchhe 144.44 (5) SPA for Special programme for Road Development ah - vaibelchhe 200.00 (6) ACA for EAP - (a) Mizoram State Roads project ah cheng vaibelchhe 10.00 (b) North Eastern State Roads Investment programme - cheng vaibelchhe 30.00 (c) SIPMIU - ah cheng vaibelchhe 5.16. (7) NABARD - cheng vaibelchhe 50.00 leh NCDC ah cheng vaibelchhe 1.50 a pumpuiin cheng vaibelchhe 1,412.41 a ni e.

S P E A K E R : Zawhbelhna Dr. R.Lalthangliana.

Dr. R.LALTHANGLIANA : Pu Speaker, budget discussion kha kan nei tho naa, helai hi a pawimawh riauin ka hria a, a lehlamah chuan politics a leiba min hnutchhiah tam tih vel te hi a ri nasa a. Ka'n zawhbelh duh lawk chu Pu Speaker, kha a vai khan vaibelchhe 1400 bawr a lo ni a. Kumina kan Plan Budget kha 2300 a lo ni ta a, 2300 atang khan han paih ta ila, vaibelchhe 900 kha a puk loh chi khatiang deuh kha a ni mai a. Hei hi ka'n zawh duh lai tak chu pung nei chi a ni lo thei lo turah ngai ta ila, khalai kha chu min chhang thei chiah lo mai thei a, a pung zat nei lo a kha. Amaherawhchu, ka'n zawh duh lai taka chu liabilities hi budget a pun hian a awm lo thei lova, loan te a lo ni a, tikhan budget a pun poh leh leiba leh thil kha min hnutchhiah lo thei lo tih chu tlang hriat a ni a, khang kha engtik chhung hian nge ni kan clear theih tur ti mai ang, kan han

chinfel ve theih tur tih kha a tlangpui deuh min hrilh thei se kan Planning Minister hi ka'n zawt duh a. Tin, tuna a lan danah hi chuan kan budget-ah hian works tak tak han thawhna tur ang chi pawisa hi kan annual plan-ah hian a awm meuh lo, tihnaah kan ngai deuh hlek a. Hlawh kan pek theih chuan kan rawih te hi kan duhtawk ti tih deuh mai in ka hria a, hemi piah lamah hian hnathawhna tak tak tur ang chi ruahmanna hi, kan neih theih kan beisei em? Tin, hemi huam chhungah hian eng ang chin nge ni kan neih theih dawn tih ang chi te kha min han hrilh theih sela, a tha awm e, a har deuh maithei a, amaherawhchu a chhan theih ang ang kha kan duhtawk mai ang chu.

* Speech not corrected.

S P E A K E R : Le a chhang turin a changtu Minister ilo ko ang.

Pu H.LIANSILOVA, MINISTER : Pu Speaker, a zawhna hmasa kan liability chungchang kha kan FRBM Dan kan pass tawh hmang khan kan revenue surplus emaw deficit emaw, kan fiscal deficit emaw, kan primary deficit emaw kan loan outstanding liability thleng khanin regulate ti mai ila, control tur a ni a, chumi chu 13th Finance Commission in, 12th Finance Commission in alo tih tawh a kha rawn belhchhah lehin fiscal correction path pawh kha min siamsak ta kha a ni a. Nimin piah lamah khan kan sawi tawh a, figure hi, hriatrengna hi a chak tawh lo a, kan liability chungchang bikah chuan 82.3 % of GSDP kumin a kan outstanding liability hi kan GSDP nena khaikhinin chutiang aia sang tur chu a nilo tih a ni a. Amaherawhchu tunah kan estimate ah chuan kan GSDP atangin kan outstanding liability hi kan GSDP atanga teha 54.4 % vela inhlangkai thei tura in beisei in kan kal a, chutiang chuan budget pawh kha kan rawn present a, a chiah chiah sawi theih a ni lo naa, tun hma khan loan-te kan la lo theilo a ni a. Central sawrkar in plan Fund min pekah hian loan portion kha a awm lo thei lo a, chuvangchuan kan sum hmuh a sanin kan loan a sang kan tih rualin in regulate a, fiscal management hi uluk taka tih loh chuan a sang lam khan kan kal zela, engemaw lai phei kha chuan kan total revenue receipt aiin kan liability kha a san zawk tak em avang khan, entirnan 102 % lai a han tawng lai te kha a han awm a ni. Hetah MLA a mipuite duhsakna a kan han awm ve tum pawh khan, khalai kha kan hruaitu senior te leh keimah ngei pawhin kan ngaimawh thu kan sawi a. Hetiang a nih chuan kan liquidity hi, one is one point five a nih chuan kan dinhmun a hlauhawm tawh lutuk a ni tih te pawh kan sawi thin a ni. Amaherawhchu nikum leh kum hmasa lama kan budget han present ah pawh khan kan outstanding loan hi a tlahniam ta a, 2009-2010-a kan Chief Minister in Finance a enkawl kumah phei kha chuan ka hriat sual loh chuan 90 crore in outstanding liabilities hi a tlahniam ta a. chuvangchuan 13th Finance Commission in min beisei leh kan FRBM-in fiscal correction path a tih chhungah khan kan inkhung thei lek lek a, nikum ah khan inkhung thei turin kan in ngai a, amaherawhchu kan inkhung theihloh deuh avang khan amendment te pawh kha dilin kan kal kha a ni a, chuvangchuan kan outstanding liability-ah hi chuan a tlahniam hret hretin kan kal thei a, chu pawh chu kan budget management ah hian nasa takin kan in hrek a, chuvanga hetiang hi thleng thei kan ni a.

Tin, chu loah chuan pension ah pawh hian a sang lam zela kan thang kha, hmanni budget ka present ah pawh khan ka rawn tar lang kha a ni a, kumin ah hian 1.23 % in Pension-a kan senso pawh New Pension Defined Scheme-a kan kal tak avang hian kan tla thla dawn a. Tin, tun hmaa loan, dik tak chuan sorkarin loan a lo lakah khan a pung sang tak takte a awm thin avang hian, chung chu tun hnuah hian ADB atanga kan loan-te hmang tangkaiin, khang loan interest sang lutuk zawng zawng kha kan liquidate chho ta a, chu chuanin kan outstanding liability-hi kumtin hetiang hian loan lak belh mah ila a limit cross lovin fiscal correction path-ah khan kan la kal thei a, a changin kan tlak hniam changte a awm

avangin kan financial management atanga han thlir hian kan outstanding liability hi a tla hniam chho zelin kan kal a. 2014-2015 ah phei chuan min phut ang hi tuna kan inrenchem leh kan inhrek ang a, kan kal thei zel thei mai awm mang e, tih beiseinain kan sorkar Department Office zawng zawng pawh Expenditure, Non-plan Expenditure ah hian inhrek turin kan in kal pui a. Sorkar hnathawk Officer-te leh hna thawktute pawhin chu chu hrethiamin Sorkarin a beisei angin an tihlawhtling chho thei zel niin a lang a. Chuvang chuan kan outstanding liability kha san viau lai awm mahse, a tlahniam lamin kan kal thei hram hram niin kan budget atang khan a lang a. Chu chu kan chhan theihna dan ni mai se langin.

Tin, chu lovah chuan, tuna zawhna, Plan fund crore 2300 atang hian Works atana pawisa awm tur chu crore 1412 ti a han tarlan a ni a. Tin, hemi bakah hian Divisible amount kha a awm a. Chu erawh chu nimpiniah lama ka sawi tawh ang khan, sorkar hnathawk zawng zawng hi hlawh la thei lo va, sorkarin a mi chhawr leh a neitu kan tihate harsaa kan dah a dik lo vang, tiin Chief Minister-in, 'Corporation lama mi pawh ni sela, School Education lama mi pawh ni se, hlawh hi chu pek tur a ni, a tih kha policy-ah kan hmang a, chutiang chuan kuminah hian Budget kan han siam a', chutichung chuan khawi laiah emaw chuan kan beisei ang lo deuh hleka harsatna pawh a lo awm thei. Amaherawhchu, kan Chief Minister-in Budget Management, a bikin sorkar hnathawkte hlawh indaih lo lutuk leh harsaa kan awm erawh hi chu awm lo turin a tih avangin, chu chu kan budget a dah a nih thu kan sawi lang tawh a. Tin, heta work kan tihah hi chuan Work-charge leh Muster Roll, contract employee-te, khang hlawh components engemaw zat hi a la tel dawn a ni tih hi chu sawi sa theih niin ka hria a. Amaherawhchu, engzat nge ni ang tih a figure ka nei thei mai lo va, in chhut chhuahna a awm lova, kan han hman a, fimkhur taka kan hman chuan a tam thei ang ber Works lamah hian dah hram hram, hlawh leh kan sorkar hnathawk te, a bikin kut hnathawktute, kan ngaihpawimawhte tana kan hman tur kan dah bak chu chutianga hman tur chu a ni a. Chuvang chuan nimin lama kan sawi tawh angin, a insem den den lam ai mahin a project base deuh zela kan kal tak avang hian Department thenkhatah chuan project kalpui tur thar an neih loh chuan tla hniamte pawh an awm a. Tin heng bakah hian DONER (NLCPR) leh NEC atangin engemaw zat hmuh belh kan beisei a, kan budget-ah khan crore 180 kan tar lang a. Tin, hemi bakah hian Central Sponsored Scheme atangin Works project-ah hmuh tur engemaw zat kan beisei bawh a ni. Chu chu kan plan-a kan beiseina leh kan Budget-a kalpui kan tum dan chu a ni e. Ka lawm e.

S P E A K E R : Le, Pu Lalduhoma'n zawh belhna pawimawh tak a nei a ni ang, lo ko leh lawk ila.

Pu LALDUHOMA : Pu Speaker, ka lawm e. Sorkar hmasa hun lai atang khan kan GSDP atanga kan leibat zat za zela chhut sang lutuk, a changa 80% ang te, India rama leiba tam ber kan nih thin tih reh nan khan FRBM Act kha kan pass a ni a. Kha pawh kha tih luihna in Central in min pass tir a ni ber a. Khata tang khan kan sorkarte reng rengin an tum chhoh zel a hi chu, kan GSDP atanga teh a kan leiba tihhniam ngawr ngawr tum hi Central kan hlah avangin kan budget hian a tin zawnin ka hria a. Khami target chhunga in khungluh ringawt kan tum khan kan development in, kan ram in a tuar thei a ni. Engvangin nge khami percentage kha a san kan tih chuan kan GSDP a hniam vang kha a ni a. GSDP kha sang sela kan leibat kha pung mahsela a paw lo a ni, leiba percentage a sang thei chuang dawn lo a ni. Chuvangin, a damdawi a zawk chu GSDP hi engtingge kan tih pun ang tih kha ni zawk tur a ni a. Chuvang chuan kan Finance Minister zahawm tak kan zawh duh chu tun budget-ah hian kan State sum dehchhuah GSDP tipung tur zawngin hmachhawp lian deuh pahnih thum, a hlawm lian deuh min hrilh tur a nei em tih kha a ni.

S P E A K E R : Kha kha tuna a chhan nghal mai ka phut dawn lova. A demand rawn tih hunah khan kan Minister zahawm tak kha lo in buatsaih sela. Kha kha policy matter pawimawh tak a ni. Kan kal kan ang a, tunah chuan Artahkawn tih vel leh Chekkawn lampang kan hawi ang. A zawt turin Pu Lalthansanga ilo ko ang.

Pu LALTHANSANGA : Pu Speaker, ka lawm e. Ka Starred Question No.127 na PWD changtu Minister zahawm tak chhan atan –

- a) Chekkawn to N.Vanlaiphai kawng hi hmalak tumna a awm em ?
- b) N.Vanlaiphai to Artahkawn kawng hi siamthat a hmalak tumna a awm em ? (Hetilai hi hmalak tih hi ka lo tisual deuh a)
- c) Keitum to Artahkawn kawng siam mek hi engchen nge a hna thawh anih tawh ?
- d) Artahkawn to Biate kawng siam mek hi engchen nge zawh anih tawh ? tih hi ka zawt a. Pu Speaker, zawhbelh i phal dawn si lova hetilai lawkah hian thil pakhat kan sawi chian duh chu kan MLA pui, Minister ten nimin khan min fiam deuh nual a Common Recess Room-ah sawn. A chhan chu ‘i zawt leh dawn em’ a ti a, Pu Mathana phei chuan, ‘dawn, a lo chhuah chuan kan dah leh e’, ka ti a. Artahkawn to Keitum hi NEC fund atanga tih a ni a, Artahkawn to Biate hi CRF atanga tih a ni a. Chuvang chuan zawh hian a destination a hman ve ve anih avang khan zawh hi a ngai thin a. Tin, hei a chhanna tur pawh hi ka hre lawk vek mai a. Hetilalah hian nakinah demanda min chhanna tur leh an lo in puahchahna tura ka duh chu Artahkawn leh Biate kawng siamna turah hian Double Sanction a ni, cheng vaibelchhe 5 leh tlem vel a ni a, chu chu nuai 501 leh point something vel kha a ni a. Hetah hian sanction a double avang khan sanction pakhat zawk kha khawiah nge a thlawh bo tak ? A awmna chin hi min hrilh thei em tih kha ka zawh duh a ni a. Vawiinah hemi vang hian Km 4.70 velin kan la thleng zo lo deuh tih a ni a. Chutiang chu min chhanna tur anih rualin kan ti lang duh a. Tin, hemi rual hian Keitum to Artahkawn a kan zawh leh chhan a pawh hi P.C.Ministry in 1982 a Chhanchhuahna Lei kan siam kha vawiin thleng a hman ala ni a. Chuvang chuan khimi khi accident rapthlak tak thleng thei tur a ni, a kum han ngaihtuah chuan, a life span kha a thui tawh lutuk a. Khimi bridge siam tur khian hma lak uaih tawh kha an tawp ta daih mai kha ka’n zawhna lai deuh a chu a ni a, ka zawh tum zawk kha. Kha kha nakinah demand hunah te pawh an lo inpuahchah nan ka’n sawitel a, ka lawm e.

S P E A K E R : Le, a zawttu khan a chhanna tur a hre deuh tho in a in sawi na a member ten a chhanna tur kan hre tlat lo mai. Chuvangin Miniister Pu R.Lalzirliana’n chhang teh se.

Pu R. LALZIRLIANA, MINISTER : Pu Speaker, MLA bengvar tak tak leh mi rilru hretheite kan neih avangin lawmthu ka sawi a, MLA zahawm tak Pu Lalthansanga zawhna kha a sei deuh avangin kan lo hriat tawh tawh loh takin -

- a) Chekkawn to N.Vanlaiphai kawng hi hmalak tumna a awm em tih hi - Awm e tih a ni a. Kumin chung hian 2012-2013 chhung hian chei that tum a ni a, sum awmdan a zirin a tam thei ang helai chei that nan hian dah tum ani a.
- b) N.Vanlaiphai to Artahkawn kawng hi siam that a hma lak tumna a awm em ? tih chhanna chu - Awm e tih a ni a, chhanna hmasa ang khan 2012-2013 kumin kum kal chho chhung hian re-surfacing leh strengthening te tih tum a ni a. Annual Planah hei phei hi chu dah tum a ni a, ruahman mek ani. Hlawhtling thawkhat viau awmin ka hria.

c) Keitum to Artahkawn kawng siam mek hi engchenge a hna tawh a nih tawh tih a ni a. A chhanna chu Keitum to Artahkawn siam mek ah hian km 28.134 a thui zawh a ni tawh a. A thawk hmasatu mi 3 te kha PWD mit leh Sorkar mit an tlung lova, an ti muang lutuk a, an tha lova. Chuvangin an hna cancelled sak a ni a. Midang thawk turin chak zawk tura ngaih dah a ni.

(d) Artahkawn to Biate kawng siam mek hi engchenge zawh a nih tawh tih chhanna chu Artahkawn to Biate kawng siam mekah hian 23.40km zawh a ni tawh a. A sanction hi 2008 a estimate siam tawh kha a ni a. Tin, 2010 ah sanction chauh a ni a, tunah hian thawh mek a ni, chutih chhungin price escalation a nasa em em a. Chuvangin, hei hi 4.60 km hi a daih ta lo a ni.

Chung chu kan chhanna a ni a, tin sanction double tih kha chu, a double a lo awm a nih chuan a dangah hman a ni ang a. Kan officer- te paipawn ruk mai mai tur a ni lo tih kha ka hrilh duh a. Tin, P.C. hun laia khilai kawng Mamit road a culvert thlawkbo ang kha chu a ni lovang tih ka tiam duh a ni.

S P E A K E R : Tunah zawhna 128-na ah kan kal ang a, zawt turin Pu Lalrobiaka i lo sawm ang.

Pu LALROBIAKA : Pu Speaker, ka lawm e. Ka zawhna Starred Question No. 128-na Minister zahawmtak, Sports changtu chhan atan- (a) Contact Sports tih hmasawn nan Sorkarin hmalakna a nei em ? (b) Inkhelhna/Practice-na bik stadium-te hi an hminga ruahmanna a awm em ?

S P E A K E R : A chhang turin a changtu Minister zahawm tak Pu Zodintluanga i lo sawm ang.

Pu ZODINTLUANGA, MINISTER : Pu Speaker, member zahawm tak Pu Lalrobiaka zawhna Starred Question No. 128 (a) Contact Sports tih hmasawn nan Sorkarin hmalakna a nei em tih chhanna chu – Nei e, kum tinin promotional fund Sorkarin a pe thin. Sports materials-te a remchan dan anga leisak an niin Training-na turte ruahman mek zel a ni.

(b) Inkhelhna/Practice-na bik stadium-te hi an hminga ruahmanna a awm em tih chhanna chu – Ruahmanna awm e.

S P E A K E R : Zawhbelhna Pu Lalrobiaka, a dawtah Pu K. Liantlianga, a dawtah Pu Lalthansanga.

Pu LALROBIAKA : Pu Speaker, ka lawm e. Kan Sports Minister leh kan House Leader kan Chief Minister ni bawk te hmalakna avangin hmasawna tam tak kan nei tawh a. Kan hmu a, Sports-ah hian nasa takin India ram mai nilo International thlengin hmingthatna tam tak kan nei tawh a ni a. Heng avang hian a hmasa in lawmthu ka'n sawi duh a. Chutih rual chuan ka'n zawhbelh duh chu Sports nasa takin develop a nih chhoh lai hian lehlamah chuan sipai lammual kan han tih te, tin, Mualpui a kan phul phah thar te, contact sport emaw sport item, sport discipline hrang ah hian hman pawlh a har khawp mai a. Tin, a bik takin engemaw han tih dawnin phul a chhia ang tih kan hlau si a. Chutih rual chuan tuna min chhanna kha ka'n duhtawk lo deuh a. Khawi hmunah te hian nge ruahman sak an nih? Contact sport ah hian nasa takin International thlengin hmingthatna leh Gold Medal te, tin, chutiangan thil chi hrang hrang ah hian individual games ni lo, team games ah hian nasa zawk takin hma kan la nasa a, he sorkar hian. Chutih rual chuan, anni duhsakna kan lantir velo ni te pawh hian an inhre deuhin ka hria a, contact sport lam hi. Chuvangchuan, khawiah tak hian

nge ruahman sak kan neih? Tin, a infiamna chi hrang hrang Sport department atanga ngaihtuah sak angah te khan nasa zawkin an mamawh angin discipline hrang hrangte an mamawh loh deuh ang chi te pawh pek chang te pawh a awm niin a hriat a. An mamawh angin pek a ni thei ang em tih ka'n zawt a ni.

S P E A K E R : Awle, tunah zawhbelhna bawk Pu K.Liantlinga.

Pu K.LIANTLINGA: Pu Speaker, ka lawm e. Contact Sports a, sport man te hi Mizoram pawnah National Level ah hian contract-a Employee emaw khawiah emaw hnathawk an awm ve em tih kha ka zawt a. Football ah chuan engemaw zat an awm ve a, ama'rawhchu, contact sports ho bikah hian National Level ah emaw khanga hna lo hmu te leh thawk mekte, company-ah te an awm em tih a ni a.

Tin, promotional fund kha a sawilang ringawt a, a amount engzat nge kumin ah hian. Tin, Association hrang hrang te hnenah khan engzat theuhin nge pek an nih tih kha ka'n zawt duh bawk a. Tin, a pali na ah chuan, Pu Chatea nen hian kum 2009 Pro-Fight khan kan House Leader kan Chief Minister Chief Guest naah kan tawiawm a, Boxing ring District tinah pek a tiam a, kha kha pek kim vek an ni ta em ? Tin, hemi hi practice nan hman theih vek a ni tawh em tih kha kan zawt duh a ni e, ka lawm e.

S P E A K E R : Pu Lalthansanga

Pu LALTHANSANGA : Pu Speaker, ka lawm e. Ka zawhna tam tak an rawn ti hlawhtling a, kan sorkar chungah pawh ka lawm hle a ni tih a hmasa in ka'n sawi duh a. Sport ah hian hma kan sawn em em mai a, Sport Department hmasawn ang hian hma hi sawn ta vek sela department hrang hrang hian kan GSDP kha chu a thang awk awk in ka ring deuh hlek a. Kuminah pawh Sport bikah hi chuan 31.something velin budget hi a pung chho a ni a, a lawmawm hle mai a. Hmun hrang hrang ah hian Sport tihna tur Hockey te, Football khelhna tur hi an ti nasa a, tin, Mini-Sport Complex tih ang chi pawh a tam mai a, ka bial Bungtlang leh Keitum ah pawh khianin min dahsak ve a, engchen nge hna thawh a nih tawh tih kha ka'n zawt duh a. (SPEAKER : Mahse bazaar a tibuai.....induhlo deuh ani lawm ni?) a...nilove, khami kha chu MAMCO ho bazaar kha a godown leh a zun in vel kha an rawn nek tawh a, a bazaar tak kha chu an la nek lo deuh a ni. Chuvangchuan, min han tih sak chuan nek lovin khiti lai hmunah khian dawr kaina remchang tak kha a awm thei dawn a. Chuvangchuan, khiti laiah Serchhipah nise hmannah an bungraw hmante, an work progress leh an contract-ah te pawh sub-standard a ni e tiin an tichhe hial a ni a. Chutiang khawp anih avang chuan khiti laite pawh khi inhlanhhawwna khawvelah a lut ve tho mai a, khi pawh khi supervision uluk takin min tihsak se tih ka'n duh rual in; Tuichangral lampang khi hetiang lampang ah hian kan Minister zahawm tak hi ka han zawt a. 'A la awm rih love', chu a ti na a. Tun kumthar chho velah te hi chuan engtin emaw deuh te min dahsak ve loh chuan Zoram khawvelah hian kan rawn lang ve thei dawn si lova, khiti laiah khu rum rum in kan tal ang a, heti laiah grass ah kan han tlan dar kar chanve ah kan chau zel mai ang a, chuvang chuan Tuichangralah te hi chuan hmun hnih khatah emaw Mini-Sport Complex emaw Studium puitling tur hmun pawh kan ngah mai a, engemaw te hi chu ruahmanna min siam ve se tih ka'n ngen tel nghal bawk a ni.

S P E A K E R : A chhang turin Minister Pu Zodintluanga lo sawm ang.

Pu ZODINTLUANGA, MINISTER : Pu Speaker, kan member zahawmtak Pu Robiaka zawh belhna kha Mizoram ti hmingthatu tam berte hi kan Contact Sport lama kan infiam mi te hi a ni a, duhthusamin Sorkarin an thahnem ngaihna leh an mahni inpekna ang

hian an infiamna hmun hi kan inpe thei lo hle a, a ngaih pawh kan ngaihtuah sak nasa a. Sorkar ang chuan SAI (Sports Authority of India) Authority te nen tang kawpin Boxing, Judo, Karate leh Taekwondo Mission Vengthlangah sawn anmahni pual bik tan liau liau siam a ni a. Tichuan Boxing, Judo, Wrestling leh Taekwondo tan bawk Pu Speaker, hmanni lawk khan Lunglei ah SAI phalna in Centre thar min hawn sak a, chutah chuan Chhim lampang naupang engemaw zat in Boxing-te, Wrestling -te, Judo-te, Taekwondo-te a free a training tur in Sorkar in Hostel-ah a dah mek a. Hei hi tuna Central Sorkarin Mizo naupangte tihna tur atana an siam a ni a, tunah an awmna tur bik leh an training-na tur bik LDSA ground number 2 kan ti a, sawlai ah sawn Hostel nuam tak an awmna tur, concrete in tha takin kan sa a, kan zo ti tih tawh a, rawng hnawih leh electrification a ngai a, tin, a Main Hall an practice-na tur Hall pawh zawh a ni thawkhat tawh a, tun atanga hun reilo te ah hian kan zo thei in kan in ring a ni. Tin, chumi chung chuan Judo leh Wrestling hi Ramhlun Sport Complex Aizawl ah sawn an practice-na tur a awm a, tin, Boxing hi Ramhlun Sport Complex-ah te, Mamit-ah te hmun hrang hrang ah nakinah Pu K.Liantlinga zawhna chhanna ah khalai chu kan rawn sawi a nga, Muaythai hi ram Pu Speaker anmahni bila an practice-na tur Stadium-te han sakna tur hi a buaithlak em em a, chuvang chuan Muaythai hi chu anmahni Private Association private ramah an practice-na tur atan sak sak mek a ni a, Sorkar pawn pawisa a sanction tawh a, thawktu tur te pawh thlan fel a ni a, Muaythai President kan MLA zahawmtak Pu Robiaka zawhna kha Muaythai bik tan pawh tunah hian sak tan a ni tawh a, anmahni tan liau liau a ni e. Tunah hian Taekwondo hi Kolasib Taekwondo tan bik anmahni Association ten ramte an rawn nei a, tunah DONER ah vaibelchhe 10 min retain a, tunah DPR te buaipui mek a ni a, Taekwondo ram neitu te nen inremlohna deuh hlek kan nei a, annin a sak zawhah building-te leh hmanrua zawng zawng kha kan ta tur a ni an ti a, Sorkar in a thlawnin a tih thei loh a ni tiin kan la in be mek a, chutiang chuan Taekwondo tan bik pawh ruahmanna siam a ni a. Tin, Wushu te hi Republic YMA Hall hman hawsak an ni a, tin, Taekwondo te hi Electric veng YMA Hall ah, Karate hi Central Hall Venghluh-ah hetiang hian an practice a. Tin, Boxing Hall hi Aizawl ah bik hian a hranpa in kan la neilo va, an buai em em a, Ramhlun Sport Complex-ah te sawn chep takin an practice a, chutichung chuan Pu Speaker, Mizo fate talent kan neihna a ni a, National level-ah te, Inter-National level-ah te pawh kan Mizo nula, tlangval an chhuanawm em em a, tun kum Financial Year chung hian Boxing bik tan liau liau Ramhlun Sport Complex-ah cheng nuai 110 vel seng in sak a ni dawn bawk a ni.

Tin, Sport materials chung chang a kha, ni e, Sport materials kan lei dawn hian kan fimkhur a, Sorkar-in kan duh kan pek kan duh duh chah sak a pek hi kan hlauh ber a ni a, kan chah sak dawn pawh in Sports Association-te anmahni brand leh eng ang nge ni an federation te'na an approve, a company leh a chahna tur rate-te an rawn pek vek hnu ah anmahni hmingin kan chah sak thin a. Chutianga tha lo lai deuh te a lo awm a nih chuan kan member zahawm tak khan a hranpa in min rawn hrilh sela, Sorkar ang chuan supply system ang a pek kan hlau va material chhia te an dawn kan hlauh avangin Association-te'n an duh ang thlap company leh an duhna hmun ngei ami a rate an zuk zawh fel vek hnu ah kan chah sak thin a ni. Chu chu kan member zahawm tak Pu Robiaka zawhbelhna ka chhan theih ni mai sela.

Tin, kan member zahawm tak Pu K. Liantlinga zawhbelhna kha Boxing Ring hi district tin tan kan Chief Minister zahawm takin a lo tiam tawh ang khan leisak an ni tawh a, pek an ni tawh a. Champhai-ah chuan Boxing Hall tha tak an nei a, chutah chuan kan dah a, Mamit-ah a hranpa a Boxing Hall nei in Boxing Ring dah tawh a ni a, Lunglei-ah sawn a hranpa in a dahna tur kan la nei lova. Tin, Lawngtlai-ah sawn Boxing Ring chu pek an ni tawh a, mahse, a dahna saw

Association dangte nen an la buai deuh a, duh ang in kan la hmang tangkai lova. Chutiingin Saiha-ahthe pawh a ni a, tin, Kolasib-ah khuan kan Hall neih thar ah Boxing Ring kan dah tawh bawh a ni tih kha ka chhan theihna ni sela.

Tin, Contact Sports atanga phai lam atanga eizawna tih kha Pu Speaker, a chiah chiah chuan ka sawi thei lo vang a. Amaherawhchu, Wrestling-te, Judo atangte hian sipai-ah tam tak an lut a, kan Judo President thin Pu Duata phei chuan 'engatinge medal hi kan va la khat ve Judo-ah hian', an tih khan 'kan mi tha tha te hi State dangah sipai-ahthe an tang thin a, a thar kan chherchhuah zel a ngai alawm,' a ti a, chutiang chuan Contact Sports atang pawh hian kan thalai te'n pawn lamah eizawna an hmu a ni tih kha ka chhan theih ni sela.

Tin, Promotional Fund kha Pu Speaker, figure hi ka bul a mi ang hian ka hre ve reng thei lova, a figure chiah chiah hi Promotional Fund hi kan Session chhung ngei in kan dah zat ka lo hrilh thei ang a. Amaherawhchu, nikuma kan pek ang zat kha Association-te hnena kan pek ang zat kha chu kan pe leh thei dawn a ni tih hi he House zahawm tak hi ka hrilh duh bawh a ni.

Tin, kan member zahawm tak Pu Lalthansanga zawh belhna kha Keitum leh Bungtlang saw ni e chak taka thawh kan duh a, PWD lam te pawh an tang a, theih tawp in DPR leh Contractor thlanahte theihtawp an chhuah a, Sport Department ten a theih ang in kan thawhhona tha hnuaiah kan thawk a. Bungtlang leh Keitum pawh saw 'a thlalak hi thla tin min rawn pe rawh u,' ka ti a, hma an sawn tha in ka hria a. PWD a concern Department-te chungah pawh vawiin ah hian lawmthu ka sawi tel duh a.

Tin, Tuichangral a tih chin hi Tuichangral khi Khawbung khi a ni ve tho....aw.....a nih ve tho chuan.....aw Khawbung-ah khian Pu Speaker, Mini Sports Complex tunah ruahman a ni a, kan hotute kan Chief Minister-te leh kan Home Minister zahawm tak te'n ruahmanna an siam ang in DONER a kan State priority list-ah a pawimawh a tel ngei ngei tur zingah an telh a ni tih kha ka rawn sawi theih a ni e.

Pu LALTHANSANGA : Pu Speaker, Tuipuiral a ni a Khawbung kha chu, Tuichangral khi chu Khawlailung atanga Khawzawl inkar deuh hi a ni a. Khiti laiah khian pakhatmah a awm lova Serchhip-Bungtlang-Keitum tih hi Bungtlang leh Keitum inkar khi km 7 emaw vel chauh a ni mai a, tichuan Serchhip khi km 18 vel Keitum atangin a ni a. Khilalah khian a awm thluah ta mai a, a chhak lamah khian a reh hian a reh vung vung mai a, churang chuan khiti lampang khi han reh lo deuh se tih kha a nia ka han tih laia chu.

Pu K. LIANTLINGA : Pu Speaker, chhan nghal atan Association awm zat kha min hrilh thei em aw.

Dr. R. LALTHANGLIANA : Khawthlang lampang kha kan lang ve lo riau mai a, Minister zahawm tak bial hlui lampang khulai tlangdung vel khu eng emaw hmalakna thlang han ti mai ila Lunglei District, chhim lam hmalakna, khawthlang han ti mai ila Lunglei District (Interruption) Pu Speaker.

* Speech not corrected.

Pu ZODINTLUANGA, MINISTER : Pu Speaker, kan member zahawm tak Dr. Lalthangliana bial chhungah sawn kan ti nasa mai a saw artificial grass, India ram ah pawh a palina ni turin kan dahsak a, a bial chhungah (Speaker : Khawihmun ah) Lunglei, Thuamluaia mualah. A bial Rahsi veng ah sawn cricket khelh theih na tur tham field kan lai mek a, Sports Council atang pawn tunah hian nuai 8 dah tawh a ni a, contractor tur pawh work order pek a ni tawh bawk a ni. Chuan kan tawlhthla ve zel ang a, a thlanglam kha chu. Tin, Pu Speaker, Tuichangral tih kha thlanglamah an lo ti tawh a nih chuan chhaklam atangin kan rawm hual ang a, a thlen ve hun chu a awm ve mai ang. Ka lawm e.

SPEAKER : Aw, tih sak vat chi a nia khilai tlangdung khi. Tunah chuan Sport lampang kha ani a, mahse ei thate a ngai a ni awm e, sport ti thei tur hian. Chuvangin Pu Lalduhoma zawhna No. 129-na zawt turin ilo sawm ang.

Pu LALDUHOMA : Pu Speaker, Industries Department changtu Minister zahawm tak chhan atan. Ka Starred Question No.129-na-

- a) Super Passy Press engzatnge kan neih, a capacity leh capacity utilisation zat leh a bunna hmun?
- b) Pineapple Juice extractor engzatnge kan neih, a awmna hmun, a capacity leh capacity utilisation zat?
- c) Orange Juice extractor neih zat, a awmna hmun, a capacity leh capacity utilisation zat?
- d) Concentrate Juice kan siam thei tawh em?
- e) Baibing sawngbawlina atang hian a hlawkna tel a ni tawh em?

SPEAKER : Awle, a chhang turin a changtu Minister zahawm tak Pu S. Hiato ilo sawm ang.

Pu S. HIATO, MINISTER : Pu Speaker, member zahawm tak Pu Duhoma zawhna chhanna

- a) Super Passy Press engzatnge kan neih, a capacity leh capacity utilisation zat leh a bunna hmun? tih kha pakhat kan nei a. Quintal 25 per hour capacity, 20 quintals per hour capacity utilization niin a bunna hmun chu Fruit Juice Concentrate Plant, Chhingchhip ah a ni.
- b) Pineapple Juice extractor engzatnge kan neih, a awmna hmun, a capacity leh capacity utilisation zat tih chhanna chu Fruit Juice Concentrate Plant, Chhingchhipah a awm a, quintal 30 per hour capacity niin, quintal 30 per hour capacity utilization a ni.
- c) Orange Juice extractor neih zat, a awmna hmun, a capacity leh capacity utilisation zat tih chhanna chu pahnih kan nei a, Fruit Juice Concentrate Plant, Chhingchhip leh Food Processing Plant, Sairangah a awm, 10 quintals per hour capacity niin, 8 quintals per hour capacity utilization a ni.
- d) Concentrate Juice kan siam thei tawh em tih chhanna chu Sapthei Juice Concentrate kan siam thei a, Serthlum leh Lakhuihthei kan la siam thei rih lo.
- e) Baibing sawngbawlina atang hian a hlawkna tel a ni tawh em tih chhanna chu Ni tawh e.

SPEAKER : Awle, kan zawhna leh chhanna hun chu a lo tawp ta a (Interruption)...

Pu LALDUHOMA : Capacity ka zawh kha per hour-in min chhang a, a utilization kha per day khan min rawn chhangin ka hria a, khalai kha kan lo hriatsual nge ni? Khalai te mai kha a tih theih mai em?

S P E A K E R : Ni e, (b)-na kha han chhang nawn leh teh pakhtah per hour i ti a pakhtah per day i ti deuh em ni?

Pu S. HIATO, MINISTER : Per hour capacity. c)- na hi maw? b) – na Pineapple kha pakhat kan nei a, Fruit Juice Concentrate Plant, Chhingchhip ah a awm, quintal 30 per hour capacity niin quintal 30 per hour capacity utilization hman a ni e.

Pu LALDUHOMA : Nikhata a working hour zat kan hre si lova, chiang deuh hleka min pek theih chuan Session chhungin emaw a lawmawm tho vang (ka lo pe ang e, Pu Speaker.)

S P E A K E R : Tunah chuan zawhna leh chhanna hun a lo zo leh ta a, kan tih tur dangah kan kal leh ang a, wawinah hian kan member lo kal thei lote hi Pu Lal Thanhawla leh Pu. B. Lalthlengliana te an ni.

Laying of Papers - Pu H. Liansailova Minister zahawm takin heng paper te :-

- (1) Report of the Comptroller & Auditor General of India on State Finances for the year ended 31 March, 2011 (Report No. 1)
- (2) Report of the Comptroller and Auditor General of India on Civil, Revenue and Commercial for the year ended 31 March, 2011 (Report No. 2)
- (3) Appropriation Accounts for the year 2010 – 2011 relating to Government of Mizoram.
- (4) Finance Accounts for the year 2010 – 2011 Volume 1 relating to Government of Mizoram.
- (5) Finance Accounts for the year 2010 – 2011 Volume 2 relating to Government of Mizoram te hi House dawhkanah rawn lay sela, ilo sawm ang.

Pu H. LIANSILOVA, MINISTER : Pu Speaker, i phalna leh remtihna in

- (1) Report of the Comptroller & Auditor General of India on State Finances for the year ended 31 March, 2011 (Report No. 1)
- (2) Report of the Comptroller and Auditor General of India on Civil, Revenue and Commercial for the year ended 31 March, 2011 (Report No. 2)
- (3) Appropriation Accounts for the year 2010 – 2011 relating to Government of Mizoram.
- (4) Finance Accounts for the year 2010 – 2011 Volume 1 relating to Government of Mizoram.

- (5) Finance Accounts for the year 2010 – 2011 Volume 2 relating to Government of Mizoram to be placed before the House for consideration, and to be referred to the Finance Commission.

S P E A K E R : A copy of the report of the Finance Commission relating to the Finance Accounts for the year 2010 – 2011 Volume 2 relating to Government of Mizoram to be placed before the House for consideration, and to be referred to the Finance Commission.

Pu R.LALZIRLIANA, MINISTER : Pu Speaker, Governor's recommendation regarding the Demand No. 11na, 16na, 35na and 38na Rs. 665,40,43,000 to be placed before the House for consideration. Demand No. 11na, Secretariat Administration, Rs. 71,51,39,000. Demand No. 16na-Home (including Prison), Rs. 442,24,58,000. Demand No. 35na-Fisheries, Rs. 24,23,73,000. Demand No. 38na-Rural Development, Rs. 127,40,73,000, a total of Rs. 665,40,43,000 to be placed before the House for consideration.

S P E A K E R : Awle, Minister 2 in the chair, Demand No. 6na, 7na, 33na and 37na to be placed before the House for consideration.

Pu J.H. ROTHUAMA, MINISTER : On the recommendation of the Governor of Mizoram and with your permission, Sir, I move the Demand No. 6, 7, 33 and 37 for Rs. 114,58,23,000 for meeting expenses during 2012-13 in respect of the following departments; Demand No.6-Land Revenue & Reforms, Rs. 21,23,22,000. Demand No.7-Excise & Narcotics, Rs. 20,25,58,000. Demand No. 33-Soil & Water Conservation, Rs. 59,96,74,000. Demand No. 37-Cooperation, Rs. 13,12,69,000. Total, Rs. 114,58,23,000.

S P E A K E R : Awle, Minister 2 in the chair, Demand No. 6na, 7na, 33na and 37na to be placed before the House for consideration. Demand No. 6na, Land Revenue & Reforms, Rs. 21,23,22,000. Demand No. 7na, Excise & Narcotics, Rs. 20,25,58,000. Demand No. 33na, Soil & Water Conservation, Rs. 59,96,74,000. Demand No. 37na, Cooperation, Rs. 13,12,69,000. Total, Rs. 114,58,23,000.

Pu LALDUHOMA : Pu Speaker, Minister 2 in the chair, Demand No. 6na, 7na, 33na and 37na to be placed before the House for consideration. Demand No. 6na, Land Revenue & Reforms, Rs. 21,23,22,000. Demand No. 7na, Excise & Narcotics, Rs. 20,25,58,000. Demand No. 33na, Soil & Water Conservation, Rs. 59,96,74,000. Demand No. 37na, Cooperation, Rs. 13,12,69,000. Total, Rs. 114,58,23,000.

S P E A K E R : Awle, Minister 2 in the chair, Demand No. 6na, 7na, 33na and 37na to be placed before the House for consideration. Demand No. 6na, Land Revenue & Reforms, Rs. 21,23,22,000. Demand No. 7na, Excise & Narcotics, Rs. 20,25,58,000. Demand No. 33na, Soil & Water Conservation, Rs. 59,96,74,000. Demand No. 37na, Cooperation, Rs. 13,12,69,000. Total, Rs. 114,58,23,000.

policy matter ah ringawt khan a in confined lovin ka hria a. Member ten kan han ngaih-mawh te pawh kha a rawn ti deuh thovin ka hria a, khatih laiah khan ngaih-nawm intih sak hram hram hi tum hrim hrim mai ila Chair atang pawn ka lo mutthluk san lo hram hram che u a nia, chuvangin thusawi kha ngaih-nawm tih sak hram hram tum ila, ngaih-nawm deuhin in sawi teh ang, ngaih-nawm ti deuhin ngai-thla bawh ila, chutiang chuan a tha dawnin ka hria, hun a tawi kawh mai a nia.

Awle, tunge han sawi hmasa dawn le, Pu Lalrinawma bawh em ni tan leh mai dawn, tunge han sawi hmasa dawn le? E, Pu Chawngtinthanga.

Pu CHAWNGTINTHANGA : Pu Speaker ka lawm e. Ka pang a nawm vak loh avangin chawhnu leave dil ka duh si a tawite in kan sawi hmasa ang e.

Demand No. 16-na kan en hian major work leh minor work tam tham tak a awm nghe nghe a, a thain ka hria a. Work programme erawh a lang lova. Kan hriat theuh angin Home Department hi kan Minister chak tak leh ngaihtuahna fing takin tumruhna nen a kaihruai a. Kan police hoten an thawk tha bawh a. Hemi avang tak hian kan sorkar pawh hi a hmingtha in mipuite pawh kan lungmuang in kan him hle niin a lang a. Law & Order tha tak avangin mipui kan him a, development hna chumi avang chuan a kal tha thei a. Kan police te pawh ralthuam (weapons) tha tak tak ngaihtuah sak an niin thuam thar zel an ni a. An lo efficient zia te pawh thiam tak leh phur taka Minister in a hman chuan nitin thlatin a lo lang chho zel a ni tih incident hrang hrang atangin sawi ngai lovin kan hre thei awm e.

Tichuan, kan police te hi kan ram venghimtu, development pawh a tak taka kalpui a nih dawna an lova thil tih theih miah loh anih avangin thuam that a, enkawl zel hi an ngai em em a, Aizawl khawpuih chang lo hmun hrang hrangah hian a inzar pharh a, hmun hrehawm leh hmun harsa a awm te hi duat an ngai zaw mah mah emaw tih mai tur a ni. Vawi engemawzat chu kan Home Minister zahawm tak hnenah hian ka sawi tawh a, ka bial chhung Suangpuilawn leh Khawlian ah khian I.R. Station Post a awm a, hmun harsa a awm te an nih avangin thuam that an ngai hlein ka hria. Mobility an nei tha lova, an ke pahniha kal chhet chhet ringawt maia han vahvel hi harsatna chin a awm a, an area an cover zung zung thei lova. Vehicle nei thei se chu a lawmawm awm mange tiin ka han dilpui a. Tin, chubakah an awmna in khi a chhe em em mai a, zahpuiawm khawp a ni tawh a. Ka kal apiangin ka tlawh thin a, 'hei chu kan sorkar hotute hnenah ka rawn sawi ange an sak that sak mai ang che u' ka ti a, mahse waviin thleng hian sak that loh a nih avang hian han kal leh nikhua pawhin a tlawh pawh a inthlahrun thlak ruih tawh in ka hria, Suangpuilawna IR post hi min siamthat sak turin ka han ngen nghal bawh nise.

Tin, a dawt leh ah chuan Demand no.35-na Fisheries hi, Seed production leh development of cold water fisheries tih a awm a, hei hi kan ram tan pawimawh tak a ni in ka hria a, kan dil neih te hi phai lamah awm ve bawh mahse, tlangram hmun sang zawk a awm te hi a tam em em mai a. Chuvang chuan fresh water pond hi kan ngah hle a, cold water fish development hi kan ram tan a pawimawh niin kan hria a. Tin, sangha chi phai lam atangin kan la lut thin a, a thi a tam a, an sem dan ah pawh hian tha tawh lo tiin sawi a tam hle a. Kan ram chhung ngeia hmalakna an awm hi a lawmawm hle tih ka sawi duh a. Tichuan,

revarine fish lui a sangha chi chhuah hi a thatna awm mahse a venhimna lamah hian tan kan lak nasat a ngaiin ka ring. Fisheries Department in sangha chi an sem chungchang hian fimkhur deuh tawh se. Vanbawng leh Khawleka sangha dil tha tak nei an awm ve a. A Fisheries Department in sangha chi an sem a, an lo beisei viau laiin Suangpuilawn an thleng a, an haw leh daih mai a, hetiang hi thleng tawh lo se tih kha Department lam pawhin lo hria se ka ti khawp mai.

Rural Development Department hi keini BAPD-te, Border Area Development fund te hmu ve phak lo constituency chu kan in hngang fak fak ve na ber a nih avangin major works leh monir works awm hi a beitham deuh hlek in ka hria a. Eng pawh nise kan hotupa a, enkawl tu pa hian a hmang thiam a, kan chhawr tangkai hle tih kha ka sawi duh a ni.

Pu Speaker, NREGP hnuia inhlawhna tam tak hi kan lawm in kan chhawr tangkai hle a. Asset siam nan kan hmang tangkai em em a ni. Material component hi a tlem ta deuh hlek a, kan hotute hian material component hi hei aia zau zawk deuh hian siam dan min zawn sak thei em tih te pawh ka han sawi duh a ni.

Tin, a dawt leh ah chuan Land Revenue & Settlement-ah hian Regulation of Land Holding tih a awm a, ka ngai pawimawh khawp mai a. Kan ram ah hian rual lovin mihausa leh thil ti theite hian hmun tha leh remchang an nei zo tep tawh a, mirethei leh harsa zawk te, nitina kan ei leh bar thawk chhuak tu ber te hi hmun harah an nawr tawm mek niin a hriat tlat tawh mai a ni. Mi harsa leh retheite hian chetna tur an nei ve tawh lo. Chuvang chuan land holding system te pawh hi kan mirethei te hamthatna tur leh veng tur hian siam theih dan a awm em tih hi ka ngaihtuah thin a. Hemi chungchang ah hian kan Revenue deptt. leh Revenue Minister hnenah pawh hian lawmthu sawi ka duh a. Thil tithei ten ka bial chung Luangpawh ah khian, ram zau tak mai hi sorkar chakna in an lo LSC vak mai a. A khawchhung eizawngtu mipui te khi eizawna tur neilo deuh thaw a a nekchepin an awm a ni. Hei hi theihtawpin kan bei ngar ngar a, kan Revenue Minister in theihtawpin min beihpui a, LSC 8 tunah hian min cancel sak a, mirethei leh khawtlang mi te tan eizawna a kaw leh deuh hawk te khi a lawmawm em em a ni. Hetiang hian hmundangah pawh kan khawtlang nekchep tu mi thil tithei te chung chang hi Revenue deptt. hian min rel sakin min bawhzui sak se a duhawm hlein ka hre nghe nghe ani.

Tin, Excise & Narcotic Demand No. 7 na hi kan hriat theuh angin kan ramah ruihhlo in a tihbuai thalai kan ngah em em a, thihna tam tak kan thalai ten an tuar a, chumi dan na atan leh a khap nan a deptt. kan voh chhoh leh a pawimawh ber chu Excise Deptt. hi a ni mai a ni. Duhthusama effective taka vawiin a hna an thawh theihloh na chu a thawktu te hi an fel lo, an thiam lo, an fing lo, an chak lo kan ti thei lo, man power leh facilities ah hian an indaihlo em em a ni tih hi hai rual a ni lova. Tunah pawh hian Excise & Narcotic Deptt. hian kan indaihlo em mai, man power recruitment siam min phalsak rawh u tiin wawi tam tak an dil tawh niin kan hria a, vawiin thleng hian phalna pek an nilo a nih chuan kan sorkar pawh hian Excise Deptt. thum chak tur hian recruitment hi phal sak thei ila avan tha em tih ka han sawi leh duh bawk a. Tin, avaiin ka sawi vek hmanlo in ka ring a, tawi te te in kan sawi ang a.

Demand 33-na Soil & Water Conservation hi a pawimawh em em a, kan ramah deptt. hmasa leh deptt. upa a ni nghe nghe a, amaherawhchu engemaw chenah khan

deppt. tereuhthe angin neglect in a awm reng a. Tun hunah erawh hi chuan kan NLUP programme avang te leh, deptt. in hma a lak hrim hrim hi a pawimawh em avangin kan ram economic dinhmun siamtha turin theihtawkin an tharthawh leh ta a, a lawmawm hlein ka hria a. Minor works te, major works te pawh he tah hian a awm a, rubber plantation hi hectare 1000 cover theih an tum a, cash crops leh spices te, establishment of nurseries te leh departmental plantation enkawl hectare 68 lai cover nan sum leh pai kan han indah bawk te hi a lawmawm hlein ka hria a. Mizoram mipui te sum leh paia kan lo intodelh nan leh, kan sum leh pai dinhmun a lo that a kan hnam a changkan nan heng deptt. te hi a pawimawh a ni tih hre tharin deptt. in hma an lakna apiangah thahnemngai taka mahni tan mai nilova kan ram tan kan thawhho pui a pawimawh zia kan sawi duh leh bawk a.

Tin, a dawt leh ah chuan demand No. 37 na Co-operation ah hian grant-in-aid atan te, subsidy atan te, investment leh loan and advances atan te pawisa tam tham pawh nilo engemawzat chu dah a ni a, a lawmawm a. Dik tak chuan Mizo society hi a huho a thil ti let let thin lungrual a, tangrual a thil tih thiam tak ni a kan in ngaih lai in Mizoramah hian Cooperation-hi atak takin kan hmang thiam meuh lo hle niin a lang a. Department tan leh mipuite pawh hian thil zir thar tur a awmin ka hria. Cooperative Society tam tak an ding a, tha dawn emaw kan ti a a awngrawp leh thin a. A chhan ni a lang chu monitoringah kan ti chak tawklo. Chuvangin Cooperation Department hi chak zawka mipuite kaihrulaitu tur a hma kan lak a pawimawh hle in ka hria. Pu Deputy Speaker, ka lawm e.

DEPUTY SPEAKER : Le, a in chhawk deuhvin aw, heti lam Pu Lalthansanga.

Pu LALTHANSANGA : Pu Deputy Speaker, ka lawm e. Vawiin a kan Demand sawi tur hi a bikin thingtlang lamte tan chuan a pawimawh hle mai a.

A hmasa ber in Fisheries Department, Demand 35-na. Fisheries Department hi hmanah pawh zawhna kan zawt vak tawh a, engang in nge ni District wise a in sem thin tihte pawh kan han zawt a. Chutiangah chuan a prone area lem lo, a prone district lem lo, dilte pawh neih tam vak lem lo na hmunah te pawh khan kan dah tam viau a ni thin a. Tin, sangha chi pawh hi a sem a sem chiah lovin tunah phei chuan a khulin kan khul a, a hmingin pack khat kha Rs.20, 25 vel ten khulin chutiang chuan fight an ti emaw ni, te reuh te te, lulawk ang te te kha an ti a. Khami a hlawhtlin leh hlawhtlin loh kan han zawh pawh khan a dam average kha a tlem hle a ni a. Tunah pawh hian sem turin kar leh ah tiin, ka bialah phei chuan an mangang hle a ni a. Engtikah nge hei hi min sem theih ang sangha chi hi ? Min sem tihah min rawn pek theih ang tih kha ka zawt duh a.

Tin, Home-ah hian han kal ta ila, Demand 16 na hi. Tuntum chu a lawmawm hle mai a, ka bial N. Vanlaiphai Police Station Building min han sak sak dawn a ni a. Tin, chubakah Quarter Type III hi 1 a ni a, Type II hi pahnih min sak sak dawn bawk a, kan lawm hle mai a. Tin, a approach road-ah khian buaina te kan nei deuh bawk a. Khiti lai vel pawh khi nakinah RD changtu nihna angin engtin emaw tih dan material component atangin a awm thei ang em tih kha ka rilruah an lang nghal bawk a. Tin, kan sawi duh chu Home ah hian Rev. Chanchinmawia thih chungchang kha opposition thalai kan nih lai khan kan bei nasa hle mai a. Kan Minister zahawm tak, Sports Minister hi thalai president a ni a, tichuan lehlamah keini a in vaivung pawl kan ni a, ZNP nen kan bei nasa hle mai a. Hemi chungchangah khan mipui rilru damlo hi a la awm tlat mai a, chumi chungchangah chuan kan Ministry tharin oath an lak zawh hlim hlawl December 12 a Evening Post a lo chhuak, oath an lak zawh a zawhna an zawhah khan Pu Dy. Speaker, i phalna in, zawhnaah chu kan chhiar lawk ang a.

Rev. Chanchinmawia thih dan pawh a tel a, Chief Minister chuan, 'Pastor thih dan hi an party legal cell pawhin an advocate Pu Lalsawta kaihhruaina hnuaiiah Pu Lalrinliana Sailo kaihhruaina hnuaiiah Pu F. Lalremsiama, Pu Hmingdailova Khiangte leh Advocate Pu Lalrinawma te kaihhruaina hnuaiiah hemi enquiry hi an ti a,' tiin an sawi a. Chumiah chuan Pu Lalsawta pawhin sawi tur tha tak tak te a nei khan an rawn sawi a. Chutiang taka an sorkar hlima an sawi kha, an han sorkar ta a, Special Investigation Team, investigation kha kan ring zo lo ni khan a hriat a, chu chu kan rin zawhloh avang khan CBI kan ko lut ta a CBI chuan SIT ho investigation kha an rawn ring zawm leh ta mai ni khan a hriat ta a. Report kha ti khan a kal chho ta a, khami kha kan pawm zam ta a, vawiin ah hian he thihna hi mipui ten a nihna, a fact, hriat kan duh em em lai khan fact pawh chu hre ta mang silovin leh kha CBI-in a SIT report kha pawmin CBI report ang khan vawiinah hian a awm ta kha a ni a. Sorkar term te alo tawp dawn ta a, khami legal cell Chairman-te pawh hian sawi tur tha tak tak a nei tihte kan lo thlamuanpui em emte kha engnge han puan theihte a awm ta deuh em ? Hemi chungchang kan sawichhuahna chhan pawh hi, Mizoramah hian politics-a kan inbeihna a na hle a, P.C. Ministry-te pawh kha 'Special Force dintu' ti khan vawiin thleng hian mi hi an la puh a ni. Hei kan pu pawh hi vawiinah heti lai hmunah min la tawiam a, ala thu thei pawh hi eng eng emaw khatih hun laia inpuhnate pawh kha sawi lan a, a hun laia khatiangte pawh kha tihrawn a awmna tur atan Pathianin he hmunah te pawh hian a dah ni hian ka hre deuh hlek a. Special Force chungchangah te pawh khan Zoram mipui in min puhna pawh hi a nghet em em mai a. Vawiin thleng hian politics hmun then then-ah te chuan sawichhuah ala ni thin a. A chhan chu ngatinge kan tih chuan Pu CH.Saprawnga'n Ka Zin Kawng tih lehkhabu a ziah pheik 71-naah khan District Council hun lai atang tawh a he Special Force-te pawh hi din alo nih tawh thu kha a sawi a. 'Chutiang chuan kan rel a, Special Force chu kan lo din ta reng mai a' tiin Pu CH.Saprawnga'n Ka zin kawng tihah pawh khan a ti a ni. P.C. Ministry khan Special Force hi a din lova, khatianga police discipline pawh awm lo leh police training pawh neilo, form pawh ha lova, samseia khatianga awmho kha, hei hi police nungchang leh police awmdan ani lo tih avangin khatih hun laia Chief Minster zahawm tak Brig T. Sailoa khan hetiangho hian training an nei ang a, police nungchang leh police discipline ang hian an awm tur a ni ti a kha special force ti rehtu zawk kha a dintu ang hian vawiin thleng hian Zoram khawvela kan thanna te hi politics dik hi mipui a kan hailan loh avanga he House a sawi anih loh avang hian Zoram mipui hian politics hi kan hre lova. A tam lam lam vote emaw, khatianga Sorkar tur lam pang rilru ngaihtuah naah hian vawiinah hian kan rilru hi kan politics ngaihtuahna hi a kalsual zo ta a. Nichina kan Group Leader zahawm tak Pu Lalduhoma rawn sawi ang deuh khan kan GCDP lampang punna tur pawh hi kan ngaihtuah tawh lo. Leipui politics khatiang engemaw therhlo te te khan kan ram hi a kal nasa ta a ni.

Term hmasaa kan Chief Minister zahawm tak Pu Zoramthanga pawh khan a sorkar tirh khanin oath a lak zawh hlim a a interview khan, 'engnge ni Zoram tana i tih hmasak tura i policy' an tih khan pahnih a sawi a, pakhatat 'Chakma District Council thiah' a sawi a ni. Kan lo lawm em em a, keini te phei chuan kan salu hawn tur tih khawpa khatianga kan lo tih lai khan, khatiang taka Tlumtea thlir a kan lo thlir lai khan kum 10 chhung khan hmalak pawh a awm chuang lo. Kan theih tur te, theihloh tur te, thil ni thei tur leh Zoram mipui hmasawn leh Zoram kalsiamna tur laiah zawk hian vawiin ah hian he House-ah pawh hian kan debate tur niin ka hre deuh hlek a. Ni lova kan tih that tlem te te lai leh, khawi lai emaw surplus kan neihna lai kan sawi vak vak lai hi, kan politics taste hi a hniam phah niin ka hria a. Chuvang chuan, thangthar vawiina lehkhah thiam tak tak leh fel tak tak te hian kan politician-te min tih na leh politician min demna hi a lian hle tawh a ni. Chuchuan engnge a hrin ang kan tih chuan vawiin ah hian an fin leh thiamna kalrem hian kan kalpui thiam lo, kan kalpui tawh lo ni hian a hriat a. Chumi in a nghawng tur chu he

Zoramah hian revolution hi a nghawng ang tih hi a hlauhawm a ni. Vawiih chuan lawmte pawh kan in lawmpui thei tawh lova, chutiang tak a nih avang chuan he thihna chungchangah te pawh kan Chief Minister zahawm tak tun ani in Chief Minister oath a lak zawh a a thutiam, zawhna an zawh zawh a commitment a siam hmasak anihna ang khan khati laite pawh kha rilru hian zawhna lian tak a zawt a ni tih kha kan sawi duh a. Chuvang chuan inpuhmawhna te hi bo deuh tawh se ka ti duh a.

Demand 6-na Revenue ah hian kan kal leh duh a. Mizoram ah hian buailo fa hi kan awm lo niin ka hria a, chuvang chuan Revenue Department ah hian Revenue Service hi awm thei ta sela, tichuan Revenue Service chuan kha Revenue Department kha chu a ta angin a en ang a. Tichuan a ta anga a en

chuan a nih chhung deputation a, Pu Deputy Speaker ka boss hian a sawi ngai silova, vawiiin chu tlem minlo pek belh mai teh a, kan sawi ve duh deuh a ni.

DEPUTY SPEAKER : Demand lam ai mah khan party thilah khan i tui ve deuh bawka ni.

Pu LALTHANSANGA : Ni e, hei vawiiin ah hian Sorkar a liam mai tawh dawn si avang khan leh Special Force kan din loh zia te kha he House ah hian kan puang ve duh a ni a. Khatiang khan Revenue te pawh hi deputation in officer kan va dah a , an nih chhungin engemaw zah an theihna zawng zawng anmahni tan an hai tawklo in thahnem an ngai tawk lo hian a lang thin a ni. A chhan chu Revenue-a lo awm tawh hrang hrang te han en an mahni han chhuichian hian khatiang laiah khan an mahni vested interest in an lo kal tihte pawh hi a lang a. Chuvang chuan Revenue Department hian an mahni Revenue Service hi nei ta se tih kha kan ti duh bawka. Tin, Cadastral Survey te hi tun aia chak zawk leh nasa zawk te hian kal sela, an Plan fund te chu tlem deuh mahse kan sorkar hian a duhsak chho zel turah ngai ta ila ti chuan kan ti duh a.

Tin, Soil pawh hian pawisa an ngah hle mai a, NABARD atangin rubber chinna tur a tan pawh cheng vaibelchhe thum sing ruk sang hnih an nei a, chu bakah state matching share te nen phei chuan vaibelchhe li leh tih an nei a ni a, Tin, RKVY atang hian productivity atan cheng nuai sang khat an nei a, khatiang khawp khan an ngah a, Maicham leh Varva te pawh khi min rawn cover ve dawn ni te pawhin ka hria a. Kan hriat ang in NLUP kan han launch ta a, chutiangah chuan inthuah hi a awm thei ta teuh teuh mai a ni. Lehlamah chuan rubber chin te hi a tha em em mai a, chin pawh hi an chak a, a variety te hi eng eng emaw hming thar te hi an han vuah a, P.C. sorkar laia rubber chingute kha chu vawiiin a rubber production kha a tha em em mai a ni. Chuvang chuan P.C. sorkar kha alo va tha awm em em tih hi rilru ah a lo thar a, khutiang aia variety tha khu chaw chhuak thei ula chuanin kan ram ah hian rubber production pawh hi a tam thei ang tih ka ring a. Chutiang chuan thahnem ngaih thu ah department hrang hrangte sawi a chakawm hle a. R.D. khan engatinge maw ni aw ka tih chu hetah khan performance budget work programme a nei ta miah lo mai kha, a rawn tel thei lo kha R.D. Department te chu Department ropui leh tha ber, a changtu Minister lah kan Minister zinga tha ber ni si kha engatinge tih kha kan zawt tel bawka ni. Pu Deputy Speaker, hun min pek belh avangin ka lawm e.

DEPUTY SPEAKER : Kan khilai hnem khawp mai che, in party that zia te i rawn sawi a. Pu K. Lianzuala nichin khan a hauh tawhin ka hria a, ilo sawm ang.

Pu K. LIANZUALA : Pu Deputy Speaker, ka lawm e, a hmasa a kan sawi duh chu keini Zokhua lam MLA te tana thil lawm awm tak, kan Speaker leh nang Deputy Speaker te zarah kan bial chhunga ruang han thawna tur motor min buatsaih sak a a lawmawm ka ti

a. Tin, kei phei chu kan bial kan vanduai a, tun, session chhung hian ruang vawi hnih kan in thawn tawh a. A hmang hmasa ber ka ni nghe nghe a ni. I chungah ka lawm e. Tin, kan works programme ah hian 2012-2013 kan en hian Rural Development leh GAD hi defaulter department a rawn ti a, a paw khawp mai, chu chu ka'n sawi lang hmasa duh a, an tel ve lo a ni. Demand 16-na Home leh Prison-ah hian han kal hmasa ila. Home Department hi a pawimawh hle a, kan sorkar-ah pawh kan chhuanvawr tak mai Minister viak tha leh fel tak maiin a enkawl a. Kan ramah tunhmaa harsatna kan neih thin tam tak, dan leh thupek chungchangah te, a ni hunah hian kan neilo viauin ka hria a. Engemaw a awm pawhin fel takin chinfel a ni leh thin a, a chhuanawm hlein ka hria a. Kan Demand kan en chuan Home Department atang hian thil tam tak hmuh tur a awmin ka hria a. Tin, Pu Dy. Speaker, ka sawi duh chu Home Department hnuaiah ka bial Chhingchhipah khian Sainik School sorkarin a din a, hun kal tawhah khan, kum 10 chhung hun hma lamah khan an lo khal dai hman deuh a ni, thudik tak a ni a. Ama'rawhchu tunah sorkar tharin kan House Leader zahawm tak kaihhruaina hnuaiah tunah hian hmalak a ni a. Sorkar tirhte January 23 khan kan C.M zahawm tak nen a hmunah kan kal chho dun a, vawiin ah chuan a takin a thleng chho mek a ni. Kan ram ro hlu tur pawimawh tak, kan thalaite kan mithiamte chherchhuahna hmun tur, kan rual awna India rama kan zu lan ve na tur, Sipai Officer te leh thildang tam takah a ni ang e, chutiang hmun chu tunah khian din a lo ni ta a. Ni 12 khan a hmunah ka han tlawh a, hna pawh an lo thawk nasa viau tawh a. A thawk tute hi Prasad and Company Ltd, Hyderabad an ni a. An hnuaiah hian Hindustan Prafab Ltd. in (approval firm an ni a) an thawk mek a ni. Khawl ropui tak tak te an dah a, hna an thawk viau tawh a ni, a lawmawm khawpin ka hria a. Khitiang kan ram rohlu tur pawimawh tak mai kan bial chhunga a awm khi lawmawm ka ti a. Pu Dy. Speaker, ka sawi duh chu khitiang hmun a lo thlen theihna chhan ah khian vawiin a kan sorkar a kan hotupa, kan leader zahawm tak Pu Lal Thanhawla a ni liau liau tih hi he House ah hian han sawi ka duh a. Tin, khitiang a thlen theihna atana la pawimawh leh chu Mizoram ina kan buaipui em em compensation kan tih beisei ve miah lovin chhungkaw 45 zetin an huan lo ram kum tam tak an lo enkawl tawh kha a thlawnin an pe thei a ni. Hetiang hmakhawthlir thui tak nei khua an lo ni khi an chhuanawm ka ti a, he House kalflang hian an chungah pawh lawmthu ka sawi duh a.

Tichuan tunah khian hna an thawk chho mek a, nimpiniah lama ka zawhna ah khan starred question a nia a chhuak hman ta lo hlauh a, unstarred ah leh a ni a. Chuta chhanna ah chuan DONER atang hian sanction pawisa tam tak hmuh a nih tawh thu hrilh ka ni a. Tahchuan nuai 1787.33 hi state sorkarah chhunluh a ni tawh a ni. Chu chu ni 12 a a hmuna ka han kal in an Manager te nen kan inkawma an lo sawi chu an hnathawh khi a kal tluang viau a, hnathawktu pawh 60 chuang zet an awm a, khawl chi hrang hrang nen pawisaah harsatna thu an lo sawi a. Heti zat hi sorkarah a lut tawh a nih chuan PWD ah nge khawnge chu ka hre lova, a contractor te hnenah hian engzatnge pek (release) a nih tawh tih hi kan Minister zahawm tak hian min hrilh theih chuan a lawmawm khawp ang tih ka ring a ni. Khi hmun khi a pawimawh dawn chauh a ni a, tin, khi khawtlanga mi inphalten an pekna thilnung a a thianghlim a a lawmawm rualin an inpekna ah khian sorkarin tih ve tur a neiin ka hria a, chu chu ka sawi duhlai pakhat chu a ni. Tuikum lui atangin tui pump tur a ni a khi Sainik school tan khian. Tichuan Chhingchhip khua khi khawlian tak school tha awmna a ni a, tui an harsa em em a ni. An zarzo ve thei sela an inpekna avang te pawn an zarzo thei sela, an tui pump chu khawchhung mit ten a zar an zo ve theihna tur hian... sorkar hian hma a lak sak thei em tih hi ka'n zawhna a ni a. Tin, hun lo la kal zel turah harsatna thil lo thleng thei awmin ka hre bawk a. Hnam dangin an thawk a, tikhian mi za dawn lai an thawk a, churang chuan a khaw chhunga Sainik school committee an din ve te khian Sorkar an tawiam tha hlein ka hria a. Sorkar hian zuk pawmpuina approval chu a ni chiah loh a nih pawn nei thei se a thain ka ring a, a chhan chu nakin zelah sorkar anga

thiltih theih lo, khawchhung miina sawi rem tur thil tam tak awm dawnin ka ring a. Chu chu sorkar hian 'Home Department' hian kawng min zawn sak theih dan a awm em ? an pawm pui theih dan a awm em tih kha kan sawilang duh a ni.

Tin, District Jail hi ka bial Chhiahtlangah khian a awm a, Demand lamahte kan hmuh ang khan, peih thawkhat, hawn mai theih tur tein a awm a, a lawmawm hlein ka hria a, chu chu lawmthu ka'n sawi duh bawk a. Tichuan, Demand no. 35 naah khan han kal ta ila, Fisheries Department hi a pawimawh hle a, ei tur tha chaw tha min pekna tur kawng pawimawh tak pawh a ni Sangha, chawtha min pekna tur a ni. Mahse, Pu Deputy Speaker, Fisheries Department hian tanpuina leh Sangha note ah te pawh aniang khawthlang lam hi an hawi deuh emawm ni chu aw! kan ti keini Zokhaw lam chuan. Lengpui leh a chhehvel ah khuan Sangha dil a tam a, a neitu te lah hi kan mi neinung deuh te, kan mi hausu deuh te niin ka hria a. A tak taka titu Zokhaw lamah hian an tam ve hle mai a, heng lam hi min hawisan niin kan inhre deuh tlat hi a pawh ka ti a, hengte pawh hi enfiah a tha awm mange ka ti a.

Tichuan hun hi a tlem si a, Pu Dy. Speaker, Demand No. 7 naah khan han kal ve leh lawk ila Excise & Narcotic ah hian. A changtu Minister zahawm tak hi khi lam bialtu pawh a ni a, kan hre theuh ang a, Zawlaidi te kan ti a, tunah hian enge ni Zo uain an ti nge ni ka hre lova. Chanchinbuah te vawi tam tak a lang tawh thin a, harsatna tam tak a awm a, mahse, ka'n sawi duh laia chu Pu Dy Speaker, Vendor-te hian Uain zawrh chhawn tur an han lak dawn hian duh an thlang hlei thei lo tlat mai hi a vanduai thlak hlein ka hria a. Hnahlan a mi zawk lak an duh pawn Champhai lamah khi lai Department hotute nge ka hre lova an lak luih tir tlat mai a ni. Hei hi a leitu chuan a duh tak, a leina tur hmun a mi a duh tak lei tur ni awm tak a nih laiin lei luih tir deuh te niawm takin kan lo hria a. Hengte pawh hi enfiah a tha hlein ka hria a.

Demand No. 33 naah khan han kal leh ila Soil Department hi. Nichina ka hma ami sawi ang khan a pawimawh a, department upa tak pawh a ni a, nichinah Minister zahawm takin zawhna a chhanna ang khan Hmunphiah ah hian tunah NLUP nen an han tangkawp a, Serchhip District in a hlawhtlinna tam tak an hmu tawh a. Han sawilan ka'n duh chu mimal hming, mi hlawhtling sawilan hi a nuam ka ti a. Pi Khawvelthangi, Serchhip chuan 2011-12 ah hian Hmunphiah ah hian cheng nuaikhat leh singnga dawn a lei thei tawh a ni. Hei hi NLUP hmalakna ni bawk Soil Department hmalakna ni bawk a ni. Tin, Pu Tlanghmingthanga, Piler khua hian Coffee a thar tam em em bawk a ni. 2010-11 chhung khan Quintal 20 zet a thar thei a, a lawmawm ka ti a. Soil Department hi Department te ang hian kan hmu a, a hma lak hi kan ram tan hian a pawimawh hlein ka hria a, chu chu han sawirik loh chi niin ka hre lo a ni. Hun a zo mai dawn si a, a la tam hle mai. Engpawh nisela huntha tak min pe a ka lawm e.

DEPUTY SPEAKER : Tunge han sawi leh tur kha? Nichina ban phar kha, Pu R.Lalthangliana ilo sawm ang.

Dr. R.LALTHANGLIANA : Pu Dy Speaker, ka lawm e. Vawiin chu dam deuha han sawi kan chak deuh hlek a. Kan Demand hi a pawimawh khawp mai a, Rural Development te leh Land Revenue te hi tlema han thlurbing ka duh deuh hlek a. Tin, Home lampang tawi te te han sawi ka tum ang a. Demand hi a tam ang reng viau mai a, Pu Dy.Speaker, chuang chuan kan pawt kual nawk nawk tawh mai ang chu.

A hmasa bera kan tarlan lawk duh chu SAD ah hian Demand 11-na, capital complex saw sawrkar hmasa hunlai khan kan inbun fel a, a buaithlakna lai chu a hmun saw a va kilkhawr si a, staff tam tak, a bik takin motor mahnia nei ve thei lo te hian kalnaah hian harsatna an tawk thin niin ka hria a, hei hi ngaihpawimawh sak a, regular deuh hleka an bus service dan hi chhunzawm/ngaihtuah nisela tih kha ka tarlang duh mai a ni. Hlawh tlem te te, harsatna tawh, hmun hla tak tak atanga kal te an nihna lai kha ka sawi duh a.

Tin, Fisheries hi Demand 35-na a ni a, sangha chi hi tihian ti tawh ila ka ti khawp mai a, kan Minister-in min lo ngaihtlak sak deuh sela, sangha chingtute ti mai ila, sangha dil neitute hi a leina hi pe mai ila, tu ten emaw kan supply vak vak hian thi leh eng emaw kimlo tih te, hetiang thil hi a tam em em mai a, tih dan hi thlak theih dan a awm lawm maw ni le. A dil neitute hi pe mai ila, an ni khan an duh zawng sangha chi kha lei ta mai sela, mahni dilah chuan sangha chi tha chu kan dah ngeiin ka ring a, kha kha a hlawhtlinna tur chi khat pawimawh tak maiah kan ngai deuh a. A chhan chu sangha chi ah hian thi leh duhthusam loh tam tak a awm a; tin, a zat chungchangah pawh an zuk suak tawp mai a, rin ai hian eng emaw thil hi fello a awm thei niin ka hria a, chu chu ka ngaipawimawh khawp mai. Tin, chumi piah lamah chuan kan fish seed hi keimahni hian Fishery department hian kan nei ve thei tak tak dawn ta em tih hi ka zawt duh a, neih ve mai te hi a tha in ka hria a. Tin, sangha piah lamah hian a huam tel thei tho em ka hrela a, tukin zingah mi pakhat alo kal a kan zawt a, prawn, kaikuang lian chi hi a to khawp mai a, phaiyah phei chuan kg 1 hi cheng 500 – 700 te pawh a ni awm e, Kolkata vel angah te hian. Mizoramah hian a chi kan lo nei miah lo mai a. A buaithlak em em chu Kolkatta atangin oxygen ah kan khung a, kan thlawh chhoh pui a, thlawhna tum hnu lawka dah te kha alo ngai a, a buaithlak khawp mai a. Helaiyah hian sangha aia man to fe, a let thum vela kan hralh theih tur ang chi a ni a, hei hi uar deuh (fish family tho ah kan ngai deuh hlek a) a tha awm mang e aw, tih kha kan Minister beng hriatah kan sawi duh hrim hrim a ni.

Prison ah hian han kai leh ta dawrh ila, kan bialah hian Jail kan nei ve a, sazai jail kan ti mai a, sazai kawh, Lunglei ah sawn. Ka tlawh zeuh zeuh a tun hma khan, quarter hi an nei mumal lo khawp mai a, a buaithlak em em mai a, Pawisa kumin ah kan ngah dawn kan ti bawh a, a theih hram chuan sawlaiah sawn quarter tam tawh min sak sak ve sela tih hi ka duh khawp mai a. Tin, chumi rual chuan a main building hi, a zatve deuh chauh hi tunah hian an zo niin ka hria a, hei pawh hi min zawh sak law law ta sela. A intake hi rin aiin Lunglei angah chuan a tam tham ve ang reng khawp mai a, Jail tang an tam a, churangchuan he harsatna hi kan tawh mek a ni tih kan sawi duh a, min ngaih pawimawh sak theih chuan a lawmawm khawpin ka ring.

Tin, Home ah hian kan kal leh lawk duh deuh a, helaiyah hian kan police te hi an chhuanawm khawp thin mai a. Amaherawhchu an chhuanawm ai hian Award leh Chawimawina kan siam dan hi tun ai hian tih danglam dan deuh te pawh hi a awm lawm maw ni le. Battalion khat chhungah te pawh hian Award eng emaw te pawh hi siam ta hial ila, zau lutuk a Mizoram pumpui huap han tih vel hi a tha tho a, kan ti tho ang a, a piah lamah hian tlema an mahni ah pawh incentive ti mai ila, fuihna leh eng emaw tihphurna tur ang chi hi siam thei ila, nasa lehzualin an hmalaknaah hian kawng ro a sut ka beisei deuh hlek a. Chu chu wawin ah hian ka han sawi leh lawk duh a.

Tin, hlawh chungchang a ni thova, amaherawhchu Home han sawi khan a relevant thovin ka hria a. Kan police, hna hnuaihning zawh han thawh chi, Constable atanga kan Havildar te hi, hmanni khan ka sawi zawh tawh a, an dinhmun a tha vak lo a ni, tun kan

6th Pay chho velah hian. Chuvang chuan, hei hi ennnawn tur zingah hian ka ngaih pawimawh em em bik pakhat ka han tarlan sak duh deuh a ni a. 1960 vela an mahni zawlpui hi an pha lo lutuk deuh niin a lang a, Chuvangin hei hi ngaih pawimawh sak thain ka hria a, ka han tarlang duh deuh a ni.

Tin, tlem lai deuh khan House-ah hian kan sawi thin a. Kan police te Life Insurance Corporation-ah an life insure nise tih kha, engnge maw kan thlen chin tak le? A chhan chu, anni hi hmun hlauhawm, raltia hnathawkte an nih avang hian, kha kha eng ang chiahin nge sorkar hian hma a lak tak tih kha ka han sawi duh a ni.

Tin, a thu hrim hrimin, kan police housing hi hma kan sawn hlei theilo khawp mai a. Sorkar hmasa ah pawh khan Pu Dy. Speaker, theih tawp chuan tan kha kan la ve a, mahse, Pu Dy. Speaker, Batallion te a lo pung zel a, kan housing hi a la kham khawp awmlo hle mai a. Saw'ng kan bial ang ah te pawh, A.T. tlang kan ti mai a tunhma in, kan bial chhungah sawn police quarter te kan nei a, tih that ngai saw kan ngah khawp mai a. A bik takin mahni bial lam hawi zawng deuh hlekin ngaihtuahna ka nei ve deuh a, min lo hriatsak ka duh a ni.

Tin, kan police mawl te te kan han tih ang chi, a hnuai lam pang PSO te pawh kan kawl a, hna hnuai lampang thawk ho hi, an TA/DA tang rei lutuk hi Pu Dy. Speaker, ka sawi tawh a hmanah, a la sawt thei vak lova. Hmanni lawka ka zawh chuan mi pakhat, kum 2 deuh thaw a ni tawh a, hei kan la la thei lo, te a ti a. A fello khawp mai a, keini MLA te chuan kan TA/DA hi kar khat deuh thaw ah min lehlan sak a, a lawmawm a. Amaherawhchu, khami rual khan, anni hi kan hnathawktute an ni a, an TA/DA rei lutuk mai kan han hren tan sak hi, sum awm loh vang nge ni ang a, helai hi a tihdan kalphung danglam deuh te pawh hi siam a tha lawm maw ni le, an khawngaih thlak em mai ka ti deuh va. Chuvang chuan, ngaih pawimawhah min neih sak ka duh a ni.

Hei, bial dang hian, kan bialah Police Out Post an ti a, Thingsaiah te pawh hawn mai tura an ngaih laiin, kan bial lam chu kan hrih a hai deuh a, ka han sawi nawn leh duh a ni, kan Minister hriat atan. Khu mi Buarpui khu, khawthlang lamah chuan kan khaw pawimawh tak a ni a, Lunglei lam atanga kawng lo kal PMGSY kawng in a rawn pawh chiah a nih bakah, hetah Bunghmun kawng atanga rawn pawh a ni a. Tin, Aizawl lam atanga lo lut kawngin a pawh, Tri-junction pawimawh deuh mai a ni a. Helai hian Police Out Post hi awm ve thei se kan duh khawp mai a. Buarpui hi an vanduai angreng a, an thil neih hi nei mai tura kan ngaih hi kan chhuh thei angreng khawp mai a. Power department-in hmanah nei mai tura kan ngaih tawh hmun dangah min sawn sak tawh bawk a. Tin, tlem lai deuhin PWD Sub-division awm ve sela tiin sorkar hmasa pawhin thui tak kan lo kalpui tawh, tun sorkara kan han changlo leh te kha a hrehawm kan ti deuh a. Chuvang chuan, na vak lovin Minister beng hriatah ka han sawi leh a ni. Hei hi chu a harsa lutuk dawn em maw ni le, a pawimawhna avang zawk khan? Kan bial lam anih vang hrim hrim ni lovin, khu lai khu chu strategic pawimawh niin ka hria a, thui tak khulaia kan dah chuan a hlawhtling turah ka ngai a. Chuvang chuan, hei hi min lo chhinchhiah sak theih ka duh khawp mai.

Chuan, hei, kan MLA zahawm tak Pu B. Lalhlengliana hi tun Session chhung hian damlohna/harsatna avangin, a hnar te an zai a, a lo kal hlei thei lova. Unstarred Question No. 28-ah khan, kum 2009, January Ni 1 atanga 2012 inkar ah MPRO engzatnge lak an nih, hming leh address te kha kan Home Minister hian ziakin a chhanna a rawn pe a. Eng emaw zat hi advertisement pek chhuah loh, interview leh formality awm lem loa lak hi kan nei nual mai a. Hei hi a tul ta viau in a hmanhmawh thlak ta viau tih te pawh hi kan

Minister hian min hrilhfhah ta sela, a lo awm viau anih chuan a tha a. Amaherawhchu a theih hram chuan heng Force kan lak dawn hian formality, interview te leh khatiang paltlang lo lutuk a kan han tih bawrh bawrh hian thil fello tam tak a karah hian a awm thei in ka hria. Chuvang chuan hei hi kan sawi leh duh pawimawh ka tih a ni.

Tichuan, Demand No.37 Co-operation-ah hian thil pahnih khat lek kan Minister hriat atan han sawiduh ka nei a. Pakhatnaah chuan Co-operation Department hi tunah chuan ka hre chiah lova. Tunhma chuan kan kal fuh lohna pakhat ni a ka hriat chu hun hmasa lamah pawh khan Registrar ho hi kan thlak kual zing ve lutuk mai a. Department head hetiang inthlak kual nasa lutuk hian harsatna min siamsak emaw chu aw ka ti a, chu chu thil pakhat niin ka hria a. Tin, chumi rual chuan kan sawi leh duh chu Pu Dy.Speaker, Co-operative Societies

Rules, 2012 hi waviin thleng hian kan la peih lo niin ka hria a, hei hi a fello ka ti a. Tin, Co-operative Development Council waviin thlenga kan la din lo te hi en a tulin ka hria a. Chumi bakah chuan an District Office-ah hian Administration keng tute hi State dangah hi chuan ARCS mai ni lovin Deputy Registrar hi anni in ka hria a, hei hi tih ve a tha lawm ni. Tin, Societies te fund kan pek hi han din chan leh bul han tan na tham a ni lo lutuk hi engnge ni a chhan leh vang tih te hi en tulin ka hria a, chungte chu kan tarlang duh lawk a ni.

Tin, Demand No.6 Land Revenue & Settlement-ah hian District tinah Asst. Surveyor Officer te dah tur khan kan han ti thin a. Hmun tam takah chuan kan han dah ta niin ka hria a. Amaherawh chu pawimawh deuh mai chu Land Revenue hian Motor hi an lei lohna a rei tawh khawp mai a. An hna nature hi moveable a nih hrim hrim avang hian harsatna lian tak mai an tawh in ka hria a, ka lak lai pawh khan a ni tho a, hei hi ngaih pawimawh sak tha in ka hria a. Tin, Dept., reorganize tura ruahmanna kal chho mek kha waviin thleng hian tih puitlin loh niin ka hria a, chu chu kan sawi leh duh a. Tin, Staff an mamawh tam ber hi chu Surveyor a ni a. Tunah hian an dinhmun hi a thalo ang reng khawp mai a. Mi 200 pawh tling mang lo staff an nei a ni a. Chuvang chuan hei hi ngaih pawimawhah neihsak a tha hlein ka hria a. Khumi a Directorate hrim hrim leh District office-ah te pawh a ni vek mai a. Hei hi waviinah hian ngaih pawimawh thain ka hria a. Ram pum pui enkawltu an ni a, dem te pawh hi an hlawh viau thin lai hian, a tak taka an Department hnathawkte hnathawh en hi chuan thil han tihsual rem rumte pawh hi thil awl ve tak a nihna lai te pawh awmin ka hria a kan sawi lawk duh a ni.

Pu Dy.Speaker, minute hnih khat lek ka sawi zo tep. Excise-ah hian ka sawi duh chu post ruak tam tak an neih lai hian waviin hian kan la hnawh khat hlei thei lova. Ka hriatsual loh chuan 80 bawr vel constable post te, driver te an nei niin ka hria a. Hei hi an mamawh khawp mai a, an strength hi 470 bawr vel niin ka hria a. Chutih lai chuan zan pawh sawi lo a duty kal hi an ni a hmun tam tak ah. Khatianga vak kual, emergency hna tam tak a nih lai hian dah belh, pek belh dan hi awm thei ngei sela. Tin, motor chungchangah pawh hian kum 14 bawr vel chu motor thar hi an lei lo tawh hrim hrimin ka hria a. Amaherawhchu, Govt. of India atang hian engemaw ti tiin Narcotic Control Bureau lam atangte in pek an ni a, tih loah chuan State sorkar hi kan insengso lo lutuk ve deuhin ka hria a. Chuvang chuan hei hi ngaih pawimawhah neih thain ka hria.

A tawp berah chuan Demand No.33-na Soil hi han tihrik zawk ka duh a. Rubber Plantation hi uar a thain ka ring a. Department pawh an phur tan viauin ka hria a. RKVY atang te leh IWMP atang te. Tin, RD tangka hi State tam takah chuan heng atan hian an hmang thiam khawp mai a. Mizoramah pawh hian hei hi hman a thain ka hria a. Tin, kan mamawh em em luipui tui a tlem avanga water harvesting scheme hi an kalpui chak theihna

tur atan ruahmanna siam sak an tha hle a. Chu mi an tih theihna tur atana thil pawimawh deuh deuh an neih Engineering Department ve deuh an nihna lai a awm a. Hengah hian Agriculture-te, Civil Engineer te an mamawh a ni. Anti ocean, flood control, ground water researching leh lei min tih te, khang zawng zawng kha anmahni kuta kan dah thiam a, hna thawk thei tura kan siam hi a pawimawhin ka hria a.

Tichuan, a tawp berah chuan RD a ka'n sawi duh lawk chu NREGS kan tih hi complaint tamna ber pakhat chu material component-ah hian contract hna ang deuha Village Council-ten thawh tur anga dah hi a tam a. Chulaiah chuan ruling party hian a bik takin opposition V/C te thlan ni si lova va chuh buai hi a tam khawp mai a. Hei hi zep thu a awm lo. Chuvang chuan, hei hi a fello ka ti khawp mai a. A nihna ang dik tak hian thil hi chu kal mai sela a tha mai tih kha kan Minister in hria sela ka duh a. A hre tawh tho pawhin ka ring a. VDC te pawh an inthlang a, hengah pawh hian thil fel tawk lo thil tam tak kan hnenah complaint lo lut a awm a. Thil hi chu politicalise kan tumna lutukah hian fello zawk hi a thleng thei a. Chuvang chuan, a nihna dik tak dan ang hian kal tawp mai ila a felin ka hria a. Chuvang chuan, mipui tangka a nihna ang hian tangkai taka awmze nei taka kan hman thain ka hria a ni. Pu Deputy Speaker, Chawhnu lamah chhuah zawkna tur ka neih avangin hun min pe a, ka lawm khawp mai. Ka lawm e.

* Speech not corrected.

DEPUTY SPEAKER : Pu Hmingdailova kan sawm ang a. Chu mi zawhah chuan Pu K. Liantlinga kan sawm leh dawn nia. Chu chu chawhma hian a daih tawk vel ang. Tunah Pu Hmingdailova i lo sawm ang.

Pu HMINGDAILOVA KHIANGTE : Pu Dy. Speaker, ka lawm e. Demand No. 6 Land Revenue, Minister zahawm tak Pu J.H.Rothuama Department atang hian tan ila – Tawite-a ka'n sawi duh chu Mizoramah hian ram tel lovin kan awm thei lova, inhmun pawh kan duh vek a huan te kan duh a. Amaherawhchu, kan buaina ber hi land dispute a ni a. He land dispute hi man made dispute a ni a. Pu Dy. Speaker, hei hi a tihfel theih dan zawn ngaiin ka hria a, a tlai lutuk hma hian. Mihringin a siam a nih avangin mihring bawkin a siamtha thei tur niin ka ring. Compensation buatsaih turte a awm hian kan han buatsaih a, a tawp lam chu fello a tam hle a ni. Chutiang te pawh chu kan Minister zahawm tak a changtu hian Department chhungah hian discipline te leh eng eng emaw, punishment awm thei thleng a rorel dan te pawh a zawn thiam ka ring a, ka'n sawi ve a ni e.

Tin, Demand No. 33 Soil & Water Conservation hi water conservation mai ni lovin, forest conservation pawh a ni pah fawm a. He Department ah hian coffee te, a bik takin rubber te hi a tangkai em em a chutiang atan chuan. Hmunphiah hi a tangkaina lam a awm bawk a. Vawiinah NLUP ah kan thlang nasa a. Tin, a hlawkna pawh mi tam tak in kan seng nghal a, a lawmawm hle a ni. Hmunphiah hmunah hian ngaw hi chu a awm hleithei lova, kan thiat dawn te pawh a ang viau in ka hria a. Helam erawh hi chu ka sawi tum chiah lam ni lo mahse ka'n sawi kai ve lawk a ni. Chuvangin, Department hian helamah hian hna an thawk tha hle a ni tih kha ka'n sawi duh a.

Tin, Pu Dy. Speaker, Demand No. 37-na Co-operation ah hian tawite sawi duh ka nei a. Kan hriat tawh ang khan phai ram lamah hian Co-operation hi Society tha tak tak siamin an hlawk phah hle a ni. Kan ramah hian kan thiam lova, kan la pick-up tawk lovin ka hria a. Amaerawhchu, a nei chhun chhun te erawh hi chuan an tifuhin ka hria a. Ka hriatchin bak sawi tur ka hre lova, ka bialah hian a khawlian deuhah khu chuan an awm vek a, Co-operative Society an ti tha phian bawk a. Tin, kan sawive duhna chu a khua atan hian thil man

control tu an nih avang hian Co-operative Society dawr awm hi a tha hle a. Kan Minister leh a Department te hian lo uar leh zel sela a tha awmin ka hria tih kha kan sawi duh a.

Tin, Pu Deputy Speaker, Demand No. 38-na Rural Department hi kan sawiseng dawn lova, Mizoram enkawltu a ni ber mai a. NREGS kan nitin deuh thaw a kan inhlawhfakna min pe tu a ni a. Thingtlang atan chuan kan life-line hi a ni ringawt mai a ni. Chutih rual chuan, material component a rawn chhuak ve a, hei erawh hi chu V.C. leh Departmental in an thawk deuh va, kan rual tawko deuh emawni chu aw, vantlang mipui hi a huapzo lo deuh em aw tih hi kan Minister zahawm tak hian min en sak se a tha ngawtin ka hria a. Tin, chulo lehah chuan mi rethei harsa zualten rangva te he department atang hian an dawng thin a. An lawm em em a, an that phah hle a ni tih kan hria. Chutih rualin IAY te pawh a awm a, in thar sakna te, a repair na te pawh kan chang hi a lawmawm hle a ni. Chulo lehah chuan, khawtina Community Hall kan tih chi hrang hrang hi he R.D. Department a Social Education atanga pek deuh vek an ni a. Ka bialah hian mangan pui khua 2 (pahnih) ka nei a, Hmar Chaltlang. Congress sorkar hmasak tuma an rel tawh kha a la in rel reng a. Theihtawp kan chhuah a, kan Minister zahawm takin min ngai pawimawh a, tunah hian kan zawm leh a. Instalment 2-na kan lak hi chuan a chung kan khuh thei mai awm mange ka ti deuh a. Chulo leh chu, Khamrang ah hian a la awmlo hrim hrim a. Nikum khan a awm dawn e, kan sa thei dawn e an ti a. Ama'rawhchu, sum kan indaihlo deuh, awm leh lo an ti a. Kan Minister zahawm tak a changtu hi kan request duh chu 'a awm leh dawn e' tih kha min tiam thei sela ka lawm khawp ang tih ka sawi duh a. Tin, Kawnpui ah khuan Kawnpui Venglai ah khuan Town Hall an rel uaih mai a, a lian khawp mai a. Rei tak an sa a, a chung chu an chih tawh a. Ama'rawhchu, a tukverh te, a plastering te, a chhuat te, thawh tur ala tam mai a. Khu khu a finishing a ni na a, nuai 5 lam hi chu a ngaiin ka ring a. Hei hi kan Minister zahawm tak hian min hriat sak se ka duh hle a ni. Tin, vawikhat ka sawi tawh a CLP ah; Kolasib District tan chauh hian job card review hi a awm a. He job card review hian phunnawina a ti tam hle mai a, keini ten a dik leh dik lohna kan zu hre em em lo na chungin. Kan mi leh sa te an riat kual hle a, khawngaih takin hei hi min ennawn sak leh turin kan ngen bawk a ni kan Minister zahawm tak hi.

A dawt lehah chuan Law and Order Demand No.16-na. Nia kan sorkar in sorkar na a chan tirh atang khan law & order hi ngaihthat thlak takin a hmuh theih nghal a. Krismas kumthar niah halpuah ri dur dur te a awm lova. Damlo engemaw zat te phei chuan hre thei ngat ila an dam rei phah hialin ka ring a ni. Tin, chu bakah tun hnaiah te pawh law & order enkawltupa kan Minister zahawm tak leh a police ten hna an thawh that avangin ram leh hnam tibuaitu niawm te an han man zat zat mai a. Heng te hi a thlamuan thlak a ni tih kha kan sawi duh a ni. Tin, duhthawhna lam han sawi tel ila, 2008-a kan campaign lai khan police lak tih te, Home Guard lak tih te kha kan han tuipui khawp mai a, kan sawi hot ve viau mai a. Ama'rawhchu, waviin thleng hian kan la la lova. Kan Home Minister zahawm tak hian kan chhiar velo na a, a hriain ka ring a. IR Bn. 5 leh MAP Bn. 3-ah hian Constable leh a rank dang dang ah hian vacancies 500 zet hi chu a awm ka ring tawh a, hengte hi a hnawhkhah dan han ngaihtuah thei sela a lawmawm hle ang tih kha kan sawi leh duh bawk a. Tin, Mizoram Police Service officers-te hi han en hi chuan an that hmelin an lal hmel viau nain harsatna tam tak-te an nei ve a. Kum hnih kum thum kal tawh ah khan Fire & Emergency Service Director khu functional ah siam in, MPS officer senior Administrative Grade in a luah a, chu chu DIG a ni ang a, Secretariat lamah chuan Additional Secretary-te pawh an ni thei ang. Chutiang bawk chuan Mizoram Home Guard Commandant General hi functional ni lovin a awm a, police senior officer in an luah tho na chungin functional ah siam in Senior Administrative Grade MPS Officer hian luah thei sela harsatna a awmin ka ring lova, a awm

a nih chuan kan Minister zahawmtak hian a tih fel dan a hriat ka ring a, ka han rawt bawk a ni e.

Tin, pakhat leh ah chuan kan MPS Officer-te hi DSP atanga tan an ni hlawm a, DSP atanga tan hian clerical staff, police lam ni lo hi an tluk tlat lo mai a, Secretary thleng Mizoram sorkar-ah hian an kai mai a; mahse, kan DSP-te Gazetted Officer atanga tante hian an kai ve theilo hi a tawi zawngin, kan Home Minister zahawmtak hian min en that thei sela a lawmawm hle in ka ring. Chu chu ka sawi thiam dan ni sela.

Tin, mahni bial lam te pawh, ka thenawmpa tih dan tak ah, Look East kha Look North deulte paw'n han kal ila a tha in ka hria a, kan sawi kan sawi tawh a, Bukpui-ah sawn Out Post kan propose-na a rei tawh viau a, MRP lam kan mamawh a kan nei si lova an ti a, mahse, lak kha an ni tawh hlawm a, kan nei thei tawh ang a tih kha keini ngaihtuahdan chu a ni a. Sawlaiah sawn awm phei se la chuan hmana Saipum motor a an lo man kha chu Bukpui-ah hian kan man hman in ka ring a ni. Pu Dy.Speaker, ka zo tep e.

Tin, ka bial thlang deuh hlek mahse ka bial atanga thawm ri reng mai a awm a. Phaisen-ah khuan BOP kan nei a, mahse, electric light a awmlo va an mangang hle tih ka hria a, kan Home Minister zahawmtak hian min hriat sak thei se la. Chutiang bawkin Zophai BOP-ah khuan light chu an nei a, mahse, a kal kawngah khuan leilawn a chhe reng mai a, ration lakna velte hi a hautak thei khawp mai a, chungte chu min hriatsak thei se la a lawmawm hle in ka ring.

A tawp ber ah chuan, Fisheries, Demand No. 35-na hi tawite ka han sawi duh a. Fishery hi a pawimawh tan tawh a, mi sawi zawng zawng kan sawi seng lovang a, a pawimawh nia ka hriat ve chu a hunah sangha chi hi sem se la, a quality tha sem bawk sela tih hi a ni a. Tin, tuallai ti ti a dikte pawh a awm ang a diklo te pawh a awm ang, Sangha dil nei lo hnenah te hian tanpuina pekte hi a awm palh a nih chuan hengte hi chin tawh loh nise tih te pawh hi kan sawi tel duh a ni .

Tichuan vawiin a demand kan cover theih zawng zawng kha, cover theih loh pahnih pathum ka nei a, an vaite pawh khan vawiin niah demand lo lang ang hian Pu Dy.Speaker kan rawn support, hunte min pek belh avangin ka lawm hle a ni. Ka lawm e.

DEPUTY SPEAKER : Pu K.Liantlinga

Pu K.LIANTLINGA : Pu Deputy Speaker ka lawm e, hun hi nia minutes 7 chauh a ni a. (Deputy Speaker : Kan khilai hret dawn che nia) Vawiinah budget kan han luhchilh hlawm a ni a. Pu R. Lalzirliana Demand leh Pu J.H. Rothuama Demand-te kan sawi dawn a, hun tha tak kan nei a, a lawmawm hle a.

Engpawh nisela, a hmawr lam atang hian kan tan ang a Co-operation hi. Co-operation hi kuminah Grant-in-aid-ah hian State Level Society tan hian nuaih 268 dah a ni a; tin, State Primary Society atan hian nuaih 30 vel dah a ni a. Nikum lamah khan nuaih 390 an dah a kuminah a tlem ta a, hei nuaih za chuang zetin a tlem a ni Nikum khan Mizoram Co-operative Development Council din theihna turin Act Amendment kan siam a, Kha kha vawiin thleng mai hian kum khat hnuah pawh engmah a la tih loh avang hian Co-operative Society State level-te, District level-te leh Primary Society-hote chanvo tur kha vawiin hian a tlem niin ka hria. 20 crore rupees a ni a, India Sorkar khan crore 14300 a dah a, chutah chuan 20 crore rupees hmang ve thei turin min ruahman kha a ni a. Dan te kan siam a vawiin thlengin a

rules la peih loh a ni te pawh hi a pawl hle a ni. Tun ah hian 20 crore rupees atang khan han sem ilang chuan heti lek hi chu a ni dawn lova, kan tih tur tih loh hian thingtlang lamahte leh Co-operative Society hmasawna tur kha a dal nasa a ni. Kan Minister hian khalai kha min hrilhfiah se ka duh a, tun aia chak zawk hian tan la sela a tha in ka hria a, kha lai kha tlem te te in kan ti lang duh a ni.

Demand No. 33-na Soil & Water Conservation-ah hian in kan lut leh duh a. Performance Budget chungchang thu ah hian an ti tha hle in ka hria a, department lian lian hian an ti tha duh lo mai a, nakinah ka la sawi chho tho ang a, department te te hian tha tak takin an ti a, eng nge ni a pachal deuh chan hi chuan mipui leh Assembly pawh hi an pawisa lo deuh emaw ni chu aw tih te a ngaihtuah theih a. An performance budget-ah chuan a tha khawp a, Hillside Terracing an tih te, water harvesting-ah te leh nursery chungchang thu ah te nikum a an hman te a tha a. Tin, nikumah pawh khan 26 crore rupees an neih ah pawh khan Rubber Plantation-ah family 657 te, hmunphiah-ah family 3872 te, coffee-ah family 872 te, a vaiin family 5401 an han enkawl chhohna an performance budget a kan han chhiar a kan han hmuh te kha a lawmawm a, an achievement a ni. Tin, an pawisa thar pawh kha metric ton 760 kan thar chhuak e an ti a, cheng 2.28 crore man vel an thar chhuak a ni a. Chutiang chuan performance budget atanga kan en khan an hna thawh that te, an thawh leh tur te kan en thei a, hei hi department zawng zawng pawh hian budget speech kan neih ve tinah kan sawina ah sawi chhuah zel a tha in ka hria. Directorate lampang atang in performance budget leh work programme te hi tha tak a prepare thin ni sela a tha awm mang e aw ka ti a. Tin, kumin ah hian target paruk an nei a family 3139, a vai a belhkhawm chuan cheng nuaih 535, a ni a. On-going works ah khan family 1196 tih te a ni a, en a nuam em em mai a ni. Tin, sawi pawh a nuam a fak pawh a nuam a ni. Soil & Water Conservation Department kha a fakawm hle in ka hria.

Tin, nichinah khan kan han sawi tawh a, han luhchilh kan duh deuh chu hmunphiah chungchang kha a ni. Hmunphiah hi kg ah Rs. 50/- ten an hralh a, amaherawhchu, chhiah kha Forest-in a lak reng avangin la tawh lo sela. Tin, hmunphiah hi a chhe hma em em mai a, chuvang chuan a dah thatna tur kudam-te a ngai a, a khuh hulna turte ngaihtuah a ngai a. Tin, a phoro-na atan hian tha tak mai chu Israel High Tech Green House an tih ang chi te pawh hi supply thei ta sela, khatiang ang khan tha takin hmunphiahah hian kar lovah cheng vaibelchhe 20/30 hi kan thawk chhuak thei dawn tlat in a lang a ni. Chuvang chuan, uluk taka enkawl a, Minister leh Department lam te pawhin, chak zawka an enkawl a tul a, pawimawh in ka hria a. Tin, formal economy leh informal economy pawh hi thliar hrang thei sela a lawmawm hle ang.

Demand No. 7 Excise ah hian han luh chhoh leh ka duh a. Hei an Budget chu Rs. 20.25 crore ani a. Total Prohibition hi kan nei a, mahse zu hi a tam em em tho mai a, cheng vaibelchhe 20 sengin an han veng a, an veng hneh chuang lovin a lang a ni. Tichuan study group te din in Total Prohibition hi lift a ni dawn nge dawn lo tih te pawh an ngaihtuah in ka hria a, khang te pawh kha kan Minister hian an report te pawh kha min hrilh thei sela chu a lawmawm hle in ka ring a. Total Prohibition hi lift ta ila chuan cheng vaibelchhe 20 kan hman ral mai mai bakah hian cheng vaibelchhe 30/40 hi chu revenue kan hmu hial awm asin. Ngaihtuah chian hi chu a ngai khawp mai a tih hi ka'n sawi duh a. Kan ram ah hian zu chhia hi a tam em em mai a; tunah hian ngun taka ngaihtuah chuan, kan ramah hian zu lakluh na atan hian, kum tin cheng vaibelchhe 100 chuang hi chu kan hmang a ni. Silchar atangte

leh hmundang atang hian an phur lut nasa hle mai a. Zu hi manto tak takin kan lei reng mai a, chu ai chuan zawrh leh mai te pawh hi a tha em tih te pawh kha kan hotuten ngun takin ngaihtuah sela a tha in ka hria.

Tin, Champhai winery chung changah tax an tih san vak dawn khan Excise-a hotupa nen phone in darkar chanve vel kan inbia a, inti tlang thei chuang lovang a kan in ti a, chuan an ti tlang leh ta lova, sorkar pawh kha an in withdraw leh ta a. Ka sawi chian duh chu, formal economy leh informal economy hi kan thliar hrang lova, miin industry leh farm-te an han siam dek dek a, chhiah lo lak thuai thuai kan tum hi a dik tawk lova, thildang ah tax lakna tur hi chu kan ngaihtuah turah ka ngai a. Champhai leh Hnahlna Winery te khi tax la miah lovin kum 5 vel kal sela, an Industry-te hi han in todelh ve te te sela, chumi hnuah chauh chuan chhiah hi lak ni sela a thain ka hria a ni.

DEPUTY SPEAKER : Lo nghak lawk rawh aw. Khi kan chawhma hun a tawp a. Ani hi a hun kha tlem in a tanna kha a tlai deuh bawk a i sawi zawh tir lawk ang aw. Han sawi la, han zo dawn hnai rawh le.

Pu K. LIANTLINGA : Pu Dy. Speaker, ka lawm e. Thil pakhat chauh Secret Service ah hian nuai 5 leh tih chauh an nei a. Zu khap reh tum si chuan 5.5 lakhs chauh hi chuan Secret Service-te hi an in daih awm lo mang e tih te ka ngaihtuah a.

Tin, Demand 38 na ah kan lut chho ang a, Rural Development hi Department lian a ni a, Kan Home Minister, Rural Development Minister, party ah pawh Vice President a ni a, Amaherawhchu, a Department enkawl ah chuan work programme leh performance budget hi chu not submitted till 7th July, 2012 tih kha record a awm tawp ringawt mai a ni. Kha kha a pawiin ka hria a, a chhan chu tunah hian major works ah hian cheng vaibelchhe 40.72 an nei a, tin, grant in aid non-salary ah hian cheng vaibelchhe 60.12 an nei bawk a. Tin, BRGF a tel a, vaibelchhe 25.58 an nei a ni, work programme leh an performance Budget-ah engmah report lova an awm kha avaiin cheng vaibelchhe 105 vel hmang tur an ni a, work programme te chu an nei tur a ni, an siam lo anih chuan corruption a hnai em em tih na a ni. Corruption phoro tur chuan work programme leh performance Budget-te hi a pawimawh em em a ni. Kan Finance Minister ngei pawhin a budget speech ah khan BRGF ah te, BADP ah te bold letter in a rawn mark ngat ngat a, budget speech No. 60-naah khan awm a, performance budget leh work programme pawh nei lova vawiina department lianpui mai an awm hi a pawi hle in ka hria a ni.

Tin, Demand No. 35 Fisheries ah hi chuan performance budget leh work programme pawh a tha a, an budget pawh a pung tial tial. Hmanni a department te deuh te chu, an budget pawh a te tial tial ani lawm ni tih kha, a changtu a zir hianin a pung ve tial tial thovin ka hria. An budget hi crore 20 atangin crore 24.23 ah a pung chhova, a lawmawm a. Ka sawi duh em em mai chu - Zofishfed hian Central sorkar atangin nuai 30 vel an hmu a, hetiang grant-te hi private sector tihlenna tur anih avangin Central sorkar hian a ui lova. Mahse kan State hian sorkar harsatna siam chung in a release hram hram a. Ka sawi duh chu heng kan private sector te hi kan duhsak a ngai a, a aia tam pawh awm sela, department dangah te pawh awm sela, chu chuan kan ram hi a ti hmasawn dawn a, chu chu kan ngaihtuahnaah awm sela ka duh a ni.

Tin, Demand No. 16-na Home hi Pu Deputy Speaker, kan sawi leh lawk ang a, a rei tawh lovang a. Home Department hi an budget pawh a tam a, minor works ah te, other charges ah te cheng vaibelchhe 14.36 vel an nei a. Engpawh nisela ngaihtuah chian ngaia ka hriat chu, hmundang dangah police-te hi an duty a hmun. Tin, MPRO te pawh Assam ah te, Manipur-ah te Bengal-ah te. Tin, a police hrim hrimte pawh hi an duty na TA/DA hmu thei lova kum tam tak an awm thin hi ngaihtuah chian chu a ngaiin ka hria. Kan Home Minister te leh kan Finance Minister te hian heng TA/DA hi ngaihtuahin loh theih loh ah ngai sela, security leh thil dang zawng zawng ah kan mamawhte an ni a, tan la thei sela a tha awm mang e, tih te ka'n ngaihtuah a. Rilru na chung chung a mi kan duty tir chuan harsatna an tawh thei a. An rilru hrehawmna zawng zawng chhawk thei tur chuan kan Finance Minister hian theih tawp chhuah se, an TA/DA te hi pek ngei nise tih hi kan duh a. Pu Deputy Speaker, eng pawh ni sela, tunah hian Demand te hi chu pass tur a ni a. Amarawhchu, nakumah te kan la sawi leh dawn a. Kan sawi leh dawn kha chuan Performance budget te, Work programme te fel taka an tih kha ka beisei a. Chu chu Minister-in-charge pahnih te pawh ka'n ngen duh bawh a ni e. Ka lawm e.

DEPUTY SPEAKER : Awle, tunah chuan kan chawhma hun a tawp a, kan chawh ang a. Chawhnu dar 2 ah kan thukhawm leh dawn nia.

2.00 P.M

S P E A K E R : Sawihona kan tan leh tawh ang a, Pu R.L. Pianmawia.

Pu R.L. PIANMAWIA : Pu Speaker ka lawm e. A hmasain Mizoram Assembly in kan harsatna hre chung a mitthi phurhna tur in lei avangin lawmthu ka hrilh che a. A nei hmasa ka ni a Pialral Cabin tih ka phuah a. Assembly ina in lei ve hi Vanram Cabin tiin ka'n phuah sak che u a, min lo pawmsak theih chuan a lawmawm hle ang.

Kan Demand sawi turah hian No. 16-na Home ah hian lawmthu ka'n sawi duh a. Chutah lawmthu sawi zawhah kan duhna te hriattirna kan nei leh dawn a ni. Kum 2011-2012 chhungin Sakawrdai New Vervek leh Darlawn ah te quarter tha tak mai Type II min sak sak avangin lawmthu ka sawi a. Tin, 2012-2013 ruahmanna ah khan RCC a quarter sak tur pathum lai mai Sakawrdai ah khan min tihsak avangin lawmthu ka sawi a, in mi duhsakna ah lawmthu ka sawi tak meuh meuh a ni.

Tin, police modernisation ah sum tam tak in dah theih avang hian lawmawm ka ti hle a, Session hmasa lama ka lo sawi tawh thin Sakawrdai leh Darlawn te hmun fem a awm tan motor thar ka lo sawi tawh pawh kan Home Minister ngei khan min tiam tawh a, an la lei lo a nih ka ring a, hei hi a leina tur a nih te pawh kan ring a motor thar kan neih tawh ngei ka rin avangin lawmthu ka'n sawi duh bawh a ni. Tin, lawmthu kan sawi bakah hian BOP Zohmun Vaitin, New Vervek leh Darlawn ah te kan thawktu police te an awm a, heng an awmna hmun chhiat thu hi vawi tam tak ka rawn sawi lang tawh a, tuna ruahmanna langah chuan an tel ve hauh lo mai a. Hei hi min hriat reng sak ka duh a, a tak ram pawh chantir ngei ka duh tak meuh meuh a ni.

Tin, heng camp hmun hrang hrang ami te hi fur ruahtui tlakah hian Silpauline kan ngaihtuah sak hnem tawh viau mai a, an khawngaihthlak zia chu chuan a tilangin ka hria, Tin, kan police thingtlang a awm te hi a bik takin an petrol dawn a tlem tham em em a, khawpui-a officer te dawn let thum tal kan pe a nih loh chuan hnathawk turin kan duh si a, thawk chak turin kan duh a, chuvang chuan hei hi tih dan kawng awm thei hram se ka duh tak meuh meuh a ni. Thingtlang post harsatna officer lian a kan sawi lahin an harsatzia min hrilh a, sum kan hmu thei lova, kan nei thei lova salute bak hi chu kan hmu thei lo a ni an ti a. Chuvangin salute bak hmu thei tura kan police officer te pawh sawina tlak turin thuam that nise tha hlein ka hria a ni. Tin,

Outpost pawh keini bial tan chuan a pawimawh a ni tih hriat sa a ni a, Mauchar leh North Tinghmun atan dilna lehkha pawh ka siam tawh a, sipai indaih loh thu an sawi a. Chu chuan a entir taka chu police hi lakbelh a ngai tih a lantir in ka hria a. Chuvang chuan police lakbelh a heng hmun te hi Police awmna tur atana min ruahman sak turin kan dil duh che u a. Tin, kan police hmun daifema awm hote khi an Camp chhiat mai bakah electric eng tha lo karah an awm a. An dinhmunah inralring renga awm a ngai si, a theih chin chinah solar light min pe a, a lawmawm hle a. Amaherawhchu, ala bei tham hle in solar light hi tun aia changtlung zawka thuam that ni thei se a duhawm hlein ka hria.

Tin, Demand No. 35-na Fisheries Department chungchangah hian Fisheries Department hi an tangkai tehlul nen tun aia tangkai dan hi la awmin ka ring a. Ka bial khaw pakhat chuan tanpuina an pek hi chhungkhat atang hian vawi tam tak an dawng thei a ni. Entirnan chhungkhat ah pa ber hmingin a kal a, a dawt lehah nu ber hmingin, a leh pek ah puzawn hmingin. Chhungkhat khan an khawm an khawm mai a. Heng ang chi hi awm tawh lo sela, a dawng tlak chhungkaw dangah te pawh khan pek nise. N.Tinghmun ah khian Tingdil tha tak mai khawtlangin society ang a enkawlin an buaipui a. Sangha chi tum khat min pek tawh avangin lawmthu ka sawi a. Dil that tawh loh avangin khuah that a ni a, sangha chi kan mamawh leh tawh a. Chu chu min ngaihtuah sak ka duhin ka ngen a ni.

Tin, Demand No. 38 ah hian lawmthu sawi tur tam tak ka hria a. Rangva semna tur kum kal meka pawisa awm theih tawh loh hnu ah tun budget-a dah a ni hi lawmthu ka sawi duh a. Tin, Ni100 inhlawhna kan tih leh material component kan tih atang hian bial mite harsatna leh khawtlang mamawh tam tak min tih sak avangin lawmthu ka sawi tak meuh meuh a. Tin, Social Education atangin Community Hall, N. Tinghmun, Zohmun, Sakawrdai leh Sailutar ah te min sak sak a. Tin, RD atang bawh hian ka bial chhungah sikul hrang hrang primary leh middle sikul ah inthiarna 17 min siam sak avangin lawmthu ka sawi tak meuh meuh a ni.

Tun kum hlui kal taah khan North Serzawl, Ratu leh Lungsum ah te community hall sak a ni a, mahse work programme ah hian pawisa a awm ta lo mai a, a bul kan tan sak a, chhunzawmna tur a awm leh si loh chuan engtingge ni ang le, tun tuma sum dah loh pawhin RE-ah chuan dah ngei ngei hi tul in ka ring a, min hriat sak turin ka ngen duh che u a. Tin, housing for project staff atanga BDO office Darlawn ami sak tura pawisa dah a tawh ama'rawhchu zirtirtu te hlawh pek a ngaih tak si avang khan khami atang khan an pe ta a. Tin, Kepran Community Hall repairna tur nghakhlel taka an lo thlir ve chu pawh darh a lo ni ta bawh a. Chuvangin heng tihpuiltlinna tur hi min ngaihtuah sak hram loh chuan kan khua a har hle dawn tih kha kan sawi duh a.

Tin, BDO staff quarter tur tun sorkara kan RD Minister hnuaiiah kan hmu tawh a, a lawmawm hle in ka hria. Sorkar hmasa ah kha chuan sa miah lova bill lak a ni a, luah theih ngei building min sak sak avangin lawmthu ka sawi mawlh mawlh a ni. Tin, Darlawn hi UD & PA atanga IAY tih theih anih loh thu chhanna kan dawng a. Mirethei tam tak in sak sak ngai an awm vangin RD atang tala min thuam mawi loh chuan tih ngaihna a awm lova. Hei hi state level meeting ah te pawh ka sawi tawh thin a, kan secretariat lampang te pawh khan hei hi chu a bik takin min lo ngaihtuah sak teh u.

Tin, Demand No.6-na ah Sawleng hi Darlawn Town area ah tih tel a ni a, order pawh chhuak fel vek tawh kha a ni a, mahse survey an la ti ve lova. Khawngaih takin min tihsak thei se ka duh a ni.

Tin, Demand No.7 ah Secret Civil Service expenditure tur pawisa an dah kan en khan a ngai pat pat kha a ni a, thawk tha turin kan duh si a, budget ngai reng la dah kha chuan a tha lova, chuvang chuan hmasawn thei turin RE ah tal dah sak theih nise.

Soil deptt. ah hian budget pung ta hi lawmawm ka ti hle a, keini tan phei chuan a lawmawm leh zual a. A chhan chu tun kum thum kalta ah Darlawn soil range ah khian 5 Kg kha an han tih tir ve a, Kg 5 kha Darlawn range a hmasawna tur Soil deptt. hnathawh awmchhun a ni a, a bei tham em em a ni. Budget tharah hi chuan hmathar lakna tur in staff 4 lak na tur a awm a, Darlawn ah khian Range office a awm ve a, IV grade pakhat pawh an awm lova, amahin a awm tawp mai a. Chuvang chuan mi pali atanga pakhat hi chu an dah theih ngei pawh kan ring bawk a. Tin, ruahmanna tharah khan CSS atang leh RKVY atangin thingtlang mirethei te khaichhuah na tur scheme tam tak a awm tih kan hmu a, a lawmawm hlein ka hria. Tin, CSS atanga RVP emaw FPR tih atanga district 5 atana project 17 ruahmanna te pawh kha Aizawl district huamchhunga awm kan nih han hrereng turin ka chah duh che u a. Tin, Kepran ho hian rubber an lo ching tawh a, mahse a temperature in a zo lo tih a ni a. Hmanni lawka mithiam lo kal khan Mizoramah a theih vek tih a rawn sawi leh si a, helaia kanlo hriatna ai khan khulam hriatna kha a dik deuh turah ngai ila, chuvangin Zohmun leh Kepran ah te hian rubber chin theih na turin Soil Deptt. hian min ruahman sak ve thei se kan ngen a ni tih kha ka sawi duh a, ka lawm e.

S P E A K E R : Kerela a ka zu kal pawh khan a phai deuh chinah chauh chuan rubber hi an ching khawp mai. Awle, Pu R. Lalrinawma.

Pu R. LALRINAWMA : Pu Speaker ka lawm e. Genesis Bung 1 chang 1 ah chuan, “ A tirin Pathianin lei leh van a siam a tin, lei hi a chhia a, a ruak ngawt a ni a, tui thuk tak chung chu a thim mup a, Pathian thlarau chuan tui chung chu a awp reng a” tih a ni a, Pathian thlarau chuan a conserved tlat a, chu Pathian thlarau in he leilung alo awp tlat a chu ringtute kutah, keini ah hian a conserve hna hi a dah ta a, chuvang chuan Soil & Water Conservation hi kan Bible ah thu hmasa ber alo nih ang leh deptt. upa ber mai alo ni a, a pawimawh hle mai a, sorkar hmasa hunah tih thih lek lek niin Agri atanga bifurcate kha amalgamate leh tum thut thut kha ani a, tun sorkar ah deptt. pawimawh tak an ni chho leh a, NLUP Nodal Deptt. ah te trade hrang hrang an han khawih chho hi a lawmawm ka ti a, Pathian thu han sawi zui zel pawh a chakawm a, mahse thildang sawi tur a tam si a, chuvang chuan Soil & Water Conservation Deptt. pawimawh zia hi kan hriat thar a tulin ka hria.

Tichuan, Co-operation Deptt. te pawh hi Pathianin mihring te a huho a cheng turin min siam a, a mala kan tih theih loh hi co-operation hian kan ti thei a ni, tichuan thawhkhawm te kan ti thei a. Mizo te kan hlawhtlinlohna ni a ka hriat thin chu, thil diklo ni a kan hriat te kan in hmaizah lutuknaah hian kan sawi chhuak ngam lova, tahchuan lungawi silovin, hnamdang-te hi chu an inrinhlelh vang pawh nilovin thil hi an ti thlap thlap mai a, Tripura-ah khuan office pakhatat sorkar deptt. pakhatat kan kalna ah chuan office-ah an awm tha khawp mai a, “in va awmtha ve” kan ti a, “E, kan awmthat loh chuan kan bula miten min report mai ang,” an ti a. Chutiang chuan thil diklo kha an sawi hreh loh avang khan mihring chu inzir ngai kan ni a, tichuan an tha a ni mai a. Tiang chuan Co-Operation han tih-ah pawh hian, a movement han kalpui leh a co-operative han tih, society hrang hrangah pawh hian inringhlel deuh si, sawichhuak ngam si lova thil kan tih thinna hi a tlo thin lo a ni. Chuvang chuan diklo a awm a nih chuan sawichhuak ngam thin ila, tichuan kan kal tha thei mai awm mang e tih te kan sawi duh a. Excise & Narcotic te an hah zia leh an thawhrim zia te, an tangkai zia te kan hria a, an deptt. staff te an indaihlo hle a, heng tepawh kan hotuten an ti chho zel anga.

Land Revenue & Reforms hi a pawimawh khawp mai a. Hei pawh hi leilung siam a lo ni ta a, chu chu mihring ten kan lo insem ta diat diat a, hengah te hian land dispute te a lo awm a, dan hremi an neih a ngai hle a, Assembly Committee atang hi chuan kan rawt sak tawh a, Departmentah hian thubuai ngah deuh ber pawl hi an ni deuh reng a. Chuvang chuan dan hremi emaw, legal adviser tih ang chi legal post hi siam sela. Tah chuan hmun dang ami va engage tawp lovin an mahniah hian dan hremi rawih theihna dan hi nei se chuan an Department buaina tam tak hi chu a kiam thei mai awm mang e tih te, an indaihloh em em avangin ka bial chhung a mite Mitla Mual tih te pawh Minister zahawm tak nen hian kan va thlir dun tawh a. House site plan tur ram tha tak mai a awm a; tin, Falkland lamah te sawn ram ruak a awm a, inhmun neilo tam tak kan awm si a, hengte hi la plan theih loh a ni a, mahse kan Minister chak tak hian hma an la chhova. Revenue ah dan kan mamawhte pawh tunah hian buatsaih chhoh mek a ni in ka hria a, a lawmawm ka ti a.

Tichuan, Rural Development nichina ka hma lama an sawi tawh ang khan BADP (Border Area Development Programme) ten a huam lohte leh Backward Region Grant Fund nei velo ram laili ami te tan hian Rural Development Department hi a tul hle mai a. Tin, ram laili rau rau ah pawh a then chuan High Power Committee in sum hrangte an nei a, Chhinlung Hills Development ah te sum te a awm a ni. Khang pawh la nei velo te kha kan awm a ni Pu Speaker, i bialte ka bial lam te pawh. Chung ang te tan chuan R.D. Department- hi kan in hnanfakna a ni a. Ka hma a an rawn sawi tak ang khan rangva in chung neilo te, mi harsate tan Rural Development atangte a ruahmanna an awm te hi mirethei te, miharsa te tan sorkar hi pa anih zia he sorkar ah a lang thin a. Hengte hi concrete in nei te, in tha pui pui nei te tan a ni lova, miharsa tak tak leina nei ve silo ten rangva inchungte an neihna tur a lo ni a, chungah te chuan a tangkai em em a, tuna an awm chho leh tur hi lawmawm ka ti a ni.

Chuan Home Department-ah hian dan leh thupek kenkawhna lo awm mumal ta te kan sawi thin a, kan hre tlang theuh va a lawmawm a. Tin, Fire Department te pawh tih changtlun an ni a, session hmasa lamah pawh ka sawi tawh a. Saw lam Aizawl North lampang vel tan sawn Fire sub station hi awm thei se, Thuampui ah emaw tih hi kan sawilang tawh a, hengte pawh a awm theih hun beisei takin kan la thlir a. Khawpui chhung traffic tawt lutuk kal tlanga ngai a emergency thilah khan a buaithlak thin a. Tin, Assam Rifle sawn chhuah tur alo ni ta te hi tuten emaw kan hun laia kan tih a ni, Zokhawsang ram te pawh saw keini buatsaih a ni tia inchuh na te a awm a. A pawimawh ber chu sawlaih Zemabawk VC ten ram an lo pe a ram tha tak mai, khami an pek rual khan a ram zau tak an chan tihna alo ni

ta a, chumi rama Assam Rifle piah rama huan lo ram nei ten buaina an tawh tlat mai a. Session hmasa lamah khan ka sawi chhuak tawh a, an ram chhungah kaltlang theih a ni tawh si lova, a ram piah lama eizawng tute tan kawng a bo ta em em mai a. Hengte hi kawng siam saka ngaihtuah a tul hle mai a. Hman deuh hlek khan nu pahnih Assam Rifle leivung paihin a hnawl a, hliam tuarin damdawi in ah engemaw chen an awm nghe nghe a. Chungte chu a ram chhungah an kal lui pawh a ni lova, a ram helin an kal a. Chhunah leivung an paih duh thin si a ti in zingkarah thingphurin an kal a, chumi an haw lam chu hnathawktu ten tukin chu zingkarah thawk turin an lo ti ve hlauh si a, tikhan an kal lai takin an rawn paih ta a ni a, tiang chuan saw lai saw harsatna nasa tak a awm a. Home Department ah Vaibelchhe 442 chuang plan ah alo lang a, heng atangte hian tih theih anih loh pawn kawng dangte pawh min ngaihtuah sak a tul hle a. Saw laia an sawi dan phei chuan ram pek dawnah hian a piah lama huan neitu te tan truckable road siam sak a ni ang tia inremna a awm a ni, an ti nghe nghe a. Chuvang chuan kan hotuten min lo ensak a tul hle in ka hria a, vaibelchhe 442 chuang atang hian an mahni inrelbawl na bakah hmasawna eng eng emaw kan beisei dawn a ni a.

Chutih rual erawh chuan Pu Speaker, sorkar hmasa thil lo tihte i vei lam atang khan han sawi han sawi a tul lem tawh love, tihsual te pawh kan nei ang a, an ti na a sawi a tulna chin a awm thin a. A chhan chu mipui ten he sorkarah beiseina sang tak kan neih hi tih theihloh chin a awm thin vangin. A hma a an lo tih pawi avanga tihtheihloh chin awmte hi a awm a. Home Department-ah pawh hian 2004 kum vela Kel pal (Angle Iron Post) tih te, Goat proof wire-mesh khatiang fencing material lei nan khan sum awm miah silovin State Purchase Advisory Board emaw Departmental Purchase Advisory Board emaw kaltlang miah lovin supply order engemawzat pek alo ni a. Supply order pek a ni miau si a, anniin an supply baw a, tahchuan Saiha ah te, Champhai ah te, Lawngtlaiah te supply a ni ta a. An lo dawng ta vek baw si a, tichuan sum a awm silova, an pe thei lova, chung a supplier te chu Court-ah an kal ta a. Tichuan, Court thu chu an kal chho a, sorkar a tla ta a, tun sorkar hian a ritphurh chu a rawn chhawm ta a, chutah chuan hei Court judgement awm tawh a nih avangin Pu Speaker inpuhmawhna mai mai a ni lova, kan sawi duh a ni. Money Suit No. 14 of 2007 Mrs Rinpui d/o Thangkhuma (L), Chanmari, Aizawl versus State of Mizoram, hemi ah hian date of judgement hi 11.5.2010 a ni a. Nuai 25,47,000 interest hi 12% per annum with effect from 25.11.2004 atanga interest awm tur leh nghal. Tiang kha a ni a, money suit no. 39 of 2007 hei pawh hi nuai 35,88,000 interest 12% with effect from 25.11.2004, Money suit No. 39 baw 2006 ani ve thung a hei hi, Saiha a supply a ni. Hei hi nuai 51,16,500 ani a, money suit No. 40 of 2006 Lawngtlaiah supply cheng 51,16,500 zang baw. Tihian a vai chuan vaibelchhe 16,26,80,000 vaibelchhe 442 atang hian leiba an han nei nghal ringawt ta ani. An pek har leh interest hi a tam dawn a ni mai baw si a. Chuvang chuan he Department-ah hun hmasa a thil lo tihpawi nasa tak nei chung hian hmasawna hna hi tuang taka thawk chho turin duhsakna hlan pahin kan sawi ve a ni. Ka lawm e.

S P E A K E R : Le, a lawmawm e, tunah Pu V.L. Robiaka.

Pu LALROBIAKA : Pu Speaker, ka lawm e, vawiinah demand hrang hrangte sawi thei tura kan han awm hi lawmawm ka ti a. Hun tha tak min pek avangin lawmthu kan sawi baw a ni. Kan sawi vek seng lo ang a, tawi te te in han sawi ka'n duh a, a bikin demand No. 16 na Home-ah hian lawmthu tam tak sawi tur a awmin ka hria a, vawiin niah mipui kan zalen a, mipui kan lawm a ni. Kan Home Minister zahawm tak efficient-na vang te; tin, kan Home Department a kan Securityte kut phuar ni ta lova, an duh duh a thilchhui theihna hun an han nei thei ringawt mai te pawh hi a lawmawm hlein ka hria a. A bik takin kei hi Dampa bial atanga MLA thlan tlin ka'n lo ni a, khu laiah khuan nasa takin term hmasa-ah khan ni hel trainingna hmunte a awm thin a. Tin, Sorkar hmasa a sorkar hotulu a Home lo

khawihute ina hel Aizawl atanga an phurhthlak thin te, a hun leh ani te pawh ka chhinchhiah thlap a ni. Chutiang zawng zawng karah chuan West Phaileng-ah te nunna chan phah te an awm a, khawtlang leh V/C in engmah an sawi ngam silova, nun chep takin hengho hian engtikahnge keini hi min thah ve mai ang tiin thaw dep dep in an awm thin a ni. Ama'rawhchu inthlan dawn a kan sawi angin 'change' a awm dawn a ni kan ti a, chu chu mipui te leh Pathian zarah hlawtlingin, a bik takin keini kan bial ah pawh kan zalen a, kan hlim a, zanah pawh khawihmun ah pawh kan kal ve ngam ta te hi he sorkar inrelbawltha tak leh police ho te kut phuara awm lova, tunhma a Mizo hmel ang si Mizo nisilo, Sikulpuikawn a party worker in a phurh chhoh a a phurh thlak thin te awm tawh lovin, chung ho chu hnawhdarh in an awm tawh a, chungte chu kan sawi lan duh na chhan chu he ramah hian zalenna awm sela, chu chu he kan politics hian sawirem sela tih hi mipui te duhdan a nih avangin kan sawi lang duh a ni.

Tin, nichinah khan an sawi liam liam a, kan bial ah pawh nasa takin kan Home Minister in min duhsak a, Marpara ah te quarter tha tak takin tunah sak mek in an awm a, chutih rual chuan Phuldungsei bik erawh chu kan Minister hian min lo hriat sak sela tha in ka hria a. Fur an ni leh dawn a, nikum lamah te khan silpoulin te kan in pe a, an awmna a far nasa em em mai a; tin, thlipui te a tleh changin lak sak thin a, a bik takin Phuldungsei bikah khu chuan baihvai takin an awm a ni tih min lo hriat sak sela.

Tin, kan han hmuh maiah pawh hian 'change' nasa tak chu a awm a ni tih kan hria a, hun hmasa thil lar tak nuhza siam nana Home Ministry an hmanna thin chu Kelpal tih te, mawza manto tih te, ek in kal thei tih te, thil tam tak kha a awm a ni, ka hmaa sawi tu khan a rawn sawi tawh a, court a an kal dan zawng zawng ah khan khang te kha awm lovin tha takin he Ministry hi a kal a ni tih kan sawi duh a. Tin, keini bial bikah pheih chuan he kan hun chhung hian West Phaileng ah DSP te min han dah belh sak a, a lawmawm kan ti khawp mai a lawm thu kan sawi duh bawk a. Chutih rual chuan kan bial hi a kaihlai khawp mai a, Kanghmun tlangdungah hian Outpost pakhat dah turin he House ah hian sawi chhuah a ni tawh a. Tin, tuntumah hian zawhna ah khan ka'n zawt a, a chhuak hman ta lova. Khulai tlangdung khu a buaithlak khawp mai a, West Phaileng atangin an rawn bial a, enge maw incident awm ta sela buaithlak tak a ni. Rawpuichhipah an rawn chhoh a ngai a, chuta tang chuan an han tlan a ngai a, engemaw pawh awm sela harsa tak a ni, Tichuan, a hnaivai ber Kulikawnah te an han report a, ama'rawhchu an ni area kha alo ni silova, harsatna tamtak khulaiah khuan kan tawk a ni. Hei hi min ngaih pawimawh sak turin ka'n ngen duh a ni.

Tin, kan demand ah hrim hrim hian Home atang hian cheng vaibelchhe 442 nuai 24 singnga sangriat lai mai an awm hi ngun takin ka'n thlir a, Education and Training tih te, Secret Service tih te, Crime Investigation and Vigilance tih te; tin, Battalion hrang hrang te sum hman tur punna a lungawi thlak in ka hria a, nuai 200 te, nuai 300 te, a then te chu chu aia sang mah te pawh a ni a, kan nunphungin hma a sawn chho zel a, chu hmasawmna chuan sualna tam zawk leh sualna ril zawk te a rawn thlen zel avangin khami sualna lo hmachhawn tur khan an thiamna te, an hmanrua te tih changtlun zel (modernize) a ngai a ni. Chumi hre reng chuan kan Minister in hetiang a rawn chhawpchuak hi a lawmawm hle in kan hria a. Tin, a bik takin Forensic Science Laboratory atan te pawh sum tam zawk dah ani te hi a lawmawm ka ti a, heng hian nasa zawkin crime rate kan ti dawn nge ni he Mizorama sualna lo pung zel pawh hi nasa zawkin a tackle thei ang tih a beisei awm hlein ka hria a.

Tin, Forensic Science kan han tih ang chi hi nasa zawka hman tangkai niin nasa zawka thuam that zel nise a tha in ka hria a kan rawt duh bawk a. A bik takin kan sawi tak ang khan tualthahna thu ah a ni emaw, inrawkna thu a ni emaw thiamna a sang em em tawh a. Mit khapkar lo ah hian thil kan in ruksakin kan inthat mai mai thei kha a ni a. Kan

thianpa pakhatin a sawi a, Kerela a kan awm lain kan Hostel si hian thing man to Sandal wood a awm a, a bul chiahah hian kan awm a; mahse a ri hre miah loin a zung nen lam an ru thei a ni a ti a. Khatiang deuh khan Mizoramah pawh hian kan misualte thiamna te pawh hi a sang tawh a ni tih kan sawi duh a. Chumi do let thei tura hetiang budget kan nei hi a lawmawm ka ti a. A bik takin kan Minister pawh hi ka fak duh, principle nei takin sorkar hmasa ah kha chuan 'a ni' an tih tawhte pawh a thla leh ah 'a nilo a' lo ni leh a. Khatiang reng reng a kal kan ni a, vawiinah erawh chuan chutiang chu ni lovin 'a ni' a tih tawh chu 'a ni' a ni mai a. Mi sual dona chungchangah pawh hian nasa takin hma kan sawn a ni tih kha kan sawi duh a.

Tin, Demand No. 35 Fisheries ah hian nichina sawi ang khan keini kan bialah pawh chhungkhat hian an dawng nasa khawp mai a, dil tanpuina hi. Hei hi nasa zawka a nihna ang taka a hmunah te kal a staff te pawhin hma la turin ka duh a, an lo hmelhriat tawhsa te a kum leh a lo pek mai a, a kum leh a pek leh zel ang chi kha awm lovin, a dawng tu tur dik tak ten an dawn theihna tur atana hma la a, a hmun taka kal zel thei turin kan chah duh a ni.

Tin, Demand No. 38 na Rural Development hi sawi loh theih a ni lova BADP te, BRGF te, social education atang te in hall te kan han sa a. Tin, school te leh field te thil tam tak heng BADP atang te hian keini border area bial ah hi chuan hmasawna kalpui a ni. Chung avangte chuan an department chungah hian kan in nghat nasa em em a; tin, rural a ni bawka a. Chung avang chuan khawtlang an thlamuang a, mipui an chungah an lawm a. Tin, a hminga bialtute pawh an chungah kan lawm tak meuh meuh a ni tih ka sawi duh a.

Tin, Demand No. 6 Revenue ah hian tun sorkar tharah chuan kan border area te kan boundary te fiahfai zawka kan tih theihna tur atan Pu Speaker, tawite in kan conclude ang e, boundary committee te din a lo ni a. Heng hian nasa takin hma kan sawn phah in leh kan boundary dik tak te kan hre thei tawh turah ngai ila tha in ka ring a. Chutihruah chuan LSC/periodic patta kan tih te fimkhur zawka tan la turin department pawh kan ngen duh a. A chhan chu pen lap error kan tih angin dawhkana demarcation te tih tak mai mai ang chite, chung avanga anmahni leh anmahni thenawm in huatna ni si lova in huattirte tam tak dispute a awm a ni. Tin, Excise and Narcotics ah hian tuna Home ka sawi ang deuh tho khan anni thumthat an ngaih zia te kan hria a. Tin, tam taka ruihhlo min rawn run tute hneh thei tur chuan an thiamna ang bawka kan lo do let kha a ngai a ni tih hi kan hriat atan kan sawilang duh a ni.

Tin, Co-operation ah hian 'Co-operation Movement' te kan ti a nasa takin vawiin ah kan Minister zah awm takin hma a lakna te leh Mizo pawhin hma kan sawn vena tur a ni hei hi tia inhlawmkhawmte leh he movement, he cooperation a kan tih theih tur ang chite kan man chho ve zel a, heng hmangete hian nasa zawkin hma kan la thei ngei ang tih kan ring a, chung avang chuan (**SPEAKER** : Duh tawka dawn tawh rawh aw) heng kan Demand hrang hrangte hi ka rawn support a ni e, ka lawm e.

S P E A K E R : Pu John Siamkunga.

Pu JOHN SIAMKUNGA : Pu Speaker, ka lawm e. Hei vawiina kan budget sawi hi ka hma ami ten an sawi hnem tawh a, a pawimawh lai zawng zawng an rawn sawi tawh a, ka ngaihawh thenkhat rawn sawi ve ka duh a.

Kan budget, kan GSDP than dan kha Pu Speaker, i vei lama mit ten an rawn ngai pawimawh a, kei pawn ka ngai pawimawh a. Kan than dan hi member kan en chuan 2006/2007 atang khan han en ila, 2006 leh 2007 inkar khan 10.75% in kan thang a, 2007 leh 2008 khan 16.06% in kan thang a, 2008 leh 2009 ah 22.02% in kan thang a, 2009-2010 ah khan 20.89% in kan thang a, 2010-2011 ah khan 7.81% ah kan tla thla ta daih a ni. Chuvangin kan tax revenue lamah hian kan thang chho ve hret hret laiin state non tax revenue lamah kan tlahniam tlangpui thin a, chumi anih avang chuan a fluctuate thin a ni tih hi a chiang a, khalaiah khan kan sorkar in hma a lakna tur lai chu a chiang viauin ka hria a. Helam state non tax revenue lamah hian kan tla deuh duai duai thin a ni. Kan hotu, sawitu dang dang ten an sawinaah khan lam state sum thatna tur hi kan ngaihtuah lo thei lova, kan capital receipt kumin a tlahniam dan te kan hre vek a.

Tin, kan sawi duh lai tak chu Budget kan sawi hi a pawimawh a; tin, mipui a lo ngaithlatute hian kan budget kalphung hi engti zawngin nge a kal tih hi an hre duh thin a ni. Kan budget Department hrang hranga kan chheh dan hi sorkarin ram a kaihhruai dan tur milin a kal thin a, sorkar rilru kha budget-ah a lang thin a ni. Chumi anih avangin engvanginngge Soil Department ah hian nikuma sum kan pek aiin kumin a lo than tak dawrh kan tih chuan sorkarin a kal tum danah chiang takin a lo ti lang ta a ni. Plan ah hian sang takin a lo thang ta a, cheng nuai 4775 zet kan dah a. Non Plan ah hian cheng nuai 1215 kan dah a, nikum ai hian an budget tamna pawh hi cheng nuai 2025 lai a ni ta a ni. Chumi chuan enge a entir kan tih chuan sorkar kal tum dan chu Soil Department ah pawh chuan a lo lang ta a. Soil Department hnuaiah hmunphiah leh rubber leh thil dang dang a kalpuina tur kha kan dah ta teuh mai a ni. Chutiang bawkin Agri ah leh thil dang dangah te a rawn lang chho thin a. Pu Speaker, i vei lama mi mi thenkhat ten a nikum aiin chumi Department ah chuan Budget a tlem zawk a ni tih ringawt mai kan sawi thin hi chu a fuh lo. Nikum lama kan dah aia tlem chang a awm ang a, tam chang a awm ang a, Non Plan kan pek tam chang, kan pek tlem chang, kan pek mangloh chang pawh a awm ang. Chumi in a entir ber chu sorkar khan engti zawngin nge ram a kaihhruai dawn, kha department pawh kha engtinngge a kal tir dawn tih lo lan chhuahna a nih thin vang a ni. Chuvangin, kan budget kalphung hi sorkar hmel lo lanna a nih avangin kan chik pawh a ngai a, uluk taka kan thlir pawh a ngai thin a ni tih ka'n sawi hmasa duh a.

Tin, i veilam ami ten Pu Speaker, sawlai District Council-ah pawh nasa takin an sum a pung , cheng nuai 6962 laia a pun laiin, min pe tha lo a ni, chu lai kha laiah chuan, kan phu zawk a ni tih te kha chu a pawh khawp a ni. A bikin Mara ah hian nikum lam aiin kuminah Plan sumah hian nuai 30 in kan pe tlem a, Non Plan leh a dang zawng zawngah hi chuan nasa fein kan up vek a ni. Pek tlemna chhan kha a awm thin tih kha kan hriat a pawimawh a. Nikum lama plan sum kan pekte kha a lo hlawhtling tawh a, Non Plan lam atanga enkawl pawh a lo ngai a ni mai thei, khatiing te te khan kan budget kalphung hi kan chhut ngaiin ka hria a. A ni lo zawnga mipui hriat tura kan sawi vak vak hian, mipuiin a ni lo zawnga an lo lak chuan Budget kalphung kha an hriat loh phah thin a.....

chuvangin a pawh hlein ka hria a. Tin, ka sawi duh chu Revenue Department ah hian, kan hotuten nasa takin hma an la a, Mizoram Land Revenue & Settlement Bill kha draft in an buaipui mek a, hei hi dan tha tak tur niin ka hria a, keipawh ka tel ve thin a, he dan hi an peih dawn tawh em ? eng chin chiah nge kan kal tih kha kan Minister khan min rawn hrih thei se ka duh a, ka han beisei bawh a. Tin, Home department ah hian, kan Minister in a enkawl dan te, hneh taka a enkawl chhoh a, dan leh thupek chungchang te kha kan hotu dangten an sawi tawh a, lawmthu kan hotute sawi kha kei pawh ka lawmthu sawina ni sela. Kan sawi duh lai tak a chu Thingsaiah khian check gate nikum hmasa khan din a ni a, chu

chu kan DGP kalchhuak ta khan ka han tlawh ve ang e, a ti reng thin a, tlawh tur pawn kei pawn ka phut a, vawi hnih vawi thum lai chu kan inbia a ni. Ama'herawhchu, a pension in a nang ta a, a han tlawh ta lo a. Police lama kan hotuten han tlawh thei se ka duh khawp mai a, tunah khian mimal in kan la luah a ni, Check gate chu kan kalpui reng a, a dan phung pangngai in a kal reng reng lo a ni. Chuvangin checkgate khi hawn a nih tak si ah chuan a kalphung pangngai in min kaltir thei sela, khimi kan hawn atang khian Aizawl atanga bike bo Burma rama khalh chho thin kha a reh duak a ni. Tin, cylinder an phurh chhoh thin pawh khilai ah khian an man nasa thin a, khilai khi awlsam taka Burma ram kai theihna mai, lamlian tha tak awmna anih avangin checkgate hi kan mamawh hle a. Kan hotuten min din sak tawh a, a tih puitlin hna full-fledge a a function theihna tur khi min tihsak turin ka han ngen duh a. Tin, chutiang bawkin Cherhlun kaltlanga Ngharchhipah khian outpost te khi min dinsak thei em aw ? tih ka rawn ngen duh bawk a.

Tin, RD hnuaiiah hian, ka bialah khian Rest House hi kan nei ve neuh neuh a, a enkawltu lampang hi kan tlachhe khawp mai a; tin, mikhual an tam em em silo va, an thlenna atanga chuti zat percent i lo ei ve dawn nia han tih pawh khian thla khatah hian cheng za hnih khat pawh hlawh loh chang a awm a ni. Chuti chung chuan Rest House khi a awm ve khi a ngai a, department lam atang te leh khawi lai lai atang emaw a mi pawimawh kal ten, mimal ina thleng mai lo a an thlen theihna remchang a ni bawk si a, khalai kha kan hotuten min han ngaihtuah sakin engtin emaw, MR te emaw chhawr theih dan te a awm em ? tih min lo en sak se ka duh a.

Tin, Soil Department ah hian, ka bialah khian Soil Division a awm ve tawh a, chumi ah chuan Thingsaiah khian R.O post a awm a. R.O pawh dah an ni a; amaherawhchu, quarter khi a chhe hlawm khawp mai a, Rest House an nei a, Soil Rest House khi Cherhlun ah. Amaherawhchu, khi khi a lak tlak tawh vak lo a, khing te khi min sak that sak thei se tih ka rawn ngen duh a; tin RO quarter te min sak sak thei bawk se tih kha ka rawn ngen duh bawk a. Tin, nichina ka sawi hmaih tak Home department ah khian Hnahthial ah sawn SDPO post kha a awm thin kha a ni a, sawrkar hmasa khan min laksak ta a, tun sawrkar hian a building te pawh an luah tur te pawh ala awm vek a, min dah sak leh thei lawm ni, min dah sak leh ngei se ka va duh em ? tih kha ka rawn ngenna a ni e. Pu Speaker, ka lawm e.

S P E A K E R : Awle, Pu Lalrinthanga`n a phar a, Pu T.T.Zothansanga`n a phar a, Pu C.Ramhluna`n a phar a, khamite zingah khan. Pu K.Lalrinthanga kan la ang a, a dawtah Pu Ramhluna kan la ang a. Pu K.Lalrinthanga.

Pu K.LALRINTHANGA : Pu Speaker, ka lawm e, vawiin a kan sawiho tur Demand hrang hrang a hi a indawtin ka rawn sawi ve mai ang a. A hmasa berin Demand No.-11 na Secretariat Administration Department ah khan ka rawn tarlan duh chu Assembly ah hian Committee hrang hrang a awm a. PAC leh Subject Committee ten department a zawhna kan va siam hian, sawrkarin a rawn chhanna hi duhthu a samlo hle a. Department atanga an chhan hi secretary lam hian chhiar chhuak lemlo hian an rawn forward tawp nia lang hi tam tak hmuh tur a awm a. Chutah chuan Committee Member-te, MLA zahawm tak tak te, an rilru a na hle thinin ka hria a. Chu chu kan tarlang duh a. He lai kawngah hian hma kan sawn deuh thain ka hria a.

Tin, thil dang pakhat leh chu, Khatla lam atanga New Secretariat kawng chhuk thla khu chu an siam zau tawh a, a kal kawng thlang/mawng lam atanga rawn luh chhohna (Tuikual lui lam atanga rawn luh chhohna) khu a zim hle a. Hmun ruak a la awm tam lai

khuan zauh a tha hlein ka hria. Chu chu kan Minister-in hria sela a thain ka hria a. Hun kal leh turah Department hrang hrangin hmunte an nei ang a, chungah chuan a laih belh leh han zauhte a harsa thei dawnin a lang a. Nakinah khawthlang lam Aizawl khawpui tihzauhna tur hmun a nih hmel si a. Khu lai atanga kan kalna tur khu zau deuh hlek a nih loh chuan nakinah mipui tan harsatna awm thei tur niin ka hria.

Demand No. 16-na Home Department-ah hian sawi tur awm nualin ka hria. Kan Minister hian boundary (state dangte nen kan boundary) hi a hria a. Eng enge maw min tihsak a, Phaisenah I.R min dahsak a, Saiphaiah IR an awm bawk a; tin, Vairengteah police an awm bawk a, chutiang chuan ruahmanna an siam a, a lawmawm hle a. Phaisen khuaa IR-ho awmna an building chhe lutuk sakna tur ruahman mek a ni a, lawm thu ka sawi a. Chutih lai chuan ka thenawm pa MLA zahawm tak Pu Hmingdailova'n a rawn sawi ang khan Phaisen ka kal apianga khawthlang mipuiin an lo sawi chu IR-hovin electriect eng an nei lo khu a ni a. Phaisen mipuite leh IR-ho khu an inngeih hle niin ka hria. Khaw dangah chuan police leh khawthlang mipuite inhmuh thiam loh zeuh zeuhthe hi a awm niin ka hria. Kal apiangin khawthlang mipui V/C te leh YMA te hian IR-hoin eng an neih theih nan hian ka hnenah an sawi ziah a ni. Electriect ban te an phun ve a, mahse a eng thei bawk si lova. Helaiiah hian Home Minister changtu thil tih theihna pun a tul niin ka hria a ka'n tar lang a ni. Ngaih pawimawh tul hlein ka hria. Tin, chutih rual chuan Phaisen leh Saiphai velah khuan smuggling a nasa ve hle thin a, a kal tluang ve hle thin a. Tun dinhmunah Saiphaiah chuan Check post a awm tawh a. Phaisen atang khuan a kal nasa viau va, kan mipuite khuan tianga kal tlang nasa lutuk chu a chang chuanin kan mualpho ve, tiin an han check ve chang te pawh a awm a; amaherawhchu, kei chuan hnathawktu an awm alawm, Excise leh Police an awm a, annin an check loh a, a kaltlang a nih a, in khua a tihbuai si loh chuan ti vak duh ma ta che u te ka lo ti mai a. A chhan chu hun tam tak, zan rei tak tak thlengin an hun khawhral a lo ngai thin a. Anmahni khaw tan problem a ni lo va, amaherawhchu, a kal tlang miao si chuan Mizoram pumpui tan problem a lo nihna laiah khan Excise Minister leh Home Minister-te information ka han pe a ni. Tul an tih chuan Check gate-te an dah mai turah ka ngai a.

Tin, thil dang pakhat leh chu kan Land Revenue Minister zahawm tak kaihhruainain Mizoram Boundary Committee-te din a lo ni hi a lawmawm ka ti a. Cachar boundary vela cheng ten hnawk an tih ber chu Aizawl atangin emaw, hmun dang atangin emaw ram hmangaih ni awm takin boundary-ah buaina siam lek lekin boundary-ah engemaw an zuk thawk a. Tichuan Aizawlah an haw san leh daih a, chumi hnua buaina awm chho leh zel chu hnawk an tih ber chu a ni a. Sorkar hmasaah khan, 'Boundary Commission din ni rawh se' tih a ni a. Chuta ngaihtuahna lo thleng ta chu Boundary Commission hi Central sorkarin min lo din sak ta ang se Central sorkarin boundary min pawmsak chu 1950 North East Regulation a boundary kha a ni si a. Chu chu U.T. ah khan nemngheh a ni a, MNF ho an rawn haw a MoU ah khan signed a ni bawk a. Chuti a nih chuan Boundary Commission chuan kha boundary Mizoram tam tak la hek ni a kan hriat kha an rawn kawm mai dawn si a, mipuite hian kan pawm dawn reng reng lo a ni. Tun hunah chuan Mizoram chungah Boundary Committee din a lo ni ta a, tul leh tha nia kan hriat ang kha kan sawi thei tawh dawn a. Chutih rual chuan mipui ten kan hriat tur atana tha a ka hriat chu all party te leh NGO te nen 'helai tak hi kan boundary-ah i pawm ang u,' ti a concensus a khulai ramri khu kan siam a kan nawr ho tulin ka hria. Congress party sorkar laiin lo tihlawhtling se emaw MNF party sorkar laiin lo tihlawhtling se emaw chutah chuan kan duhna takah hian boundary hi kan rin tak tak thei dawn lo. Thil awmzia chu 1875 boundary kan tih chu Cachar ram chhung hla takah a awm a. Chu chu lo pawm ta ila Cachar mipui tam tak MLA constituency engemaw zat awm theihna Mizoramah kan rin lut ang a. Chu chu lo tihlawhtling ta ila, khata mipui lo cheng tawh te kha Mizoram sorkar hian a

hnawtchhuak thei lo vang, kum 15 an cheng tawh tlat, Constitution in a humhalh tlat a ni. Chutiang anih avang chuan Bahga bulah te pawh ramri va siam pawh ni ila Mizo mipui ten, 'vai la lut tu' tiin sorkar (a siamfel tute kha) an puh dawn tho tho. Vai la lut lovin Mizoram kan luah chinah khuan ramri siam dawn ta ila, chutah chuan puhmawhna sorkar chuan a chang dawn tho tho. A chhan chu, 'Mizoram min paih then sak tu,' tiin a sorkar lo mite chuan an puh dawn tho tho a ni. Chuvang chuan Mizoramah hian consensus in all party leh NGO zawng zawngte hian 'hemi chin hi Mizoram ni se,' tiin kan ngaihtuah a, kan sawiho a tulin ka hria a. Chutiang tur atan chuan tuna kan Revenue Minister kaihhraina a Boundary Committee all party in an din ta hi a ropui hle in ka hria a. Hei hian kawng tam takin hma a lak theih ka ring. Sawi tur a tam mai a, ka sawi seng dawn lova, bell kha a ri a, khawngaih takin min lo hrethiam turin ka ngen a.

Fisheries Dept. hi ka sawi leh duh a. Tunah chuan Fisheries Dept. atangin sangha dil tam tak siam a lo ni ta a. Agriculture Dept. nen hian ram hi an inchuh deuh in ka hria. Tunah chuan Fisheries Dept. in dil an han siam a, sangha an khawi a. Agriculture ram leilet hmun a nih lai khan sangha an khawi a. An thawhchhuah kha pawisa a han chan tir khan a tam zawk ta si a. Chutiang te a nih avang chuan Agriculture leh Fisheries Dept., hian in siam rem deuh hlek chu an ngaiin ka hria a. Mi tam tak chu Fisheries ah hian an tui tawh zawk a. Chutih rual chuan Agriculture-ah pawh hian han sawi kai tel lawk ila. Buh chin huna an chin theihna ang chi ah hian chuan Agriculture in chang ta se, mahse Fisheries a lo nih a, dil te a lo nih a tui englai pawh a awm theihna ang chi ah chuan sangha dil hi siam ta ila. Chutiang chuan tih tawn an ngai a, khalai kha ka sawi duh a. A sem dan chungchang vel ka hre viau a, a semna hmunah ka kal tam viau a, ka endik sak thin a ka sawi lo mai ang a, nichinah khan midangin an sawi tawh bawk a.

Rural Development-ah kai leh lawk ila. Material component chungchangah hian VEC te thawh tur ni awm leh departmental work a thawh tur ni awm anga langah hian department work a department hnathawktu ten supervisor an lo tih ve hi a tha vak lovin ka hria. Kan bial-ah khuan VEC te hnathawh aiin department in an han thawh a, an han supervise khuan hna khu a chhe zawk zel a ni. Tin, VEC te an han thawh dawn leh remchangah party worker te pawh thawh tur atana ruahmanna an han siam ve chang te pawh hian department a hnathawktu thenkhat-te hian an rim nghal zel a ni. Hna chhe deuh hlekin an thawk a, an hlep tam deuh hlek a. Chutiang te a nih avang chuan department a hna thawktu te hian thawk ve tawh lo se tha-in ka hria a.

Tin, chutih rual a ka han tarlan leh duh chu thingtlang-ah Community Hall te kan sa a. Community Hall sak chungchangah hian a bial neitute hi min rawn thin se tha-in ka hria. Khaw hrang hrangah public meeting neihna tur hmun awm lo khua te a lo awm ve a. Ngaih pawimawh bik khawtlangin meeting an neihna tur awm lohna te a awm a, thenkhat chu nei tawh sa te an ni a. Chung kawngah chuan a pawimawh lai hi bial neitu-te hian kan hria-in ka hria a. Chuvang chuan, ruahmanna siam dawn hian bial neitute tu te pawh ni se, opposition an ni emaw, ruling an ni emaw sanction an dil dawnin min rawn thin sela tangkaina nasa tak kan nei theiin ka ring a.

Excise chungchang pawh hi sawi tur ka nei nual a. Kohhran Upa leh Pastor pawnlama ka zawh tawh chinah chuan zu zawrh pawh ti lo hi an ni deuh vek a ni. Mahse, a committee anga thu kan hriat chuan zu zawrh loh tur kha a ni zel mai. Chu chu Mizoram a thil awmdan a ni a. Committee ang chuan hmingchhiat kan hlau a. Mahse, mimal ang chuan a tha zawk lawm ni ti a ngaihtuahna siam hi tam tak an awm tawh a ni. chung atang chuan kan Minister te leh khawtlang hian ngaihtuahna siam ila a tha-in ka hria. Eng ang

in nge kan tangkaipui zawk dawn ? Zu khap bur hi nge kan tangkaipui, khap bur loh a zawrh a, a intu te nasa taka control. Office-a in te suspend tur in dan siam ta zawk ila. 1984 zu zawrh a engemaw chen a han zawh hnu khan zu in kha an thiam tawh viau a ni. Zu in tam tak khan intlar put put kha an zak tawh. Mahse, tunah hian Total Prohibition kan ti a. Zotlangah kan awm a, nang pawh Pu Speaker, Vaivakawnah in awm a, Inrinni tlaiah chuan khulai Hunthar kawng thla khu a jam deuh ziah a ni, Rangvamual kal turte avang in. Chung chu an veng seng tak tak chuang lo. Chutiang ai chuan 9zu chhe in lovin kan siam thei ang em tih te hi ngaihtuah ni ta sela a tha zawk awm mang e aw tih te ka'n ngaihtuah a. Chu chu ka rawn sawi duh a ni.

S P E A K E R : Saruang awmna apiangah Mulukawlh te an awm khawm tih a nih kha. Tunah chuan Pu C.Ramhluna i lo sawm ang.

Pu C. RAMHLUNA : Pu Speaker, ka lawm e. Vawiin chu i thlutlhenga thut kha a chakawm loh riau in ka hria ka ti. Member ho hi minute 10, minute 15 te kan sawi a. Pu Speaker, ka'n sawiduh hmasak chu kan kalphung hi thlak ngaiin ka hria. Tihian, Demand for Grants kan nei tawh a. Work Programme kan nei tawh a. Chu mi hnu-ah chuan Budget Session kan nei a member ten kan duh ang ang thu kan sawi a. Mahsela, Work Programme hi an thlak chuang dawn miah lova. Demand for Grants hi an change dawn miah chuang lo bawk a. Kan duh duh kan sawi a ni ve ringawt mai a. Hei ai hi chuan thil pakhat ka rilru-a awm chu, State Planning Board kan nei a State Planning Board hi he mi programme siam hma hian ko ta sela. Tichuan, member ho min ko khawm vek sela, mahni constituency a kan ngaihpawimawh ho kha sawi khawm ta ila. Chu chu lo in corporate tum ta ang sela. Chu mi hnu chuan Budget Session hi nei ta zawk ila tihte rilru ah a awm rum rum a. A chhan chu hei kum 3 kan sawi ve tawh a. Nimahsela, vawikhat mah hetiang work schedule te, demand programme te engmah hi change a awm tak tak chuang hauh lova, vawiin a kan sawi pawh hi chutiang tho kha a nih hmel a, engpawhnise, kan duty a ni a kan sawi leh mai dawn a ni a.

Hmasa bera ka'n sawi duh chu Demand No. 11 kha a ni a. Plan allocation kha chu engmah sawi tawh lo ila. SAD ah hian thil pahnih khat ka'n sawi duh chu Mizoram a kan hnathawktute tamna ber Secretariat hi tunah hian an leng tawhlo deuha hriatna te ka lo nei ve mai mai a. Chuvangchuan, kan sorkar thar hian Secretariat building, Annexe building hi sak a tum em? Engtikah nge a sak theih ang ? Sa dawn ta nise khawilayah nge sak a tum tihte pawh hi hriat a chakawm ve mai mai a. Officer an lo tam zel a, hnathawktu an lo tam zel a. Chuvangchuan, hei hi thil tul niin ka hria a, kan sawi duh a. A pahnihna ah chuan, hman deuh khan staff ho kalna tur bus chungchang pawh harsatna an tawk deuh niin ka hria a. Khangte pawh kha nichinah khan kan Group Leader te khan an sawi tawh na a, han tuihnih ve ka duh a. Mi tam takin motor an nei lova, chuvangchuan, Secretariat hian bus service mumal tak hi neih sak sela a tha lawm ni tihte ka rilru ah a awm bawk a, chu chu kan sawi duh bawk a. Tin, a dang leh ah chuan SAD hian Secretariat hman tur atan Stationery hi tam tak an lei thin a, he tah hian thil diklo tam tak a awm thei a ni. Vawi khat phei chu Under Secretary pakhat kha hetiang chungchang thu ah hian diklo taka lei kha a awm a, PAC pawh khan action la tura tih hial tawh kha a ni a. Mahselangin, action la lem lo khan a kal chho ta a, tunah chuan Secretary ah a kai der tawh a ni tihte pawh kha ka sawi duh a. Helayah hian fimkhur a ngai hle mai awm mange aw tih kha ka sawi duh mai mai a. Tin, Demand No.16-ah a hmasa berah Police housing ka sawi duh a. Kuminah hian pawisa an ngah viau va, 880.00 lakhs lai an nei a ni. Tichuan, an work schedule hi ka en a, work programme hi nichina an sawi tak ang khan kan bial lamah te khian pakhat mah a awm ve lo mai a. Bungtlang ah te sawn out-post kan nei ve a, an building a chhe khawp hlawm mai a.

Building thar pa khat (1) te chu min pe ve thei lawm mawni le te ka ti a. Tin, chubakah chuan an out post building te pawh saw maintain a ngaiin ka hria a. Khangho te kha min tihsak thei em tihte kha sawilang duh a. Tin, chubakah chuan Thingkah ah hian I.R Bn. kha dah tum deuhna awmin ka hria a. IG Retd. khan ka va kalna ah chuan Thingkah ah kan dah dawn e a ti a. A hmun te pawh kha an thlang tawh deuh a. Kha kha enge a dinhmun kan Home Minister zahawm tak hian min hrilhfiah thei sela ka duh khawp mai. Tin, nichinah khan a sawi tawh a, kan P.S.O. ho te TA/DA bill kum 2 lai mai la thei lo hi an sawi ve reng mai a, kan hnenah hian khang kha min hrilhfiah sak sela, a hmalama pek theihte a ni em tihte kha kan tarlang duh a.

Tin, Pu Speaker, HPC(D) ho in hman deuha lehkha an rawn tihchhuah kum 2008-a Congress party te nen thawhhona thuthlung an siam Congress party in an thuthlung an bawhchhiat tak avanga harsatna awm nia an sawi chanchinbua lo lang kha Pu Speaker, khawngaih takin a thu phungin kan Home Minister hian a wind-up naah min han hrilh thei lawm ni tihte ka'n sawi duh a.

Chubakah chuan Police Department hi tunah hian IPS Cadre leh MPS Cadre hi an awm hrang ta a ni a. IPS Cadre hi tunah hian 19 an awm a, MPS Cadre hi S.P. above kha 18 an awm a. Tichuan, tunah hian an kalphung hi ka ngaihtuah ka ngaihtuahin hetiang hian ngaihtuahna ka siam ve mai mai a. Tunah hian DG hi 6th Pay ah chuan pay sang tak la kha a ni a. Additional Secretary, Gov't. of India rank a ni a. Kum 2 hnuah khan apex scale ah a kal thei a, chu chu Rs 80,000 kha a ni a. Khami kha a nih lai khan helaiah state sorkar ah IAS a nih vang hrim hrim a super-time emaw selection grade emaw Secretary han nih a, a hnuaihan kuntir reng maia hi an tan pawh a hrehawm vein ka ring tlat mai a. Forest Service ah chuan kan awmlai khan PCCF khan Ex-officio Secretary kha kan kawp deuh zel kha a ni a. Khatiang em kha a ni theilo a nih pawhin DGP hi a senior most kha Home Secretary ah dah in, a next man kha DGP a dah in anmahni khan Home Affairs kha enkawl ta se la, a nih loh pawhin Additional DG pakhat kha la awm ta ang ni se, kha Additional DG a khan Special Secretary Home enkawlin a force lampang enkawl ta ang se la, tichuan Home Secretary pawh hi Principal Secretary kai pha chin hi dah ve ni se, 6th Pay-ah khan kha kha an ti miau a, DGP chungah leh PCCF chungah awm tur kha chu Principal Secretary level chungah awm tur a ni tih kha a ni ve tlat a ni 6th Pay Commission recommendation-ah khan, chutiang chuan police officer ho hi khatianga hahdam deuh va hna an thawh theihna tur atan khan an cadre management kha enpui deuh a tha lawm ni tih te kha ka ngaihtuah a. Tin, MPS ho hi Secretary level ah te pawh an dah ve theih a ni lawm ni, MCS hi Secretary pali vel an nei tawh a, MMS in Secretary pahnihte an nei tawh a; tin, Finance & Accounts Service pawhin Secretary te an nei tawh a, khatih lai ah khan Forest Service pawhin an nei tawh a, chutihlai ah chuan anni hian Secretary post hi pakhatmah an la nei ve lova, anmahni MPS cadre post ah hian DIG pakhat emaw an han nei chho ta a, tichuan kha kha chu Secretary level ah pawh khan a dah ve theih a ni. Khati zawng khan ngaihtuahna te hi a hman pui theih em tih ka rilru ah a awm deuh hlek a kan sawi ve a ni.

Tin, Demand No.35-na Fisheries ah khan thil pahnih khat han sawi ka duh a, Performance Budget 2010 -2011 ah khan Marketing-ah Maintenance of Ice Plant and Cold Storage Production of Ice Block tih kha a awm a, hei hi Subject Committee in vawi khat chu kan en a, hmun thumah a awm a, pakhat chu Sairang kawng ah hian a awm a, kan va en lai chuan a function tawh lo va, tin, an repair hlei thei tawh lova, a thirte pawh kha a tuiek deuh vek tawh a, an sawidan phei chuan repair aiin a thar lei ila kan hlawk tawh zawng ang an ti a, Ice Block pawh an produce thei tawh lo kha a ni a. Nimahsela kan en a, nuai 31 lai mai kha an Annual Plan ah khan a lo awm bawks si a, tichuan an expenditure kha nuai 23 kha

matching share ah dah in 8 lakhs vel kha an lo hmang ni in ka hria a. Pu Dy.Speaker, helai pawisa hman dan a hi enge an tih tak aw? Ice Plant kha a tharin an siam leh ta nge ni a a chhia kha an maintain ta tih kha ka han hre duh mai mai a, min han hrilfiah sela a tha in ka hria a. A chhan chu Ice Block an siam theih loh avangin sangha tam tak lo kal tur kha dah thatna kha a awm lo a ni a, chuvangin hei hi a pawimawh viau in ka hria a ni.

Tin, chubakah chuan polyculture of giant prawn nichinah khan sawi chhuah a ni tawh a, prawn lian chi pui pui kha Lengpuihah khan a chi tih chhuahna tur kha an siam kha a ni a, kha kha tunah hian tihhlawhtlin a ni ta em? Kan va kal lai pawh khan an tan tawh kha a ni em? Bombay atangin mithiamte an lo kal dawn a, min rawn enpui dawn an ti kha a ni a, kha kha engtingne ni ta a chi kha an pe chhuak thei ta em tih kha han hriat a chak awmin ka hria a ni.

Tin, Demand No. 5 to 8 ah khan ka han sawi duh chu NREGS kan tih hi ni 100 inhlawhna hi ka ngai pawimawh em em mai a, thil pakhat ka sawiduh chu hei hi chianguang deuh hlek a implement dan ngaihtuah a ngaiin ka hria a. Ni 100 inhlawhna hi awmie nei deuh hlek a kan hman chuan society pawh a siam that danglam theih dawn a ni. Asset te pawh a siam theih dawn a, a nih loh chuan mahni huanah pawh khan a inhlawhfak tir theih a, mahni huan a inhlawhfa khan ni 100 inhlawhna tho kha a siam theih a. Helai hi BDO te hian plan mumal tak neilo hian an thawh tir mai mai deuh niin ka hria a, chuvang chuan plan mumal deuh tak hemi khua hian kumin chung hian engge an thawh dawn tih kha chiang kuang deuh tak a hriattirna awm thei ta ang chuan he NREGS pawisa hi chhungkaw in chawm nan a hman bak ah asset siam nan a hman theih dawn in ka hria a, chu chu Pu Speaker ka han sawi duh a.

Tin, chubakah kumin ah hian ka lawmna chu GCI roofing atan rangva engemaw zat lei theih tur niin ka hria a. Vawi khat keipawh ka bial chungh atan khan min han pe ve tawh a ka lawm viau va, kuminah pawh hian min pe veleh ngei sela ka duh in lawmawm hle in ka ring a. A chhan chu nikumah khan Minister khan harsa a ti deuh hlek a, in kang a nih loh chuan pek theih a ni lo ve tih kha a ni a, chuvang chuan kha kha kan sawi duh a ni. Pu Speaker, minute khat lek min pe phal ang em? Kan sawi duh chu Soil & Water Conservation hi tunhmaa department te tak te kha tunah chuan lian puiin kan siam ta a, a lawmawm ka ti a. Mahse, ka ngaihtuahna mai mai ah chuan a man power hi a increase chuang si lova, Soil Conservation Department hi a size a ngai reng a nih chuan pawisa tam tak kan vur hian kha pawisa kha a hmanna tur dik taka hman kha rin aiin a monitoring-te, a evaluation-te, a supervision-te a tih theih loh chuan harsatna tam tak an nei ang tih ka ring a; chuvang chuan, pawisa kan pek tam rual rual hian a man power pawh hi tih tam atan a tha a. Tin, chubakah chuan Soil & Water Conservation Department hian hna tam tak an thawk a, kan lawm hle a. Rubber plantation-te pawh an ti a, mahse, Soil Conservation Department hi activity a ni a. Chuvang chuan, Soil Conservation Department hian an tih tur pakhat nia ka hriat chu Department hrang hrang hian Soil Conservation works hi an ti theuh thei ta a ni, Forest pawhin an ti thei ta a, Agriculture pawhin an ti thei ta a, PWD pawhin an ti thei ta a, P&E pawhin an ti thei ta a, anmahni Department theuhvah khan what type of conservations measures should be taken up tih lai tak hi a Department hian siam chhuah sak sela chu chu a guide ang in kal ta ang se, department khan anmahni department chung theuhvah khan Soil Conservation works a kha engge an lo tih dawn tih kha chianguang taka an hriat theihna tur atan khatiang zawng khan ti ta se a va tha awm e tih ka rilru-ah a awm deuh hlek a, chu chu kan sawi duh a ni e. Pu Speaker, sawi tur tam tak a

awm a, nimahsela, hun ka khawhral tam lo ang e, chu chu ka sawi theih tawk ni mai sela, ka lawm e.

Pu T.T. ZOTHANSANGA: Pu Speaker, ka lawm e. Nimina Demand kan sawinaah khan i veilam ami te khan “Kan demand hi a tlem deuh vek mai a, NLUP paih pheih chuan,” an ti deuh vek mai a. Kan budget-ah hian mipui chanai hi kan dah ngai lo ang reng khawp mai a, kan dah ve chhunah, “NLUP vaibelchhe 370 hi chu paih ilang chuan” an ti an ti mai a, mipui an hmangaih lo emaw ni aw ka ti a. A tam tak a kan tlemna chhan kha mipui chanai tun tum ah hian kan dah vang a ni tih ka sawi duh a.

Tin, Demand No. 38-naah khan ka lut duh a sorkar hmasa ah khan IWDP kalpui a ni a, tun tumah hian IWMP kan kalpui leh a. Champhai District-ah kan proposal-ah hian in 20 siam a ni a, chutah chuan, Champhai I, II, in 20 thleng an rawn siam a ni, tunah hian Champhai IV thleng kalpui dawn mek a niin ka hria a, helai hi nakinah kan Minister zahawm tak pawh khan min rawn react thei hram sela ka duh hle a. Pu Rova bial leh Pu Rina bial vel ah an kual an kual a, ka bial a chhuah ve hun tur chu 15-na daih mai kha a ni dawn a, helai hi a constituency ang pawh hian khai rual deuh theih dan a awm em, a 5-na leh a 6-na pawh Pu Rina bial a la ni teu mai a, hetiang hian a rawn ni chho zel a, keini 15-na tawp lam hmawr bawkah kan awm ve chauh mai a, a in balance lo lutuk a ni. Khalai te kha Champhai District Level Monitoring Committee-ah pawh kan sawina ah chuan ‘Headquarters lam thu a ni e, khulam thu a ni, Secretariat lamah’ an ti a, kan Minister zahawm tak khan min lo react turin kan beisei dawn a ni.

Tin, PIA tan hian ruahmanna a ni rih na a RD, DRDA hi hmun nga vel laiah a rawn lang a, a nodal department ber ni mai si PIA-a an awm fo hi a dik chiah em tih ka hre lova, anmahnin an enkawl, anmahnin an endik tur ni bawk si lai te, corruption kawngka hi thui tak kan hawng palh thei mai lo maw tih ka ngaihtuahna ah a awm a, 20 zingah hian 5 laiah PIA tura rawtna a awm a ni tih kha ka sawi duh a. Tin, Pu Speaker, Mizoram ah hian District 8 a khawpui hovah hian khawpui mihring hi nuai 473440 kan ni a, thingtlangah nuai 61,7,610 kan ni a, thingtlanga awm hi 56% tha zet zawt kan ni. Chuvangin, RD sum hi ka ngai pawimawh khawp mai a, kan hun kal tawh te kan en chuan Mizoram-a kan sum, kan in dawmkanna leh kan han vauchher deuh ber hi RD sum hi a ni lo thei lova. Chutih rualin kan hotute tam tak an hmingchhiatna leh an eirukna kua ni a miin an ngaihbel theihna kha a ni ve hrim hrim a. Khawpui atang hian a pumpuiin thingtlang hi kan ngaihsak reng reng lova, term hmasaah khan tih kha kan sawi duh a, State Level Monitoring Cell and Internal audit cell kan han thiat deuh rum rumna chhan kha tam tak a ziak kan nei. Thingtlang mitekan mawl si a, keimahni hming in khulaiah central lamah kan zu la chhuak teuh teuh a, helai alo thleng a, kan hotuten thiam takin an han sem darh a, amaherawhchu a nihna tur thleng chiah lo hi a tam viau a nih ka ring, chulai karah chuan SLMC 2 IAC te hial 1 kan han ban kha a ni a, khang te kha a ding leh tawh reng em? Ding nise tute nge a member te tih te kha han hriat tlan ka chak deuh a.

State Monitoring Cell hi a pawimawh khawp mai a, hnam naupang te kan la ni a, thil a nihna tur lo a han kal tir, han tham kual ching hnam kan la nih avang hian a him lo ve hrim hrim a, kei hian ka’n ngai pawimawh khawp mai a. Entir nan- term hmasa ah te khan thingtlang a kal ngei ngei tur vaibelchhe 4 vel kha

khawpui ah te kan han sem/seng lut kha a ni a, khang kha thil pawl tak mai a ni a, thingtlang ten kan chanvo kan chang thin lo hi Zoram harsatna ber pakhat a ni tih kha ka'n sawi duh a. Chuvangin SLMC&IAC kan han tih central duh dana kum 1982 a din kha ani a, kha khan BDO te leh DRDA ten an hnathawk kha an endik a, hei hi hnawp ti mai lovin tha taka thingtlang ten kan chanvo kan chan ve ngei theih nana a din kha tha in ka hria. Sorkar hmasa te phei kha chuan hnawp an han ti em em khawp a, hnawp an tih nachhan kha BDO atangin work kal 4% an lo tham vang te kha alo ni a, khang kha a document ah hi chuan ka nei a, mahse ka sawi zui thui lo mai ang a a tha awm e.

Tin, Pu Speaker, chutih rual chuan chanchinbu pakhat ah document hi in ti in ti a, ka inthlahrung hle na a a pawimawh ve tho si a. Helaiah term hmasa ah tho chuan chanchinbu ah kan hmu a, Pu Lalremliana Pachuau hian R.D Department sum nuai 322 khawiah nge tih kha a rawn sawi a ni. Hemi avang hian Tuipang BDO pawh kha ban a ni tawhin kan lo hria a, kha kha a zia lo ka ti khawp mai a, waviin ah kan official hotute tam tak helaiah in awm a, theihtawp chhuah tute in ni a. Chu chu Tuipang BDO office pawisa kha kan han enchhin kan han enchhin a, helai chanchinbua an rawn chhuah dan chuan, "Tuipang BDO office pawisa C.M hovin an hmang luh luh" tih kha a rawn lang ta a ni. Hei hi chu Pu Speaker, House property ah ka lo pe ang e. Tuipang BDO pawisa an hmang luh luh mai a rawn ti a, tah chuan BDO pakhat in suspend a tawh tawhna a nih rual khan, official atanga sum an lo tham hrim hrim hi nuai 12 vel a awm a ni. Kha kha pawl ka ti khawp mai a, waviin ah hian khami kan BDO bang ta kha a fel e, a tha e ka tih na lam nilovin sorkar in an tham an tham kha chuan engemaw deuh hi chu thil awm ve thei a ni a, a victim a kha 'se hnuhnung in vuak a tuar' tih ang deuh khan ama tih loh thleng thleng khan a tuar nimai awm khan ka'n hria a, kha kha pawl ka ti khawp mai a, hetiangaw pawisa mahni mimal thil a kan lo hmang kan lo hmang a, kan House-a kan member te hming pawh a lang nual a ni hengah hian. Khang te kha thil fel lo tak mai ani a. R.D sum hi kan fimkhur a ngai a, mipuite chanai liau liau a ni tih kan hriat a tha in ka hria a, kha kha Pu Speaker, kan sawi duh leh bawp a ni.

Tin, Pu Speaker, Land Revenue chungchangah khan tunhnaiah Vaivakawn zum laiah khuan kan sorkar in nuai 70 vel in ram zim te an lei a ni awm e, mahse khu a tha khawp mai a, nichin a traffic jam thin an tih nalai vel kha anni bawp nen, khulai khu lawmawm ka ti a. Khu khu kan Sorkar a fing hle in ka hria a, khulai khu a tha ka ti a. Tin, Pu Speaker, chumi rual a ka'n sawi duh chu sawmi Bawngkawn, Sairang road leh Chaltlang road zumlai saw, kan term hmasa khan kan Chief Minister zahawm tak khan PMGSY hna pein sawlai saw public purpose atan ruahmanna neiin an lo pe tawh a ni. Amaherawhchu tunah sawn party mal pakhatin an ta neih leh ta hlauh mai a, saw saw kan Revenue hotute hian eng ang chin nge min hriatpui kha ka hre duh a. Saw lai saw kawng han zauh nan a tha khawp mai a, Chaltlang atanga rawn chhuk thlak a veilam tawp, traffic point opposite ni si, Sairang road intanna zum vel a tuna sorkar ta tura phal taka a neitu ten an lo pek ve, an phal loh chung chung an lo lei tir an han tihfel tak hnu a party mal pakhatin an han neih tak, a luah man pawhin "Hnam Run enkawl na chu a tum thei e" an han tih kha a ni ta a. Sawlai saw kan Minister khan CM hmasa in a lo bawhzui tawh ni mah sela public tan kawng zauh nan khan tih theih dan a la awm ang em aw tih kha kan Revenue Minister khan min lo chhinchhiah sak se ka duh bawp a. A

document-a a lan dan chuan “for extension of roads for public purpose” tih a ni a, public tan liau liauva sawlai hmun zim lutuk mai kha, kan sawi tel duh a ni.

Tin, Pu Speaker, sawi tur hi chu a tam khawp mai a, kan Police Housing chungchangah khan nuai 880/- zet mai kha a rawn awm a. Nuai 880 rawn awm kha tha ka ti a. Tin, chutih rualin kan bial lamah a lo awm lo a. Mahse kan hotute hian systematic takin hma an la a ni ang a, tih ka rilru ah a rawn lut a. Sorkar hmasa ah khan Police Modernization Scheme-ah khan 56% kha a nih lohna turah khan an hmang a ni. 44% chiah kha an hmang a, an hmanna tur ni awm anga CAG Report in a rawn sawi dan chu, ‘decreasing housing shortage from upper and lower subordinate of police force by at least 20%’ tih te, ‘construction of buildings for Police Station and Out-post and equipped them with adequate number of vehicles’, khatiang atana hmang ta lo khan thildangah, mawza man to leh thil tam takah khan an hmang a. Chumi avang chuan tunah hian hmun hrang hrangah kan Police Out-post leh kan Police Station te hi thuan ngaiin a la awm reng a, duhthusamin an la awm thei lo a ni tih kha ka han sawi a.

Tin, hei a pawl ka ti khawp mai a, Mizoram naupan zia hi a la lang tlatin ka hria a. Sum awm hmasa apiang kan tham a, a rem remah kan han zep ta thin hi a pawl khawp mai. Modernization Scheme ah phei hi chuan kan ram himna hi kan ngaih pawimawh ber a ni lo thei lova. Kan ram himna ngaihtuatu turte’n Police Out-post leh Police Station an neih kan duh laiin, Champhai angah te chuan tuna Police quarter thenkhat te phei hi chu 1957/58 a sak tawhte kha an la ni a. Film ah te chuan chhuah dawn ila Cowboy tawmna buk lema channa mai mai tham a ni tawh; khatiang hluh tawh te kha an ni a. Modernization Scheme kan han tih hi a nihna ang tak chuan hmang ta ila chuan hmasawn deuh tawh tur kan ni a. Chutih rual chuan, tunah eng ang chiah nge kan fund neih kha min han hrilh thei se ka duh a.

Brig. T. Sailo hun lai khan Mizoram leh Cachar ramri kha tihfel tumin kan khaw tlangval Pu Chawngkunga hovin an zu thawk chhuak tawh a ni. A sulsutu ber a ni a, engpawh huamin theih chen chen kan kal ang an ti a. Amaherawhchu chutih lai chuan kan MNF, khatih laia mite khan, ‘kan salu hawn tur a ni a, min lo khalh suh u’ an ti a, chuang chuan bawhzui kha a rem ta lo a ni. Tichuan, kha thuthlung kha he Mizoram Inremna Thuthlungah khan an rawn telh dawn emaw kan ti a. Amaherawhchu, remna kha hmanhmawh luatah an rawn hawn ta lo ni khan kan lo hria a, vadaithlak takin an rawn ti tel thei lo hlauh a. (**SPEAKER** : Tih tawp tum tawh rawh aw) Kan zirlaite thin a dam thei thlawt lova, Zo Run an zu sa a, tichuan kan sorkar ngei khan a zuk thiat sak leh a, kha ta tang khan thangtharte zingah hian he kan ram hmangaihna chi nung thar hi a rawn arh chhuak leh a ni. Tunah hian kan ram zirlaite leh thalai tam tak te hian ramri tih chian an duh a, chu ramri tih chian an duhna karah chuan, kan sorkar in Boundary Committee a han din te hi lawmawm ka ti a. Kan ramri hi kan hre tur a ni, kan humhalh tur a ni, kan tihfel ngei tur a ni tih kha tawite in ka han sawi duh a ni a.

Hun a awm tawh lo a, ka sawi tawh lo mai ang a, kan Demand hi ka han thlawp e.

S P E A K E R : Tunah Lt. Col. Z.S. Zuala kan ko ang a, a dawtah N.P. Chakma, a dawtah P.P. Thawla. Tunah Lt. Col. Z.S. Zuala.

Lt. COL. Z.S. ZUALA : Pu Speaker, ka lawm e. Pu Zothansanga te thusawi zawha thusawi pawh hi a huphurh-awm ang reng. An sawi thiam si a, kan thusawi hi in lo ngaithla thiam a ni ang chu.

Nichinah khan Pu Rinawma khan Bible te kha a han quote a, khata tang khan ka rilru ah a lo chhuak ve a, 'Ram chu Lalpa ta a ni', tih kha a lo chhuak a. Chuvangin, ram lampang hi sawi hmasak ka han tum ang a. A hmasa berin Land Revenue & Reform Demand ah hian.

Khu mi Vairengte a Counter Insurgency and Jungle Warfare School ram chungchang khu sawi tha in ka hria a. Hun engemaw chen an ram khu tih fel loh in a awm reng a. Tunah khuan an ram chungah khuan improvement leh installation tam tak sak an duh a. Hemi avang leh ram a fel loh avang hian an ti thei lo reng a. Entirnan; Counter Insurgency School' ti a tunhma a kan hriat ang khan, Jungle Warfare School ang a ngaihna a awm a. Tunah terrorism te a awm a, urban insurgency te a lo hluar a. Entirnan Afghan ah te Insurgency chi dang, terrorism ang chi te a tam a. Khatiang ram ang chiah, training nan village te construct an duh a ram a, la fel si lova. Tunah khuan, heti laiah ram in pek theih loh chuan north-east state dang hian ram min offer a, min welcome em em an awm si a, hetiang ram min pek theih loh chuan chhuah san mai pawh a ngai ang te an ti a. Khu School khu kan hriat angin kum engemaw chen a awm tawh a, local te nen pawh khuan an in kawmngaih in mi tam takin eizawn nan te pawh an bel a. Chuvangin, khu mite khu an chhuah a hlauhawm em em a, economically pawhin. Tin, internationally a mi ina an hriat lar, ram hrang tam tak atanga training nana an rawn hman pawh a ni a. Khu khu kan ram atanga an tin chuan an uihawm dawn khawp mai a. Tunah hian a ram neitute compensation thubuai avangin Court-ah te an kal a, khatiang kha a theih hram chuan amicably a settle dan te hi kan sorkar hian a zawng thei lawm ni ? Khawvel ram tam takin Mizoram an lo hriat phahna te a ni bawk a. Chutih rual rual chuan Tourism ah te pawh tangkaina a awm chho zel dawn a. Tin, a local mi tam takin eizawn nan an lo behchhan te pawh alo ni bawk a, chuvang chuan khutilaia ram neitute pawh in ngaihtuah Chiang se, hetia buaina an siam chhoh zel chuan thil ropui tak kan ram tana tangkai tur kan chan phah mai thei a, nakin hnu a kan thatpui dan tur te ngaihtuah in in hnuk hniam thei se a lawmawm hle in ka ring.

Nichinah Pu K. Lianzuala kan member zahawm tak khan Chhingchhipa Sainik School atana ram neitute chuan engmah claim lovin voluntary in an surrender vek a ni. Kei pawhin ka han hmu ve a, an ram te chu a tha khawp mai, Teak huan, Teak puitling deuh thaw Ui pum tiat tiat te leh Ngiau hmun tha tak tak te leh ram rem tak tak te kha nakin hnua an tu leh fate tan a tha tur anih avang khan an surrender thlap a ni. Khiliah khian compensation pakhatmah pek a ni lo ka hriat ve chinah chuan. Khatiang zawng khan Vairengte leh khutilai vela ram neite hi helai atang hian kan han dil nise, an in withdraw theih a, khumi ram khu sipai in an develop theih turin min han kian thei se a lawmawm khawpin ka ring.

Tin, a dawt leha chuan tunlaiin kan hriat lar em em Assam Rifles ram chungah hian private tam takin LSC neiin an lo awm a, tunah hian Assam Rifles hi chhuak ta se public ta tur a ni e kan ti a. Hemiah pawh hian kan Department in-charge te pawh hian hma an lak dante pawh hi ngaihtuah pui an ngai hle in ka hria. An DIG Brig Rawat a hming han sawi ta mai ila, a thahnemngaihna avangin nasa takin improvement chu a awm dawn niin a lang a, hengte pawh hi keini a ram neitute hi chuan an ni te ai hi chuan hma kan la nasa zawk turah ka ngai. Ani hi theih ang tawka puih a, Assam Rifles ram pawh hi mipui tan kan neih theih ngeina tura tan lak hi pawimawh hle in ka hria a, Revenue ho te pawh an

thawk nasa in an fakawm hle nachungin. Engpawhnise, hei aia nasa hian hmalak dan kawngte zawng ila a lawmawm hle in ka ring.

Tin, LSC nei tam tak hi NOC nei fumfe lo an nih te pawh ka ring a 1972 khan kei pawh hetilaiah hian Assam Rifles-ah hian ka awm a, chutihlai chuan “Inhmun i duh ve lawm ni” te pawh min ti a, mahse “Inhmun te chu ka nei e”, tiin ka lo accept ve lem lova. Khang hunlaia NOC proper pawh la lem lova tih mai mai te pawh kha a awm nualin ka ring a. Hmanah Sainik Directorate Office turin ram kan han teh dawn a, Assam Rifles ram chhungah anmahni Assam Rifles authority te leh Revenue te nena teh tura kan han din khan LSC nei pathum kha an rawn in tarlang thawt mai a ni. Chu pawh chu tuna anmahni ram chhung ngei ngei, an hungchhung ami a ni, khatiang deuh khan helai hi an chhuah hunah phei chuan a la buai tial tial dawn a, Revenue lampanga kan hotute hian nasa lehzuala hma an lak hi a ngai hle in ka hria.

Tin, land record hi in han sak dawn emaw, public tan thil han ti ram hi a record hi a chiang lo deuh nual hlawm mai a. Ram record ah hian kan tan a ngaiin ka hria a. Tunah Cadastral Survey te an ti a, ram record hi hei aia tha leh zual hian neih tum ila, a lawmawm ngawtin ka ring.

Home, Demand No.16-na hnuaiah hian Sainik School kha an rawn sawi tawh a. Sawi nawn leh pawh a ngai tawhin ka hre lova. Kum 10 hma daih khanin Congress ministry hnuaiah tuna kan Chief minister zahawm tak hnuaiah hian a hmin tep a. Amaherawhchu, sorkar dang a lo ding ta a, anni khan an interest loh zawng a ni a. Tunah, tun ministry, Pu Hawla kaihhruai hnuaiah hian, sorkarna kan neih ve leh khan Delhi a kal hmasak ber khan project report kengin hma a la nghal a, a hma lakna tunah hian a lang a. Tin, kan tu leh fate hovin an tangkai pui tur dan hi ngaihtuah ila. Entirnan, Manipurah khian Sainik School an neih avang khian Central Service ah te leh Defence ah a bikin Defence service ah ringawt pawh khian tunah hian officer 1000 zet an nei a. General te pawh an nei tawh a ni. Mizoram chu khang te nena han compare chi kan ni pha lo hrim hrim.

Tin, Home Guard hi han sawi ka duh a. Home Guard hi tunhma khan Ex-service ten an raise din a ni a. Tin, Ex-service ten an siam tha em em a. Tunah hian hetiang dinhmun hi an lo ni ta ni. Tin, CTI an din a. CTI pawh India rama Home Guard Training Centre tha ber te pawh an ti a. Khatiang Ex-Service in a an enkawl a an dawm chhoh a, hetiang a lo sei lian a ni a. Home Guard ah hian Ex-service, permanent staff ah hian a tam zawk hi lak a tha in ka hria a. An training system pawh military bearing nei deuh a an training chuan Home Guard pawh hi a tha chho zel turah ka ngai a.

Tin, a dawt leha chuan Police modernisation tih kha a awm a. Hei hi a tha khawp mai a. Police modernization-a tha bera ka ngaih chu a mihring a te modernized train hi a niin ka hria a. “Man behind the weapon” hi a pawimawh ber. A mihring a te an that chuan equipment leh firearm eng pawh nise an tha tho tho ang. Tin, chumi rual ruala equipment leh an firearm te leh thildang tha an neih chuan police tha tak an ni ang a. Tin, sorkar hmasa ah khan IR Battalion 5 an raise a. An recruitment dan te kha a lungawithlak tehchiam lova. Ama’rawhchu, tuna awm ho te hi an tha lo e, ka tihna a ni lova. Chuvangin recruitment ah hian fimkhur ila. Kei ka duh dan tak phei chuan police kan recruit dawn a nih chuan, battalion emaw kan raise dawn a nih chuan, Army Recruiting Department hi ruai tawp mai ila. Anni khan engmah thlei bik nei lovin a tha kha min select sak tawp mai se tih te hi modernization a kan hma lak dan tur tha ber te a ni mai awm mang e aw ka ti deuh.

Tin, RD ah hian NRGs hi, keini chu min kal san tawh a. Aizawl khawchhung ami chuan kan chang pha tawh lova. Amarawhchu, thingtlang lama an kal pui dan hi ka hlauhthawn ber chu thachhiat kan inzirtir ang tih ka hlau khawp mai a. Hemi hi kal ta zel se, kum 20 dangah chuan zelthel zawnga hnathawh dan hi kan inzirtir ang tih a hlauhawm khawp mai. Hna kan thawk dawn a nih chuan working hours te pawh tha deuh zawkin tih te hi zirtir nasa ila a that ka ring a. Tin, chubakah an sawi fo, material component hi hei hi enggemaw tia sum siamna hnar atana hman hi an sawi nasa ang reng a. Hetah pawh hian kan RD minister zahawm tak hian uluk deuh zawkin kalpui dan zawng se... kan hmang tangkai bawk anga tin, kan habit kan tichhe lo bawk ang tih kha kan sawi duh chu ani e Pu Speaker ka lawm e.

S P E A K E R : Awle a lawmawm e. Tunah Nirupam Chakma.

Pu NIRUPAM CHAKMA : Pu Speaker, hun min pek avangin ka lawm e. Hei 10 mins. chhungin department pariat sawi chu ka tan chuan tihngaihna a awm lova, chuvang chuan tawi te tein tlem tlem kan sawi ang a.

Soil & Water Conservation te, Corporation te Fisheries te Congress sorkar hmasa ah khan a enkawltu Minister ka ni ve a. Ka tan chuan heng department te hi sawi pawh ngai lovin ka duhsak a ni tunhma a ka lo enkawl tawh a nih avangin. Fisheries Department ah tawite ka sawi duh chu a achievement hi tha ka ti a, mahse nasa taka tan lak a ngai a, pawnlam atanga sangha kan lakluh a ngaih loh hunah he department achievement chu a lang dawn a ni. Export chu sawi loh self sufficient pawh kan nei thei lova tun thlengin, tan lak chu a ngai a ni. Chawngte bazaar ah pawh Silchar sangha kan la ei a, Saiha te, Lawngtlai te leh hmun dang dangah te. Aizawl ah chuan pawnlam sangha lo chu zawrh tur a awm tak tak lo a ni. Chuvangin buhfai ah self sufficient thei lo mahse sangha ah chuan theih dan chu a awm a nia. Chuvang chuan Minister zahawm takin nasa takin tan a la a, Budget ah pawh engemawzat a awm a. Tin, NLUP hmangin ka bialah ringawt pawh chhungkaw 300 chuang fishery ah kan pe tawh a, bial tinah Mizoram pumpuiah tuna beiseina sang tak kan neih chu he NLUP hmang fishery hi nasa takin develop mek in a awm a chuvang chuan reilote ah kan self sufficient ang tih ka ring a.

Tin, Soil Department hi achievement ropui tak a ni ka ti, performance budget leh work performance budget pawh kan en thei a. NLUP hmangin chhungkaw engemawzat tanpuina kan pein tunah sum te pawh an lalut thei a, more than two crore kha chu ropui tak a ni. Kan bialah broom cultivation kan pe lo va, a chhan chu natural broom kha a tam em vang a ni. Pe ta ila chu mi tam tak khan engmah thawk lovin a sum a kha an eiral mai mai thei dawn a ni, natural broom a tam avang khan kan encouraged duh lova. Amaherawhchu, kha kha minor forest produce angin harvest a ngai a, tunah a zawrh dan tur lam kha an ngaihtuah mek a, zuar te pawh an awm mek tawh a ni.

Corporation te chu nichina kan sawi Corporative Development Council. Pu Speaker, Corporation Department hi ka lo enkawl tawh anih avangin Corporative Society, Society hrim hrim hi Mizoram ah hian a hlawhtling lo emaw ni ka ti mai. May be we do not know how to corporate is that chuti nilo se chu achievement ropui tak a ni. A bik takin Agriculture sector hi ram dangah te, state dangah te pawh cooperative sector ah a awm vek a ni. Dairy tuna Gujarat a Dairy Farming te pawh

Vety sector ah hma la in Amul te an siam thei a, Mizoram ah Corporative Society tun thlengin achievement hi ala tha tawk lova State level emaw, District level emaw Village level emaw tanlak chu a ngai a ni. Chuvang chuan technicals thil deuh a ni a, corporator te training ngaipawimawh sela department in, chutah chuan Corporative kaldan hi an thiam thei ang a; tin, Corporative Society management pawh an thiam ang a, chumi hunah chuan corporative hi kan kalpui thei ang.

Tin, Excise -ah khan Total Prohibition kan passed a sorkar hmasa ah khan, tunah zu chungchangah khan khap burna dan a mawhphur tute kha chu Congress sorkar kan ni, a chhan chu kan sorkar laia passed a nih avangin. Amaherawhchu, chumi hnu rei lo teah implement a ni 1997 ah khan. MNF sorkar khan failure an chang tam zawk daih a ni. Chuvang chuan he dan hi chhim lama District Council hi exampsted area a ni a, mahse chuti chungin kan hriat dan chuan, (ka experience atangin ka sawi a nia) sap zu chu Aizawl, Lunglei district dang aiin an tlem zawk daih ang, Duichuanni erawh chu a awm exam chi loh a ni. Tin, liquor vangin case pawh kan nei tlem, amaherawhchu he bill hi exempted area a ni a, engatinge examted area a nih loh, he bill implement-na area-ah, chuti taka kan buai, hei hi chu kan ngaihtuah a ngai a ni. Tin, discriminatory kha session hmasaah pawh ka sawi a, sap tourist-te vai tourist-ten bottle-in an keng thei, an in thei, keimahn in kan in thei silo, discriminatory a ni lawm ni. (When the situation demand that has to be changed new policy should be a adopted) chuvang chuan committee report kha sorkar pawhin ngun takin ngaihtuah sela.

Tin, land acquisition chungchangah hian Mizorama land acquisition hi AInd Acquisition Act 1894 hmanga India ram ang bawkin keini pawh DC te an acquire sak thin, a mamawhte tan. Mahse engatinge land acquisition awmna apiangah sawi a awm thin, chumi awmzia chu land acquisition dik taka procedure zawm lovin acquisition procedure hmanga kalpui thin anih avangin a ni mai thei a ni. Chuvangin ngenna ka siam duh a, Revenue Department relate anih avangin Border Fencing Bangladesh Area-ah khan, Indo Bangladesh border ah 13.11.2006 Mizoram Gazette-ah he notification hi chhuah a ni a, acquisition of land for construction of Indo Bangladesh border fencing along Indo Bangladesh border tih chauh a ni. Ram neitute tan objection siam theih an ti a, along Indo Bangladesh border, kilometre zat a sawi si lova, along Indo Bangladesh border te chu ram tam takin an nei ang chu, kilometre zat kha a sawi si lova, a distance kha, MNF sorkar laia notification siam a ni a, chuvang chuan mi tam tak an buai a, border fencing kalpui dan hi Pu Speaker, hun tlem min pek belh a ngai ang a pawimawh si a, ram issue a ni a, 30 feet chiah chiahah a kal a ni. Anah chuan 0 point atangin 150 yards chungah fencing kha kal tur a ni a, mahse hmun tam takah 500 metre te, 1 km te, 2 km te inside-ah a kal a ni. Khaw pakhat chu Silosora khua kan bial lamah Bangladesh ram an ti daih a ni. Mizoram State Boundary Committee-ah pawh hei hi an sawi a, an study a; tin, Committee Chairman Pu Chawngkunga, tuna Committee Chairman, State Boundary chairman kaihhraina hnuaiah pawh spot visit te an nei tawh a, helaiiah a position chungchangah project lian apiangah land acquisition chu a awm dawn, tuna Bairabi – Sairang Rail kawng awm turah pawh kei chu kan sorkarin hma kan la a, mahse hetia land acquisition kan ngaihtuah chuan kum engzah nge ngai ang aw ka ti mai. Land acquisition ah kan buai ang, a project lian apiangah kan buai zel, chumi bawh buai loh nan khawngaih takin kan DC te pawh training a tul anih chuan tunah hian Acquisition Act expert hmangin training pek tur a ni, chutilo chuan kan buai zual zel ang a, Mizoram mipui hi court ah kan kal kan kal ang a, a fel lo ang. Hei hi sorkar policy ang pawhin lak a tul a nih chuan DC te a bik takin Revenue Department-te, DC staff te pawh training pein kalpui dan kha ngaihtuah sela.

Tin Home Department hi tha ka ti a, hei vawiinah lawmawm tak chu law and order chungchangah sawi a awm vak tawh loh hi a peaceful a ni ang, Mizoram chu kan lawm a ni ang, tunhma chuan law and order chungchangah kan buai thin a, dawhkan chung te pawh kan chum a, vawiinah erawh chuan hei Minister a fakawm ka ti a, Police Department-ah Borapansury-ah quarter min sak sak dawn a, amaherawhchu contract kan inpek ngei a tul dawn a ni. Ka lawm e.

* Speech not corrected.

S P E A K E R : Tunah Pu P.P. Thawla ilo ko ang.

Pu P.P. THAWLA : Pu Speaker ka lawm e. Demand 16 na Home Deptt. atangin han tan ta ila. Home Deptt. hi misual tam tak tan chuan deptt. hlauhawm a nih laiin mi sual lemlo tan erawh chuan kan thlamuanpui deptt. a ni a, a lawmawm hle a. Ka han sawi tan duh chu kan hnung lawk ni 20 July khan kan Home Minister zahawm tak bial ah Bus accident rapthlak tak Keifang bulah a thleng a pawl ka ti em em a. Khatihlai khan Saitual leh a chhehvel khaw tam tak ten zanlaia thil thleng mah nise khawvar hmaa mithi ruang an seng fel hman vek mai te leh hliam tuar te pawh an buaipui zawh hman vek thu Transport Minster zahawm tak khan a tarlang a, ropui ka ti a, an entawn tlak ka ti a, communication that vang te pawh a ni ang a khatiang kha he House ah te pawh ka han tarlang duh a. Tin khatih rual khan heng mitthi te ralna an lu man cheng nuai 1 (150,000) leh sing 5 theuh pek an ni tih thu kha House Leader zahawm tak khan a puangin ka hria a, a lawmawm ka ti a, hetih rual a House han hrihlfiah tul a ka hriat chu hman deuh ah khan Darlawn bul ah pawh khan Bus accident kha a awm a, khata mi te kha cheng engzat theuhvin nge pek an nih ka hriat ve mai mai dan chuan interim relief Rs. 50,000 theuh pek an nih thu kan hria a. Tin, nikum lamah khan Seling daiah lung delh hlum unau pahnih thi Rs. 1,00,000 theuh pek an nih thu te kan hria a. New Serkawr dai a electric in bus a man a mi 9 tih thu House ah khan ralna pek chiang tak hriat a awm lem lova. Dan leh dun awm mumal lova House in a hriat kha thutawp a ni mai a. Hei hi ka duh tak tak chu hetiangah thi te ral chungchanga dan mumal hi a awm nge awmlo tih House hriattir theih ni sela, chu chu tha in ka hria a ni.

Tin, Home Department hnuaiah hian Saiha ah Fire Department an awm ve a, a chang chuan an mualpho va, a chang chuan an tangkai ve em em thin a. Heng atan kan sawi duh chu tui chawina tur a hla thin si a, kan motor neih te hi a tanky te a te si a. Chuvang chuan vawikhat hman zawh ve leh a a dang lak lehna tur hi a hla em em mai a. Chuvang chuan an awmna hmun an station bulah hian tanky lian tawh tanky han thunkhah leh na tur hi siam sak theih ni hram sela a tha lawm ni tih kha ka han tarlang duh a ni.

Tin, ka bial chungah Burma lam atanga mi an lo luh theihna kaw khat Phura khaah hian outpost a awm ve a, Police te, MPRO te, MAP te pawh an awm bawh a. An awmna hmun hi khawlum hmun kilkhawr, hmun har outpost a ni a. Kan sipai hoten hmun kilkhawr mahni se hreawm lutuk a an awm loh nan an chenna hmun tur quarter te han sak that deuh ni sela. Tin, an sanitation lampangah zun leh ek thiarna lampang ah, hian ngaihsak deuh ni se a tha awm mange aw ka ti a. Nikum lamah khan MLA fund atang khan SP te hovin, DC te hovin kan han buaipui laih laih a, chu chu a tlin ang tawh kha chu kan han ti a, tun hnu atan zelah an chenna leh an zun ram thiarna lampang te tha zawk an lo neih theih nan sum dah sak theih ni sela a lawmawm hle in ka ring a, chu chu kan tarlang duh a. I.R Battalion 5 kan nei tawh a, pakhat tal hi chu undivided Chhimtuipui District chungah hian awm thei sela tih sorkar hmasa lam ah te khan sawi rik a awm thin a. Kan han beisei thin,

mahse tun thleng hian undivided Chhimtuipui District chhungah IR Battalion awm thu kan la hre lova, a theih hram lawm ni tih ka han tarlang duh a ni. Tin, IR sipai ho state dang ah, state hlauhawm ah te an lo awm hian an hun chu kum 2 ruat sak niin ka hria a. Tuna Assam state a awm te hi kum 2 aia tam an awm daih tawh mai a, hei hi extend thar a ni ta nge? Hnuak khawtlai mai mai nge an nih tih lai hi chianguang taka hriat tha in ka hria a. Tuten emaw kum 2 an zawha an kir leh laia a then ten kum 2 chuang chuang hreawm taka anlo awm te hi a fel ber ang em ? Enthat thei ni sela ava tha awm em tih ka han tarlang duh a ni.

Tin, Pu Speaker, Rural Development, Demand 38 na ah hian han sawi rik ka duh chu BADP Boarder Area Development sum te hi Block awmna apianga bialtu MLA te hi chuan BADP sum an sem dan working agency te, work order list ang te hi a copy lo nei ve thin ila. Hmanah khan kan nei zeuhvin ka hria a, tunah chuan kan nei tawh lova. Hei hi a tangkai lutuk lem lo na in bialtu MLA ten a an zin vei vah pah a an hriatchian theihna tur atana copy pakhat in pek te chu thil harsa a nih pawh ka ring lem lova. Chutiang chu lo beisei leh ila a tha in ka hria a, Department lamin min lo hriat sak se la. Chutiang bawkin IAY, miretheite insakna tanpuina te pawh hi Project Director, DRDA atangin emaw order an chhuah copy te hi bialtu MLA te hian lo dawng ve zel thei sela. Tichuan dawng tawh te leh dawnglo te kan lo hriat hran theihna tur atan pawh a tha in ka hria a. Tin, chubakah waiting list te pawh hi bialtu MLA te lo pek ve theih ni sela a tha in ka ring. Hei rangva an semte kan hria a, a lawmawm hle mai a, nikum lamah khan R.D.Department atanga an rangva semte pawh kha kan hria in ka hria a. A tangkai hlein ka hria, kuminah Mara Autonomous Council Election-ah hian rangva hi Band 1500 lai lei a ni tih thu leh MDC bial khatah band 60 theuh sem a ni tih te ka lo hria a, ruling ni velo tan chuan kan awt kan ti dawn nge niang chutiang chu kan dinhmun a ni. Engpawhnise, ka han sawi duh tak chu kan R.D. Minister zahawm tak hi keini i veilama thute ho hian kan bialah ruling-in an hmuhmaih hmeithai pahnih khat tal kanlo tanpuive theihna tur hian quota hnih thum vel emaw tal hi chu a ruk a rala inpek theih dan awm sela, a tha awm mange aw tih kha ka han tarlang ve duh a ni.

A dawt lehah chuan Pu Speaker, Demand 33-na Soil and Water Conservation ah, Bible thu nen lama han sawifiah a ni kha a lawmawm hlein ka hria a. Heta ka han tarlan duh chu rubber plantation chungchang thu ah nasa takin hma lak a ni tih kan hria a. Hman niah khan India ram Rubber Board Chairman-te pawh a lo thleng a, mahse kan lo dawr ve hman lo va. He department enkawltu Minister zahawm tak hian Saiha District lampang a rubber ching duhte tan hian induhsak theih dan min lo ngaihtuah pui se tih ka han tarlang duh a. Coffee Plantation Tuipang 'L' daia ram zau tak awmte kha tunah hian a Division ber a function tak lohah chuan ti hian a tawl mai mai thin a. Hengte hi engtingnge department-in an tih tak, midang kuta hlan a nei em tih ka han tarlang duh bawka ni.

Co-operation-ah Demand No. 37-naah hian han tarlan duh ka neih chu, tunah chuan Board of Director enkawltute ho hun hi tih sei a ni ta a, a lawmawm hle a. Apex Bank kan lo enkawl ve thin lai chuan kum khat lek lek inthlan a ni thin a, a ninawm ang reng viau a, a reilo duh khawp mai a. Tunah chuan kum 3 te, kum nga tih pawh tum a ni tawh awm e. A lawmawm ka ti a, amaherawhchu chutih laiin nikum lam aiin cheng nuai 303 in a tlem ta emaw ni, ka hriat ve dan chuan, hei hi a va pawh awm ve, mirethei te innghahna a ni a, Co-operative Society hi , chuvang chuan dante pawh kan siam thar zel bawka, hengah hian kan sorkar hian a zau thei ang berin mipuite dawmkan nan hma la sela tih hi ka duhthu ka han tarlang a ni e. Pu Speaker, ka lawm e.

S P E A K E R : I van thiam em em, thusawi tawi thiamte chu koh nawn an hlawh dawn si a tih ang deuh khan koh nawn a va chakawm ve. Le, kan chawl rih ang a,

Pu Duhoma hian ala sawi lova, a sawi duh ngeiin ka ring a, i phal em ka pu, Pu Sela'n ala sawi duh a, chuan dar 4:30 ah kan tan leh ang a, tah chuan Pu Sela'n sawi sela, chutahchuan Pu Lalduhoma'n tilam ka veilamah chuan han conclude sela, chumi hnuah chuan Minister-te sawm dawn ta ila a tha awm e. Chuan kan chawl rih ang a, dar 4:30-ah kan thu leh dawn nia.

4 : 30 P.M.

S P E A K E R : Sawihona kan chhonzawm ang a. Pu R.Selthuama.

Pu R. SELTHUAMA : Pu Speaker, ka lawm e. Hun a tawi a ka sawi zung zung ang a, a hun dik tak hman ka'n tum ang e.

A hmasa berin Home hi kan sawi ang e. Tunlaih chuan kan police-te pawh hi an fakawmin an tha tawh hle mai a. Tunhma kan pi leh pute chuan naupang sual deuh chu, 'tap suh, sual suh, police-in a man ang che,' an ti a, an in sawi thiah thin. Chutih hunlai chuan England-ah chuan, 'harsatna i neih a, tawhsual i tawh chuan police hnen pan rawh,' an ti. Chutiang chuan mi ram leh ram changkang ah te chuan police hi an himpui a ni. Tunah hian chutiang hun chu kan hnaih ve hle tawh a, kan police te hi an fel in an tha tawh a, hma an sawn tawh khawp in ka hria a, a lawmawm a ni. Amaerawhchu, chutih chhung chuan thangthar deuhte nge ni ka hre lova, thenkhat laiah hi chuan zanah te la ruibuai deuh mai mai te pawh hi an la awm ve a. Hmanni lawk pawh khan kan vengah sawn an intibuai deuh va, chungah te chuan police te pawh kha a rui pawlah khan an la tang ve a. Chuvangchuan, insiamthatna tur chu an la nei chuti chung chuan an tha tawh hle ani tih ka'n sawi duh a. Tin, kan ram pumpui dinhmun han enin tunah hian tualchhung a muang tha a, India ram state ah pawh ralmuang berte zing ami pakhatna kan nih loh pawn pahnihna kan ni bik lovang, chutiang dinhmun ah chuan kan ding a. Chuvangchuan, Home changtu kan Minister hi a fakawm ka ti a, a hnuai Police te an che tha a ni tih hi tawitein kan sawi ang e.

Tin, chumi dawtah chuan R.D.-ah han kal leh ila. Rural Development hi tunhmain kei pawh kum 7 leh thla 7 zet chu Director in ka awm ve a. Khatih hunlaih kha chuan AMC tihte ala awmlo bawk a, khawpui chhung te pawh hi Community Hall sak tih ah te pawh hian kan la hma vek thin a. Tunah chuan a hmingin MLA te kan ni a, kan bialchhung tan Hall sak kan dil a. Kan R.D. Minister hi ka va dil a, ka bialah hmun hnih ah Hall an la nei lova ka ti a. Kumin atang chuan kan ti tawh love a ti tlat mai a, min peve thei lova. Hall nei lovin tun thleng hian ka bial chhungah veng 2 an awm a. Chu chu a paw ka ti khawp mai a, kan UD & PA lam kan dil lah hian min la tihsak hlei thei lova. Chu chu waviin ah hian kan sawichhuak duh a.

Tichuan, R.D. bika ka sawi duh chu rangva sem chungchang hi a ni a. Hei hi a tha hle mai a, tunhma R.D. a kan awm lai khan Plan discussion a kan kal tumin Central ah pawh min lo en sak a. New Delhi ami te pawh hian rangva sem hi a tha an ti. A scheme a hi a tha an ti a. Hei ai hian la tizau deuh ta ula, tuizem leh tuidawn siam ta ula, chutiangchuan a dawngtute tan pawh hian a chhawrn na awm ang a, a famkim deuh bawk ang. Chutiangte chuan ti teh u ti te

pawhin minrawn a. Kan sawi duh kher kher na chhan chu kumin kumtir lamah khan kan bial chhungah vanduaiana kan tawk a. In a kang a, mihring pawh 3(pathum) lai an kang hlum a. Chungah chuan, bialtu Minister zahawm tak R.D. Minister Home Minister ni bawk te pawh hi an lo kal a. Chung kang tuarte pawh chu rangva inchung tur rangva min pek sak a. A chungah hian kan lawm khawp mai. Tin, chumai nilovin, ka bial chhunga hmeithai harsa in turte an han rel a; mahse, a chung leina te an nei lova. Chungte pawh chu rangva min lo pek sak a, chungte an lawm khawp mai a. Ani han sawi dan pheichuan, "hei kum 10 lai ka pa te

kha pawl dangah an awm thin a, Unit a a hruaitu pawh a ni a. Mahse, engmah dinhmun leh tiang hi min pe ngai lova, engmah hmuh kan nei ngai lova. Tunah Congress sorkar chuan rangva in chung tur min han pe a. NLUP min han pe bawk a, pawl dang hi chu kei chuan ka thlang thei dawn lo reng reng” a ti a. Chuvangchuan, chung ang beisei vanga pek nilo mahsela an pek azarah khatianga min lo pui duhte a nih kha chuan a lawmawm a, he scheme hi a tha, mi harsa te tan a tha em em a ni. Kuminah hian nuai 400 lai an nei leh te hi a lawmawm ka ti a. Tin, hemi loah hian R.D. bika ka han sawi duh chu nichina Aizawl South-II bialtu in a rawn sawichhuah kha NREGA – hei hi a tha hle a, inhlawhna neilo tan chuan inhlawhna tha tak a ni a. Amaerawhchu, hmanni khan kan khawlam amite ho an lo kal ve a kan office ah, kan ti ti ta a. An lo neih dan kalhmang te kan zawt a, lo nei mumal tawh lo hi an tam em em mai a. Engin nge ei in zawn ka ti a, eizawna dang an nei mang lo a ni. ‘NREG hnuaiah te kan inhlawh mai mai a ni’ an ti a. Chutiang ang mai mai chuan awm kan tam ta a ni. Kan khawhlui ami an nih ang chuan a chheh vel khua ami pawh an ni tho a. Khawchhak lam ami leh khawthlang lam ami pawh anni ve tho in ka ring. Chutiang a nih chuan he NREGA hian kan ram mipui te rilru hi a hruai sual nasa tawhin, hnathawk peihlo hnam ah te pawh min siam tan nite pawh hian ka hria a. Chuvang chuan a tha lo tih ngawt chi chu a nilo na a, keimahni chhawr that theih turin, kan ram mil turte hian tlem a her danglam leh siam danglam deuh hret theih dan te hi a awm em tih hi kan hotute hian lo ngaihtuah ta sela tih hi vawin a ka rawn sawi chhuah duh chhan chu a ni a. Tin, material component han tih thu ah phei chuan an buai em em a, V.C. ah te pawh an buaina a ni a. Keini khawpui chhung hi kan buai ve lo chauh a ni a. Hengte pawh hi duhthusam chuan kawng laih tur te a nih phei chuanin khawl hmangin thawk ta mai sela, mi hringin a ni tam tak kan thawh kha khawl in awlsam takin a thawk thei a, kan ram mipui ten ka chhawr zawk ang tih hi kan sawi duh a ni. Hun a tlem a ka’n sawi zung zung a nge.

Revenue ah hian kan kal leh ang a, District Council hun lai khan ram teh hi an sawi thin a, ram tehtu te khan huan ram emaw an teh dawn khan ‘ka veilam a ka vawm hi fit chutizat, ka dinglama ka vawm hi fit 150’ tih te an sawi thin, han vawma khatianga khan an ti mai thin an ti a. Mahse, hun alo kal zel a, tunah chuan tha tak in an teh tawh a.

Amaherawhchu, nikum mai khan kan vengah sawn Cadastral Survey an rawn ti a, kan hmun te pawh an teh ve a, a hmunah kei pawh ka zuk kal ve a. Tunah ram a changkang tawh a, instrument te pawh an neih that tawh em em lai khan tape pangngaia pawh mai kha a la ni a ni, chain survey an tih ang mai kha a la ni a ni. Chuvang chuang District Council hun lai 1972 leh 73 hun lai ang mai khan khawpui chhungah pawh hma a la sawn lo niin ka hria a, chuvang chuan instrument tha zawk tal hmang hian a tih theih mai lawm ni. A station khawilai emaw tal te chu instrument tha hmang hian ti ve tawh sela, tichuan thubuai te pawh hi a awmlo deuh lawng maw tih kha kan beisei dan chu a ni. Tin, chubakah chuan Hight Court a an kalna Court thubuaiah te pawh ramri chungchang ah boundary description a awm a, ram pakhat chu bigha 15 a ni a, mahse boundary description anga an han teh chuan bigha 30 lai a ni, Revenue in a pawm dan chuan a bigha awm zat ang hi a ni tur a ni an ti a, mahse Court chuan boundary description chhung a mi ang hi a ni tur a ni tiin thutlukna an siam a, chutiang a nih chuan hetiang ang chi la awm te pawh hi teh that vek kha a tha lawm ni tih kha ka’n sawi duh chu a ni. Tin, Land Acquisition Act, 1894 hi nichin khan an sawi chhuak tawh a. Hmanni lawkah kan Minister zahawm tak, Pu Rohluna khan a sawi chhuak tawh a. Khulaiah kan mamawh em em Mualkhang ah ram an acquire dawn a, mahse he ram Acquisition Act hmang hian Kolasib D.C. ten compensation an rawn siam dawn a, a tam ta lutuk a; chuvang chuan acquire theih pawh kha a ni ta lo a ni. An mamawh si a, mahse pawisa an nei thei si lova, a bik takin thlai compensation chungchang ah khan a tam uchuak a ni. Hetiang hi a nih dawn chuan he dan hi a tha lo nge ni a, a hmangtu te hian kan zirlo tihlaia

hi ngaihtuah a ngai ta a. Chuvang chuan he dan hi chhuichian deuh chu a ngai, he dan hi a tha lo a nih chuan Mizoram tan dan thar angte pawh hi emaw Land Acquisition Act te pawh hi keimahni state pual hian siam ve ta mai ila. Hemi zulzui si, hemia a that lohna hi paihin chutiang zawngte pawh chuan siam ta ila a tha lawmni ? Tunah hian ram a department in an pek hian cheng tam an chawi lo a ni, tunhma phei chuan pass fee ah Rs.10/- emaw Rs.5/- emaw an chawi mai a, mahse an han acquire leh dawn khan Rs. 10 emaw lek an chawina ah kha sorkarin cheng nuai sawmhnih sawmthum ten an lei a ngai ta si a. Chuvang chuan helaiah pawh hian siam rem ngai, her rem ngai leh tihdik ngai hi chu a awm hle a ni tih hi kan Minister hian min lo hriatpui sela. Khatiang zawng khan thil min ngaihtuah sak se tih ka'n ngen a.

A tawp ber atan pahnih pathum lai sawi tur ka nei nang a, Soil ah chiah hian kan sawi ang a Pu Speaker, Soil Department hnuaiyah hian NLUP ah pawh hmunphiah thlang engemaw zat an awm a, an hlawhtling tha angreng viau mai a. Hmunphiah hi Mizo mipui te hian NLUP ah pawh NLUP lo ah pawh hian uar ta ila a tha awm mange aw ka ti a. A chhan chu hmanlai kan pi leh pu te ang khan kan taima tawh lo a ni. Chuvang chuan hmunphiah hi chu a to thei a, a chi va lak pawh khan a to chak a, kumkhatah a puitling thei a ni. Kum khatah ei a tling thei a, an sawi dan phei chuan kum khata thar hian a senso hi a intum thei chiah a ni an ti a ni. Chuti a nih chuan a kum hnihna atang chuan a hlawkna hi a thar theih tawh dawn a. Mi pakhatin min hrilh danah phei chuan a hung khat ah hian a lo hung lian zel a, chin khat chuan hung khatah hian kuang 500 a awm thei a, a lian tha ah chuan kuang 20 – 35 te hi phiah khat a ni thei a, chuvang chuan phiah 20 chuang hi a awm thei. Chuvang chuan Zofate hian hmunphiah hi uar ta ila kan ramah hian that theih lohna a awm lova; tin, kan thatchhiat dan ka ti dawn nge kan taihmak dan nen pawh hian a inmil tawk a. Chuvang chuan heng ang te hi ngaihtuahna ah hmang uar ta deuh ila a tha lawm ni tih hi ka'n sawi duh a ni. Chung ang zawng zawng chu sawi tur tam tak kara ka sawi theih chu ni mai rawh se. Pu Speaker, hun min pek avangin ka lawm e.

Pu LALDUHOMA : Pu Speaker, a hmasa berin mahni bial chungchang helaia sawina hun nei ve lo kan Speaker bial hi Minister zawng zawng hian i ngai pawimawh ang u tih ka'n ngen duh a. Bawngkawn te saw kan kawtchhuah pawimawh a ni a, Police station-te saw pawn lam atanga han thlir a nalh lutuka siam chi niin ka hria a. Pu Speaker, hun remchang a awm phei chuan i bial chungchang hi a tlangkawm nan hman ka duh nghe nghe a ni. Nikum lamah helaiah hian Department tinte sum hman tur kan lo pass sak tawh a, tun ang hunah hian MLA ten kan hriat duh chu khang sumte kha engtinngan an rawn hman tak tih an performance kan hmu duh a ni. Tin, tuna an rawn dil leh hi engtia hman nge an tum tih an work programme kan hre duh bawk a ni. Chumi pahnih hre lova an thil min dil kan han pass sak leh ngawt thin hi a phurawm lova. Chuvangin khatiang rawn ti theite chungah khan lawmthu ka sawi duh a, mahni sum hman tur a chipchiar pawh helaia a pass sak tute pawh hrilh thei lova lump sum a min han dil ngawt thin hi chu hman dik loh an tum sa emaw ni chu aw ti a rilrua put mai kha awl tak a ni. Minister efficient leh efficient lo tehna pawh hei hi ni ngei turah ka ngai a ni, chu chu ka'n sawi hmasa duh a ni.

Tin, a sa a tui bawk a, Sangha Department atang hian point khat lek kan sawi ang a. Pu Speaker, kan hriat angin kan rama kan problem lian ber chu kan public sector undertakings te an ni a. Hlep siam tura kan beisei laiin hlep chu sawi loh, an hlawh khawp pawh hmu lovin kum chanve ve te an awm a. Engtinngan ni ang kan privatize mai dawn em ni kan tih kan tih laiin Fisheries Department hnuaiyah hian chutia ngaihtuah buai ngai miah lo privatize sa, mimal dil neite leh Zofish Federation-te an awm a, khatiang kha pui tha ila, engtinngan kan tih ang kan tih kan tih pawh ngai lova, privatise nisa, tha tak a eizawngtute hi duat ila a thain ka hria a. Hei ZOFISHFED tana nuai 300 lai budget siam sak a ni chung hian

tunah hian nuai 270 vel hi an la pe lo tlat a ni an kutah hian. Khatiang kha a nih chuan a felin ka ring lova, tutenge an nih ka hre ve reng reng lo. Ama'rawhchu a principle-in nichina kan sawi tak, kan GSDP-te kan tihpunna tur a nih avangin ngai pawimawh ila tih hi kan sawi duh a.

Tin, Excise ah hian point khat ka sawi duh a, kan Excise Department ten nasa takin hna an thawk a, ama'rawhchu Excise te ti hmingthatu, an hnathawh huphurhawm tak mai chhawk zangkhaiu chu kan Central YMA, kan CADS te hi an ni. Hmanniah Kohhran ho in Pi Zaii Hall ah Social Front buatsaihin anmahni te nen sawihona kan nei a. Chutah chuan drugs an man tawh zat leh an hal tawh zat te kan hria a. Khangte kha halral lo in kan thalaite thisen zungzamah hian lut ta sela O.D kan tam tur zia hi a chiang reng a. CADS ho hnathawh avanga O.D. an lo tlem tak zia hi a statistic tha tak an present thei a ni. Chuvangin kan Central YMA chungah hian lawmthu ka sawi duh a. Full time a thawk an ni lova, an mahni eizawna nen buai tak chungah thawk an nih avangin tha taka an thawh theihna turin, nu leh pa rilru hah tam tak an chhawk zel theihna turin, helaia secret service kan tih mai nuai 5 emaw lek dah hi tlem tham ka ti lutuk a. Chuvang chuan an ni ang te leh an ni anga hmanruaa hman theih tur midang an lo awm a nih pawhin chungte chu kutke a kan hman a, kan ram harsatna sutkian a nih theihna turin he sum hi tangkai taka hman nise, a tul a nih chuan R.E. lamah pawh tihbelh ni hial se tih hi ka'n rawt duh a ni. Hei hi performance budget dik tak niin ka hria, dik takin an thawk a ni.

Tin, Boundary Committee chungchang kan sawi zing viau va, hei hi Mizoram-in Boundary Committee kan din vawi khatna a ni a. Chairman pakhat leh member pathum kan awm a, an zinga pakhat ka ni a. Helaiah hian zawh loh nghawngkawl te pawh kan bat emaw ni aw ka ti a. Border fencing-te hi kan kuta dah a rawn ni ta a. Kum 2005 atang khan border fencing hi an lo ti daih tawh a. Contractor pali rawih a ni a, terms and conditionah chuan kha contractor khan hna a thawh tan hma in kha lai bialtu BSF, DIG leh District Collector-te nen a line kha an siam fel ang a, land acquisition a tul leh an ti ang a, chutianga state sorkar-te nena an remtihna-ah chiah chuan a hung tur a ni. Mahse, khatihlaia kan sorkar-te kha an muthlu tlat mai a, chutiang ang reng reng tih awm lo chuan an hung ta mawlh mawlh mai a. Nichina kan member zahawm tak sawi ang khan khua te hung pawnah Bangladesh lamah a awm ta a. Leilet te, sangha dil te, school-te pawh Bangladesh lamah a awm ta a. Ramsa inkalpawhna tur animal gate-te pawh siam a ni lova, chutiang chuan harsatna liantak an tawk mek a. A hmunahte kan kal a, bialtu MLA-te pawhin theihtawpin min pui a, chuti chu a ni a. Khatihlaia sawlai mipui mangang khan memorandum-te an han thehlut a, kan Chief Minister hnenah meuh pawh an rawn thlen khan kan Chief Minister muhil kha an kaitho zo lo a ni. Tuna an hung vek tawh hnuah keini Boundary Committee mi tlemte kuta rawn dah leh rikngawt hian enge kan va tih tawh ang tih te hi ka ngaihtuah a. Kan chhu chhe leh thei dawn a nih chuan a lawmawm a, a nih si loh chuan a pawl hi a pawl zo tawh a. Khatih lai khan Bangladesh chauh duhtawh lovin Tiau-ah Myanmar nena kan inkar hungte pawh kha an rawt a. A pass naah kan tel duh lova, kan chhuak tau kha a ni nghe nghe a. Chutiang chu a nih avangin he border fencing hi Boundary Committee tan chuan hnathawh nuam lo tak, a nih ang ni zo tawh, a pawl tur pawl zo tawh a ni a. Khulai tri-junction an tihah te pawh kan zuk kal a, khatiang khan thil hi a lo pawl em em tawh vek a ni tih kha ka'n sawi duh a.

Tin, Soil Department-ah ka'n pakai ang a a bikin rubber plantation, NLUP hnuaia tihah hian chhungkua 3000 target a ni a. Chutah chuan 657 hnenah an sem tawh a, hei kum lina a ni tawh a, kum khat tha a la awm a, ala sem bang hi chhungkua 2343 an la awm a, sem hman tak ang maw! Hemi atan hian vaibelchhe 30 dah a ni, nuaikhat zel

hisap khan. Beneficiary pakhatan stem 550 zel pakhat cheng 20 zela leiin beneficiary pakhatan an senso chu cheng 11,000 zel a ni ta a. Chu chu quotation pawh koh miah lovin, agreement pawh sign awm lovin, Silchar-a Rubber Nursery, Balacherra atang khuan mi pakhatin a rawn supply ta ani a. Sorkara ka zawhna min chhanna ah chuan a survival rate hi za ah 60 % sawmruk a ni. Chumi awmzia chu, a chi dawng tute rubber phun zaa sawmli zel chu a thi dawn tihna a ni. Khatiang survival chance tlem lutuk kha tunah hian kan han in tih tir ta a ni a, a nihna takah chuan heng ang hi chu supply tlak a ni lova, a lo chawr pawhin a mit taka a lo chawr chauh kha zuah tur a ni a. A hnuai ami emaw a chung ami emaw, a sir ami emaw lo zuah palh te hi mi tam tak an awm thei a, a dik tak a lo chawr pawhin kum hnih khat chawm puitlin phawt a, a khura va phun leh te kha alo ngai a, khua a tlai zova, a harsa em em a ni. Chuvangin a chi tha chi chu IWDP hnuai ah pawh Nghalchawm ramah polypot pakhat cheng 80 in kan sorkar tho hian a pe thei si a, hetiang zat te hi chu han pe sela chuan an ding chhuak zawk mai tur hi a ni a. A pawh hlein ka hria a, vaibelchhe 30 hi kan khawhral mai mai dawn niin ka hre tlat a, a uihawm ka ti a ni. Tin, a chinna hmun turte pawh hi hemi National High Way, Lunglei-Silchar road thlang lam hi chu a tlangpuin a tha e an ti a, T.V-ah te pawh kan thlir a, chutiang hmun ni lem loah te pawh hian a trade an rawn thlang a, an pe mai mai ni te hian a lang a, sem thei nih duhna leh party-a an in enroll a, lungawi mai kan nih avanga, a hlawhtlin lohna ramah te pawh kan chin tir zel a nih hi chuan, crime a tlingin ka hria hei hi, a fel reng reng lo a ni. Chuvangchuan (SPEAKER : minute nga nei mai rawh aw) ZNP kan sawrkar hun chuan a chi tha hi a thlawnin kan sem vek dawn a ni. Chhungkaw sangthum kan sem chuan crore 12 chauh kan seng dawn a, tuna crore 30 ah hian crore 18 kan la save zawk dawn a ni. Chung chu a nih avangin inngaihtuah harh a tha khawpin ka hria.

Tin, Revenue ah hian Government Complex ah khuan tun hma deuh khan Zonuan, Berampu vengah Bru Student Association tan land lease a in hmun pek a lo ni a, chulaiah chuan an buai ta deuh nge ni, sawrkarin Government Complex a Old Age Home bulah khuan rawn transfer a tum a, thla hlui ni 14 khan a endik tu tur an rawn tir a, Government Complex Local Council leh NGO zawng zawngin an lo object a ni. Khulaiah khuan chhungkua za chuang daih, in te pawh sa vek tawh, sawrkar in pass ala pek phal loh te an awm a, kum rei tak tak lo cheng tawh te pawhin in hmun an neih theih loh laia, ram zau tak midang han theh chhuah kha harsa an ti deuh niin ka hria a, chutiang chu a nih avangin sawrkar thu neitu hrang hrang hnenah an hrilh a, khawtlangin kha ti taka an duh loh chung khan kan sawrkar hian pek tho a tum nge tum lo tih kha kan hre ve hrim hrim duh a.

Tin, hei Assam Rifle ram hi kan buaipui a, MNF sawrkar khan 2002 ah Dan tha tak an lo siam diam tawh a ni. The Mizoram (Restriction on use of Transfer Land) Act 2002 kha an lo siam diam tawh a, chu chu an lo gazetted daih tawh a, kha Bill a an enclose a a lan dan chuan, LSC 43, House pass 15, Department land 3, Garden LSC 1, avaiin pass 62 a awm a, a hnu lamah hian an pek belh em ka hrelo. Hei hi 1970 leh 1996 inkar kumtin deuh thaw a pass an lo pek chhoh a ni a, 1985 kuma pek kha a tam bik zual hle a ni. A hnuah pek belh a awm zel em ka hrelo. AR ram hi Block 7 ah an then a, a pumpui a a zau lamp hi sq.meter 2050929 a ni a, chu chu hectare 94.99 a ni a. He Bill-ah hian hemi ram chhunga in hmun lo nei zawng zawng kha an enclosed vek a ni, tah hian an hming te nen vek, an LSC number zawng zawng nen. Heng hi cancel tur a ni a, thiah sak tur a ni a, a tul a nih phawt chuan an chhuah duh loh chuan evict tur a ni a, eng Court ah mah khin buai theih a nilo ang, an lo ti diam tawh a. Advisory Committee din tur a ni tih pawh a awm a, kan din tawh em tih hi ka hre duh a. Tin, hemi Dan hnuai ah hian rules kan siam tawh em ? Tunah an chhuak dawn tawh a nih si chuan sawrkar hi a inpeih em? A hranpa a buaipui buaipui a ngai dawn em ni,

dan kan neihsa chu kenkawh mai tur a ni a, kha khan a lo take care vek a, he thil sawrkar hmasain an lo ti hi fakawm pawh ka ti a ni.

Tin, Home ah hian kan kal zawk ang a, Gorkhali ho hian OBC status nih hi an dil thin a, kan sawrkar te hian hlim tak hian an lo chhuah ve zel a, a tawpah kan NGO te chuti khati hi an ti chho leh thin a, kha kha an tih dan kumkhua a nia, ka zawhna hmasa ah khan, ngaihtuah mek a ni, tiin min chhang a, sawrkar rilru ka hre duh a ni. Mizorama kan Gorkhali unau te hi OBC status pek kan sawrkar hian a tum tak tak nge a tum lemlo ? A nihna sawifiah se a tha ka ti a, chu chu hriat a tul hlein ka hria.

Tin, Central Jail ah tun hnai lawkah mi an zuang chhuak a kan hria a, a hungna a sang taw lo a ni, a chiang reng mai. Chuvangin Aizawl Central Jail leh jail dangte pawh a ni mai thei a, a hungna tihsan belh ngai hi a awm nual maithei a, chung chu sawrkar hian a ngaihtuah em ?

Kan Home Minister hi ka han sawm duh a, ka bial Sairang khu a hnai baw a, kan Police Station khu Mizoramah a senior pawl a ni ve a, rem changah min han tlawh sak ve se tih hi ka sawm duh a ni. A building leh engemaw khu min han hmuh sak se, a bak chu ka sawi lo vang. A mitin min han hmuh sak se, tichuan aman ngaih dan min siam sak theih mai ka ring a.

Tin, Phainuam khuaah Buarchepah, Assam SSA-ten Primary School an din thu he House-ah hian sawi a ni tawh a. Kha kha thil serious tak niin ka hria, kan sorkar hian hma a la tawh em? Ti khuan kan en tlawk tlawk mai dawn em ni? Kan ram ri ah te pawh nakin khua reiah chuan hnial khan thate pawh a insiam thei ang a, problem liante pawh a awm thei mai lawng maw tih hi ngaihtuahnaah a awm lo thei lo va, chu chu kan zawt duh baw a.

Tin, IAY thlan chung changah hian hman nia District Level leh State Level kan thut khawm khan, vairama an tih dan chuan Gram Sabha an thu thin a ni. Hetianga a thlangtu tlemtein a dawng tur thlan kha a awm ve lo va, khaw chhung mipui pumpui kha an kalkhawm a, tunge dawng ang tih kha fel takin an thlang a ni. Tah chuan dawng awm lo deuh kha chu thlang pawh nise an zak a, 'E, kei chu a ngai lo,' an ti mai a ni. Chutiang chuan i ti ve tawh ang u," tih kha kan relin ka hria a, "MLA-te ngei pawhin telpui ngei thei ila," kan ti a. Khawtin maiyah hian IAY dawng tur hi public kalkhawmin thlang ve ta ila, chutia kan tih chuan, "A hmu awm lovin a hmu," kan tih hi a reh in ka ring a. A dik ka ring a, hei hi sorkarin keng kawh ngei sela, khawi lai emawa kenkawh a, khawi lai emawa ken kawh loh ang hni hne kha ni lovin. Kan ti dawn a nih chuan MLA zawng zawng pawhin theih tawp chhuah ilang kan bial theuh ah, a tak taka hlen chhuah tumin sorkar hian hma la seng, a thlawp thei theiin thlawp ila, NGO-te pawhin tih tak zeta kan thlawp a that ka ring baw a ni.

Pu Speaker, i bial chu kan sawi hman dawn ta lo a nih hmel hle mai. Ka lawm e.

S P E A K E R : Aw, sawi tawh lo mai rawh. Le, tikhan 18-in kan sawi tawh a, kan lo duh tawk tawh mai ang a, sawihona chu. Minister zahawm tak Pu R. Lalzirliana'n rawn wind up sela pass rawn dil nghal rawh se. tunah i lo ko vang.

Pu R. LALZIRLIANA, MINISTER : Pu Speaker, ka lawm e. Hei ka demand-te MLA zahawm tak tak 18-in min sawi pui a, chutah chuan a ngiau nger zawng leh

a in dem bawrh bawrh zawnga sawi lova, a infuih tang zawnga thu an sawi theih avangin he House zahawmna hi an rawn keng chhuak hle niin ka hria a, a lawmawm ka ti tak zet a ni. Tunah khan kan ngai thla a, a tir lam ah te pawh kan ngai thla a; tin, nimin lam ah te pawh khan kan ngai thla tawh a. MLA-ten kan thu sawi hi min react sela an ti a. Chutiang a nih lai chuan he House-in a lo kalpui tawh thin, kum tin, term tina a lo kalpui tawh thin chu he laiah hian hun rei tak tak thu tawhte an ni hlawmin ka ring a. Chutah chuan Department lamin kum hmasa lama an pawisa hmuh te, an hnathawhte an han sawi a. Khangte pawh kha kan sawi vete pawh min rem tihsak ula a tha in ka ring a. Amaherawhchu, hun tawi deuh hman tum ila, dar 5:00 a ni a. Rei lutuk lo hman chu kan tum hram hram ang a; amaherawhchu, kan pawisa hman tur crore zaruk chuang kha a ni a, chuvangin hun erawh chu kan duh deuh hlek ang tih min hriat sak hmasa turin kan duh che u a. MLA zahawm tak takte thu sawi kha kan react hmasa ang a, a vaia kan tih loh chuan ka sawi kha inti lo inti leh bik si ang a tha in ka ring lova. Pu Chawngtinthanga khan a sawi hmasa ber a Suangpuilawn leh Khawlian lamah khan Police building te kha thum that tum a ni a, tun kumah hian pek tum a ni a. Tin, vehicle te pawh a awmdan angin kan ngaihtuah chho zel ang a.

Tin, Fisheries-ah khan sangha chi phai ram atanga product tam tak lo kal hi a tawh tawh a ni, Mizoramah hian a siam ve theih lawm ni ti angin a sawi a. Khangte pawh kha siam ve theih tur a ni a. Tiang chuan Rural Development-ah hian NREG-ah hian material component hi kum dang aain tlem zawk kan nei ta a, hei hi tih tam theih a ni lawm ni a ti a, a dik viau mai a. Amaherawhchu material component-ah hian 10% state sorkarin a tum a ngai bik a. Mipui inhlawh naah hi chuan cent percent Central funding a ni a. Chutiang tur chuan Mizoram sorkar hian state matching share hi kan indaih lo thin a. Chuvangin kuminah hian 60:40 in kan kal ta a, a hmalam kha chuan 80:20 a kal a ni a. Chuvangin material component kha a tam deuh a. Kuminah hian 60:40 a kan kal takah hian cheng nuai 2574 leh 63000 zet hian kan matching share kha a tlem phah ta a. Chutiang a nih lai chuan mipuite inhlawhna tur kha a tam thung a ni. Hei hi mipui thlavang kan hauhna leh inhlawhna tam tak nei zawk sela mipui kan lo pung zel si a tih ngaihtuah naah khan kan ti a ni tih kha ka sawi hmasa duh a.

Tin, Pu Lalthansanga MLA zahawm tak khan sangha chi hi engtikah nge sem a nih ang a tih kha tunlai hi a sem hun a ni a. Chuvang chuan an sem tur ang ang kha sem tur a ni a. Tin, sangha chi hi a lo thlawn ringawta pek ai chuan subsidy a engemaw zat an lo tum ve a pek hi a hlu zawk a hriatna keimah mimal hian reilote kan lak chhung mai pawh hian ka nei a. Chuvangin, chutiang zawng chuan a lo thlawn mai a pe lovin tih tum ta ila a tha in ka ring a. Tin, NLUP-ah phei chuan beneficiaries te hian an lei turin a chi lakna awl deuhah chuan a pawisaa pek an ni tih kha ka sawi duh a.

Tin, Home Dept., chungchangah hian Rev.Chanchinmawia thih thu kha a rawn sawilang a. Hei hi opposition kan nih lai khan MPCC Legal Cell khan thui tak kan chhui ve a. Amaherawhchu khatianga 'keini kan sorkar chuan CBI kan chhui tir ang' kan tih kha hriain CBI kan chhui tir a, annin an chhui tir loh khan thudik kan hmuchhuak ang tih kha sorkar khan an hlau nge ni. CBI te chu khatih laia Chief Minister zahawm tak khan tham theih mai an ni tih a sawi zawh chauhah CBI ko chhuak turin an official te tirh an ni a. Khulamah an zuk kal a, an zuk thang vang vang a, tahchuan an lo chhuak ta a. Kan rin ang ngeiin Special Investigation Team ten an chhui ang kha an rawn nemngnet mai ang tih kha kan hlau hle a, kan hlauh ang ngeiin an rawn nemngnet ta a. Tichuan sorkarna kan han neih khan CBI chu chhui tir chu kan tum ngei a, anni pawh kan ko chhuak a. Amaherawhchu hei hi a chapter kan lo close tawh a, thil dang hmuhchhuah tur dang a awm chuang lova, hei bak hi chu kan ti thei lo a ni an tih tak tlat avangin a thuneitu sang ber India rama investigation ti theitu sangber ni

a kan ngaih ten khatiang anga an rawn tih tak avang khan vawiin hi kan thleng ta a. Khatah khan lo chhui tir ting tang lo chu ni sela chuan thudik zawk kan hmuhchhuah hi kan beisei a ni. (Pu Lalthansanga : Pu Chairman, tah khan an tham tihna deuh nge ni ang a, kha ti laiah khan MPCC Legal Cell khanin sawi tur nei tha hle khan kan lo hre thin a. Legal Cell khan report pawh CBI ah khan a pe ta chuang lo emaw ni ang le) An lo kal pawh khan kan hotute'n an kawm a. Amaherawhchu, khatiang a tham theih mai an ni an tih avang khan, dik tak chuan khang lai khan MNF party khan pawisa an ngah em em a ni tih kha tlang hriat a ni. Ama'rawh chu, election a lo awm takah khan pawisa an hmang hnem vak lo ni a hriat a ni leh a. Chuvangin, an pawisa neih zawng zawng kha CBI hi an pe ta nge ni zawng kan zuk hmuhpui lova, khang kha thil awmzia a ni ta zawk a ni, a paw kan ti khawp mai.

MLA zahawm tak Pu K.Lianzuala khan Home leh Prison te a rawn sawi a. Khalaiah khan Sainik Welfare School, Chhingchhip a contractor ten sum an harsat thu an sawi a. Hei hi release vat tur a ni dawn lawm ni a rawn ti a. Hei hi Finance Department lam atangin PWD ah Ni 22 June, 2012 khan release a ni tawh a. Tunah hian eng eng emaw file han kal vel neuh neuh avangin an la dawng lo a nih chuan an dawng thuai turah kan ngai a ni.

Tin, Fisheries Department ah hian a hlawk lampang deuh leh han tihna awm deuh hlek area hi a awm ve a. Chuvangin, Zokhaw lampangah hi chuan dik tak chuan, Buhchangphai-te, Hortoki lam te leh Pu Lalrinmawia bial Zawlnuam lam, Kolasib lam te, thingtlang keini ang bial ami ten a dil an neih hi a inthlau deuh hlek thin a. Hlawhtlinpui tak tak kan duh avangin a area lam deuh hlek ah hian i uar teh ang tiin sorkar chuan ngaihndan a nei a ni tih kha ka'n chhanna ni sela.

Tin, MLA zahawm tak Dr. R.Lalthangliana'n SAD chungchang a rawn sawiah khan bus hi tunhma khan ngaihtuhsak an ni a. Rs. 28,000/- in thlakhatah hire sak an ni a. Khatiang ang kha kan hmuchhuak zo ta lova, chawi zel a kan kal tak avangin a harsa lutuk a, bus kha kan han ti tawp rih a. Ama'rawh chu, tunah hian pakhat tlan tir leh a ni a. Chutih chhung chuan Transport Department lam atang hian Night Bus te ngaihtuah a, permit te pek a. Sawlai tlan tur chu ngaihtuah sak tur an ni tih kha ka chhanna ni sela.

Tin, Fisheries ah hian sangha dil neitu-te hnenah sangha chi ni lovin a leina sum pek mai ni se tih hi thil tha tak a ni a. Tunah hian NLUP ah a chi harsat zualna ah te phei chuan kan kalpui mek a ni. Amaherawhchu, anmahni-a an lei phak loh oxygen te thun a lo ngai a. Khatianga an tih vai ang a kan ben then kan ben then ve peih loh lai te a lo awm a. Chuvang chuan, an hlawhtlin zawkna atan Department in hmun thenkhat harsa zualah chuan ngaihsak kan tum a ni.

Tin, Prison ah hian Lungleiah Prison quarter sak ve ni se tih te an sawi a. Heng te pawh hi tunah hian kan sum neih hi kan duhtawk lo viau a. Amaherawhchu, NLCPR ah hian tunah hian vaibelchhe 30 chuang min rawn pe dawn niin kan hria a. Chung atangte chuan a tih theih ang ang tur te kan ngaihtuah thei ang tih ka ring a ni.

Police Department-ah hian Life Insurance hi tih a ni em tih ang chi te kha awmin ka hria a. Life Insurance hi tihsak a ni a. Accident a thi te chu Rs. 2,00,000/- pek tur an ni a. Thih dan pangngai, Awmlaia thi te chu Rs. 1,00,000/- a ral tur an ni a. Tichuan Life Insurance Company te nen agreement hi en tha in hei aia hlawk deuh hlek zawk a tih dan kawng ngaihtuah mek a ni. TA DA chungchang hi in rawn sawi chhuak a, hei hi a lawmawm ka ti khawp mai a, tawng thu chhe lo kan tam hle mai a. An zin chhuak reng mai a, zin chhuak reng chi an ni si a. Tin, Aizawl atanga Tuirial an kan chuan TA/DA pek tur an nih baw si avangin TA/DA atan hian vbc.10 chuang emaw ba kan nei a ni, a paw kan ti khawp

mai. Tichuan, MPRO lak chungchang hi an rawn sawi a, zawhna ah te pawh khan alo lang a. Ni e, MPRO te leh a dangte pawh hi lak loh theih loh din hmunah kan ding a. Police te chu in hria a law & order keng kawh tu kan ni a in hria a, hmuntin hmun tanga awm an nih avangin an pawimawh em em avangin heng hi a pawimawhna avangin hotute kan han dil hian a tlangpuiin reject, regret kan ni thin a. Chuvang chuan a pawimawh zual kan ram mipuite him zawk nan kan lo la a. Tin, sorkar hmasa pawh khan MPRO te leh thil chi hrang hrang ah pawh khan 458 lai sorkar phalna la lovin an lo la ve tho va, hengte hi an dem awm in ka hre lova, a chhan chu a tul tlat avangin Home Department ah hi chuan a ngai a ni tih hi ka'n sawi duh ani.

Tin, RD ah hian material component hi a nih dan ang tak in kal rawh se tih a ni a. Hei hi a dik khawp mai a, a nih dan loh ang a kan hman chu ka hre lova. Kan hman danah hian supervisor atana kan han dah te hi a Department ami te hian an enkawl ang a, tha takin an thawh tir tur a ni. Department-a BDO te, PD ten emaw helai a an AE te emaw an thawh tir ringawt khan veng leh chhawngtu tur chuang an awm lova. Chuvangin tuna kan kalpui dan hi kalpui dan niawm tak ah ka ngai a ni. Pu Hmingdailova MLA zahawm takin material component a sawi kha tuna ami kha kan chhanna ni nghal sela, chu chu a ni deuh mai in ka hria ani han react turah kha chuan.

Home Department ah tho khan Pu Hmingdailova'n IR post ruak hnawhkhah kha an sawi a. Tuna tlemte kan lo hnawhkhah mai pawh kha enga tinge kan ti a ni si a, chuvang chuan sorkar hian phalna kan dil reng a, tunah hian 500 dawn lai post ruak kan nei reng mai a. Hei hi min pe thei sela chuan duh thal a tha Pu Col-a duhsam ang te pawh kha mi tling leh mi tha tak tak lak kan duh takzet a ni.

Fisheries Department ah hian a hun a sangha chi sem a ti a. Hei pawh hi nichina kan chhanna ah khan tel tawh sela a tha in kan ring a. Pu K. Liantlinga MLA zahawm tak, Minister kan ti dawn a term leh hun a mi tur kha kan sawi lawk deuh a maw ni le? Kan lo sawilawk dik mai thei a sin. Kan hnena an lo tel ve phei chuan ani lovang tih kha a sawi theihloh reng reng a.

Chuan, Rural Development Department lamah hian work performance nichina Pu Duha pawh kha ka chhanna ni nghal sela, leh a sawitu zawng zawng kha ka chhanna ni nghal se lang in. Work performance tih te work programme tih te hi kan lo hmu tlai deuh va, paw ka ti a a lehkha ah khan a last date kha an lo ziah chiah loh a,

Pu K.LIANTLINGA : Pu Speaker, last date kha ni 3/7/2012 tih a ni e.

Pu R. LALZIRLIANA MINISTER : MLA zahawmtak tak ten in rawn ngai pawimawh a a lawmawm ka ti a; tun Sorkar atang hian hetiang hi kan han tan a, kha thil kha kal pui zel tur a ni ang a. Tichuan, kan va pekluh khan press ah an lo pe hman chiah tawh mai a, Planning lam khan chu chu press ah pek hman a nih tak loh avangin tah khan a rawn tel thei ta lova, tunah hian Planning Department ah kan Work Performance Budget te kha a awm ve ran a ni tih kha kan hrilh duh a. Tin, nichina sawi ang khan T.A./D.A., chungchang pawh an rawn ngai pawimawh a, min ngaih pawimawh pui kha a lawmawm tak zet a ni.

Pu K.LIANTLINGA : Pu Speaker Work Programme an neih chuan min pe thei angem le tih kha kan zawt leh duh a ni e.

Pu R. LALZIRLIANA MINISTER : Pu Speaker, tun Session chhung chuan press ah an pek loh pawnrawn xerox sela kan Deprt., ten pek che u kan lo tum ang e. Pu R.L.Pianmawia MLA zahawmtak hian a bial chhung a Post in chhe lutuk te kha a rawn ngai pawimawh a, tunah hian Darlawn te, Sakawrdai te, Zohmunah te hian repair leh sak that tur in siam mek a ni, kumin ah hian kan sa thei ang tih kha kan hrilh duh a.

Tin, Fisheries tanpuina hi a dawng ngaiin an dawng reng mai a, tih a awm a, hei hi, a dawng ngai dawng reng te hi kan hriat chuan kan MLA zahawmtak tak te hi a bengvar kan ni a, pawisa an hman hma khan khawngaih takin min hrilh ula, chung chu kan chhuh leh ang a, a dang a phu te hnenah kan pe ang tih kha kan tiam duh a ni.

Tin, R.D., IAY a in sak a dawng awmlo deuhte pawn an dawng tih kha a awmin ka hria a, hengte pawh hi permanent wait list a awm an nih chuan MLA-te hi thu kan nei ve tur a ni tih hi ka ngaih dan a ni a, chungah party in duhsakna avang ringawt a hei hi sak hmasak ni rawh se, tih kha MLA tumah hian kan ngam in ka ringlo va, chuvangin MLA te hi kan ffcial te pawhin min ring tawk sela, kan PD , BDO te pawh hian hei hi hmasa zawk rawh se kan tih hi chu hmasa ve tur ah ka ngai a, chutiang chuan tangtlang ila chutianga hma lak pawh chu kan lo tum ang.

Tin, Pu R.Lalrinawma MLA zahawmtak khan Aizawl vel ah hian kan awm ngai ngawt ngawt hian kan awm a, chhimlamah chuan High Power Committee-te an awm a, an ti a; tin, hmar lamah lah Sinlung Hill Development Committee te an awm a, chung chuan Budget hran neiin an bial an chei a, keini hi kan ro bik em mai tih kha a ni a, heng hi thil awm thei a ni tih hria in kan C.M. zahawmtakin District Development Committee kan din ang a, chutah chuan crore khat den den in bul an tan ang a ti a, vawiinah hian kan Budget ah pawh hian a awm ran tawh a, chuvangin keimahni bial chhunga khatiang kha tih kan tum ang a. Pu Rinawma kha Aizawl bialtu a ni a, chu pawh chu rural awm a awm a, chuvangin Aizawl District pawh hi Aizawl Rural Development Committee kan siam ang kan la ti ta zel a ni. Chutiang tur chuan Aizawl District bikah pawh hian a dang chu rural kha a ngai lova, rural nisa a nih a vangin. Tichuan, Home Department-ah hian Zokhawsang hmun a helna tur siam ni rawh se tih Pu Lalrinawma sawi kha hei hi a pawimawh khawp mai a, sorkarin ngaihtuah a tul hle a ni tih kha keipawhin ka ngaihtuah dan a ni a. A chhan chu Tuirial khimi Zokhawsang tlangdung a kal tam tak, Tuirial leh a chhehvel Chite Lui mawng lam a huan tha leh lo ram nei tan khian a pawimawh em em a ni tih kha kan sawi duh a ni. Tichuan, sorkar hmasa in MPF diklo taka an lo hman avang khan tunah hian court-a an kal a leiba kan neih kan pek theih loh chuan a percent-te nen a pung zel, thla tina pung tur awm kha a rawn sawi chhuak a, a pawh kan ti khawp mai a. Tunah hian kel pal te leh thil dang dang lei nan an lo hman avang khan tha lo kan ti a House-a Pu Speaker, i veilama kan thut lai pawh khan police-te hi kel an hlau em ni, engatinge kelpal heti zat zat an lei titu thin kha keipawh hi ka ni a. Chuvang chuan, khang avangte pawh khan vawiinah hian kan sorkar chuan phurrit namen lo kan phur chho ta a ni.

Pu V.L. Robiaka MLA zahawm tak in Kanghmun tlangdungah Out-post dah nise a tih kha Out-post hi dah tulna tam tak a awm a, vawiinah chuan kan Police-te hi mipuite rin an kai lehzual ta em ni aw a tih theih a. A chhan chu khaw tin deuh thaw hian Police Out-Post min pe rawh, Police Beat Post min pe rawh tih hi a tam hle mai a. Amaherawhchu, hetiang a Out-Post-te han din dawn hian post create a ngai a, chu post create chu kan sorkar-ah hian kan la ti tlang zung zung thei lova, chuvangin, a awm theih tawk tawkna tur ang in zing leh zual hian

dah thei ila chuan kan Police-te pawh an hahdam thei ang a, POL leh thil dangte pawh hi kan sum thei deuh ang tih kan beisei a, amaherawhchu, hei hi hun tlem nghah a la ngai dawn a ni.

Fisheries Department-ah hian nichina kan sawi tawh ang khan tanpuina dawngtu a ngaiin an dawng thin tih kha kan chhanna kha chu nichinah kan sawi tawh a.

Pu John Siamkunga hian Thingsai Police Out-Post pawh hi tuna kan chhanna ang tho kha a ni a. Thingsai-ah hian Police Out-Post ang deuh Police tlem te an awm sa ve tawh a.....

Pu JOHN SIAMKUNGA : Pu Speaker, Thingsai khi Police Station awmna a ni a, chutah chuan Police check-gate a hran in minrawn hawn sak zawk a ni, min tih changtlun sak rawh u tihna zawk a ni.

Pu R. LALZIRLIANA, MINISTER : Chu zawng tih changtlun chu khilai Out-Post awmsa a nih chuan kan lo ngaihtuah ang e.

Tichuan, Pu K. Lalrinthanga MLA zahawm tak khan SAD chungchangah khan House Committee-in an chhanna an duh tawh loh thu arawn sawi a. Hei hi MLA House Committee a awm te hi Session te nau nei kan ni tih hi kan official-te hian an hriat reng Pu Speaker, a tul khawp mai a. Chuvangin, House Committee-in zawhnate an han pek tawh hi chu helaia sorkar ni lo, Secretary-te ni lo midangin a lo chhan ve mai mai chi pawh hi a ni lova, chuvangin, uluk taka tih tawh tur a ni, ka lo fimkhur tawh ang tih kha ka'n tiam duh bawh a ni.

Tin, Home Department-ah hian Saiphai te, Phaisen te, IR-te'n electric an nei lo tih te min han sawipui a, a lawmawm ka ti khawp mai a. Kan Police-te hah zia in hria a, chuvang chuan theitawp inrawn chhuah a. Heng hi Solar Lighting, electric a thlen theih loh ah pawh chutiang chu pek kan tum a, hmun tam takah kan pe tawh a, heng hi changtlung deuh hlek zawk a pek pawh kan lo tum chho zel dawn a ni.

Tichuan, RD-ah hian material component hi arawn sawi leh a, hei hi nichina ka chhanna kha ni nghal sela a tha in ka ring a.

Pu C. Ramhluna, MLA zahawm tak khan SAD lamah hian kan Secretariat saw kan tawt hle tawh mai a, a ti a. Kan tawt a ni tih kan hria a, vawiin ah hian kan officer lian tak tak Secretary-te pawh anmahni in atanga thawk, an bungalow luah atanga thawk mai te pawh an la awm a ni, sawlaia thu tur, chutiang chuan kan building kan tawt tih kan hria a. Chuvang chuan tuna Secretariat building sir, Bank thlang sawlai ah sawn crore 20 sak na tur kan nei a, chutiang chuan PWD in tunah hian sa turin bul an tan mek a reilote ah a ban te kan phun theih mai kan beisei a ni. Tin, Thingkah ah hian, Pu Ramhluna'n saw lamah sawn Police Battalion hmun te dah ve nise a tha lawm ni a tih a kha a dik a, a ngaihdan kha kan ngaihdan a ni a, chuvangin 3rd IR Battalion hmun hi Thingkah ah, Lawngtlai khaw chung/bulah khan dah kan tum a ni tih kha ka'n hrilh duh a ni.

Tin, H.P.C 'D' nen hian tun inthlan dawn ah khan agreement in sign niin an sawi a ti a. Hei hi khawngaih takin agreement kan sign chu helai House ah hian min han chhiar chhuah sak tur a nei em aw? Ka'n sawm let teh ang, i phal na in. A kawl em? I kawl chuan khawngaih takin min han chhiar chhuah sak la kan lo ngaithla tlang teh ang.

S P E A K E R : Ka phalsak mai ang chu hon'ble Minister in a tih chuan. chhiar chhuak teh u a ngaihnam viau ang e!

Pu C. RAMHLUNA : Pu Speaker, HPC atanga lehkha a ni a. First meeting with Lal Thanhawla, venue private residence of Hawla, New Delhi, Ni 15.7.2012 a an lehkha a ni a. Thu pahnih harsa tak kan khel hova. Pakhatna ah chuan un-finished agenda of the Hmar in Mizoram. Pahnihna SPLA chhuah chung chang. Kan inhmuh tukah chaw ei turin Pu Hawla'n min sawm a, chaw te ei hovin kan thu ngai baw kan sawi ho leh a, a hmawr baw thei chiah lo in inthlan/election hma ngeia chin fel atan kan chhawp chhuak ta a. Heng kan thil phut pahnih te hi MNF sorkar paihthla a Congress I in Mizoram a sorkarna an siam phawt a chin fel zui theih a ni tiin lungrual takin kan inthen ta a ni.

Pu Hawla (Pu Lal Thanhawla, Chief Minister zahawm tak) tawngkam te : Mizoram NGO lian ber YMA-te hian, in demand hi an pawngpaw do va, an duh lo hulhual si a, eng party pawhin sorkar siam ila, khingho duhdan kalhin ro kan rel ngam ka ring lo, Sorkar reng kan duh si chuan thil harsa a ni ang, a ti a. Pahnihna ah chuan SPLA chungchang kan sawi laiin Pu Hawla'n, 'khawvel awm chungin Pu Hmingchungnunga hi chu ka ring leh tawh ngai miah lovang, a ti a. Kum 2008-a Mizoram State General Election chungchang Congress - I palai leh H.P.C 'D' palai inremna : Election puan a nih hma thla 2 vel la awm ah Manipur, Imphal-ah inbiakna neih a ni a, Nirmala Hotel, thanggal Bazaar-ah kan thleng ho a, anni Congress - I palai te chu Lal Thanzara (Patea) younger brother of Lal Thanhawla leh J.C. Sengluaia te an ni. Keini H.P.C 'D' lamah President Lalhmingthanga Sanate leh kei H. Zosangbera, General Secretary kan ni. Kan in hmuh tirhah engmah kan sawi hmain Pu Lal Thanhawla, President MPCC thuchah min hrilh nghal a, kei pek chuan 'ti' tih zia kah inngat lovang u. President leh President inbia sela, phone pawhin a inbiak theih a, Pu Hminga'n Pu Hawla bia se, Pu Hminga'n Pu Hawla a biak veleh loud speaker on sela, kan zavaiin lo ngaithla tlang ila tih ka rawtna chu min pawmpuiin phone in President-te pahnih chu an inbe hmasa phawt a, an inbiak zawh chuan thawh ho dan tur kan rel zui ta a ni Phone a an inbiakna thu avangin election-ah thawhho zai kan rel a ni ber a, over phone-in Pu Hawla chuan hmanni lawka vai sumdawng pakhat Inner line permit chungchanga Mizoram sorkar High Court a a khinna ourt thurelin, Zofate, a bikin NGO hrang hrangte leh politician te awareness min neih tir a, Mizote hi tribal ni reng mah ila, kan chenna khawvel,

undivided Aizawl district leh Lunglei district leh Chhimtuipui district huam lovin chu tribal area.....

Pu R. LALZIRLIANA, MINISTER : Pu Speaker, Agreement ang deuha ngaih theih te a nih chuan le, an ngaih duh chuan le, a ngaih theih mai ang a.

Pu C. RAMHLUNA : Pu Speaker, hei a la awm zel a, chhiar an duh chuan kan chhiar chhuak thei a. Kha kha, ni 15 thla 7 ami kha a ni a, signature petu chu C. Hmar, Asst Secretary a ni.

Pu LAL THANZARA : Pu Speaker, Agreement kha i chhiar tir a, Agreement a ni si lova, MNF in agreement an nei ve em? Kan Home Minister hian chhiar tur a nei ve em? Khawngaih takin.

Pu C. RAMHLUNA : Chhiar ve se la a duh chuan, keini chuan kan ti a ni mai a, Pu Speaker, hemi lehkha hi a ni a, enge ni a thu kalphung min hrilhfiah thei se ka duh a ni.

Pu K.S. THANGA : MNF leh HPC inremna kha khawngaih takin Home Minister in chhiar ve rawh se.

Pu C. RAMHLUNA : Ka han sawi duh a chu he lehkha hi kan hmuh chu a ni ta a, he lehkha hi a kalphung kha enge thil awmzia tih kha ka han zawt a ni mai a ni. (PU LAL THANZARA: - Nia, Pu Speaker, lehkha a nih kha, agreement a nihloh kha.)

Pu R. LALZIRLIANA, MINISTER : Congress-I a tih kha, Congress-I hi kan awm lohna a rei tawh mai a. Tin, hei hi House Property ah a pe thei ang em, Pu Speaker?

Pu C. RAMHLUNA : Pu Speaker, ka pe thei reng mai hei hi, House Property ah.

S P E A K E R : Nia, engpawh nise, a thu kalphungah chuan tu emaw khan a statement

Pu R. LALZIRLIANA, MINISTER : Pu Speaker, a lawmawm e, ka lawm khawp mai. A chhan chu, hetianga chiang taka House a thu kan sawi hi, khatianga a chiang taka a rawn chhiar loh kha chuan engemaw leikuai takin min an lo ngai thei a. Tunah a rawn chhiar duh a, kan MLA kha ka fak a, lawmawm ka ti a.

Tiang chuan inremna ang hi an lo neih ve tawh chuan he lai ah hian inremna chiang zawk a awm a. MNF Party Mizoram sorkar leh HPC(D) te inremna, 'Memorandum of Settlement, 1994 tihlawhtling turin theih tawp a chhuah zel dawn' tih a awm a. A ziah zelna ah chuan, MNF Party High Command in a lo passed tawh leh India Prime Minister hnenah te a lo thlen tawh thin angin leh, Mizoram rorelna sang ber Assembly House ah te a lo buaipui (take up) thin tawh ang in, Mizoram sorkar leh Hmar People Convention (HPC-D) te inremna, Memorandum of Settlement, 1994 hi a bo a bang awm lovin, 'in total' a zavaia ti hlawhtling turin MNF Party chuan theih tawp a chhuah zel dawn a, a tul dan ang zelin, a tawp thlengin ti hlawhtling turin hma a la zel dawn tih a puang nawn a ni.' tih, helaiah hian an thawhhona thuthlung, hei hi ni 5.1.1998 ami a ni a.

Tin, helaiah hian MNF leh HPC thawhhona thuthlung, dated Aizawl, the 17th February, 1998:- 1) HPC leh Mizoram sorkar inremna, Memorandum of Settlement, 1994 hi a bo a bang awm lovin tih puitlin a ni ang. 2) HPC leh Mizoram sorkarin a sawi ang ngei in, HPC Demand area hi Sixth Scheduled a khung a ni ang.

Heng hi a serious em em in ka hria a. Sixth Scheduled a khung hi engemawti kawng hawi zawnga agreement hmasa a lo awm a nih pawhin hei hi thil tih chi loh tak niin ka hria a.

Pu LALDUHOMA : A tira Congress sorkar laia HPC te nena an inremnaah khan, official agreement-ah khan 6th schedule a khung hi chu an lo tiam daih tawh a ni. Chuvang chuan hei hi chu inpuh lo sela, sawi zui zel chi pawh niin ka hre lo, an inpuh tawn a, a buaithlak, a ninawm. Midang kan mamawh a nih hi kan ram hian tih ah hian chiang mai ila a tha in ka hria.

Pu R. LALZIRLIANA, MINISTER : Tin, pathumnaah chuan Sinlung Hill Development Council Area hi Mizoram Sorkar leh HPC inremna angin ramri hi siam fel a ni ang. Tawnluia, Vice President, Lalrorela, President, Hmar Volunteer Welfare Association tih a ni a. Chuvangin, wawiinah hian a hmain lo awm pawh ni sela kan inremna hnunungah, inremna hnunung a lo awm anih pawhin ka chhiarchhuahah khan 6th Schedule a HPC dah hi tum a ni lo va ni tih kha kan sawi duh a ni. Chuvang chuan an ni chuan Sorkar se chuan.....

S P E A K E R : 6th Schedule kha chu Parliament kutthlakna a ni hrim hrim, he House hian aw dial dial mah ilang kan nawr kal ang em tih zawk kha a ni. Khami kha chu kan thuneihna pawn daih a ni.

Dr. R. LALTHANGLIANA : Pu Speaker, khawngaih takin kan Home Minister zahawm tak khan tuna a chhiar copy kha kei ka la hmu ve reng reng lo mai a, min pe thei ang ti raw, wawiin rum rum lovah pawh, kan chan tlan dial dial kha a thain ka hria a.....

* Speech not corrected.

Pu LALDUHOMA : Sorkar hian a nei tur a ni a, induh a nih chuan ka pe thei lutuk ang che u naktukah. Kha kha chu sorkar aiawh leh HPC 'D' pawh an la nilo, chutihlai chuan HPC 'D' pawh an la awm lo. HPC nena an inremna thuthlung kha a ni mai, khatah khan 6th Schedule a dah tih kha chu an lo tiam daih tawh a ni, a tiamtu chu khatih laia sorkar kha a ni a, khatih laia sorkar kha Congress an lo ni ani mai a.....

S P E A K E R : inremna kha chu Pu Denga ten ralthuam an rawn tung a, tiang khan camp an siamah an rawn haw thlap thlap zel a. Chuvang chuan khatianga thil engkim alo kal hnuah khan Parliament khan an tih tur dik tak kha an ti chho ta zel a ni.....

Pu K. LIANTLINGA : Pu Speaker, agreement an chhiar an chhiar kha, an lo nei ve ve te pawh a ni awm a. Amaherawhchu, tihlawhtling leh chuang si lova, agreement party aiawh ten sign thin kha a tha lova. Chuvang chuan tha taka Mizo hnahthlakte rorel a pakhat hnuuia zalen taka awm theihna tur sorkar kan mamawh a ni tih a chiang hle in ka hria.

Pu R. LALZIRLIANA, MINISTER : MNF leh India Sorkar inremna pawh kha wawiinah hian tih hlawhtlin/puitlin lohte ala awm a, chuvangin a tul ang zela hei hi chu ennawn tur a ni ang a. Tichuan, hei hi MLA zahawm tak Pu Rama'n property-ah a pe si che u a, keinin kan pek ve loh che u chuan a dikin ka hre lo, ka lo pe

ve ang che Pu Speaker. Kha kha chu House property ah pawh a ngai chuang lova, sorkar thil a ni a ti a, kha kha chu a dang a ngai chuang lo.

Tichuan, Pu Rama thu baw kha kan react leh ang a. Lengpuih hian Kaikuang chi kha siam turin House Committee meuh pawhin an zu en tawhin ka hria a. Khami chi kha tunhmain sangha te ang a kan la tih ve loh avangin keimahniin kan la ti thiam chiah lova, Bombay lam atangin mithiam lo kal tura chah an ni a, anni an lo kal remchan rih loh avangin tunah hian kan la ti puitling thei lova. Chutiang a nih lai chuan kuminah sorkar farm-ah te han dah turin a chi kha nuai 3 leh sing 6 man vel kan lei leh dawn ani tih kha ka'n sawiduh a. Tichuan hei RD ah hian Pu Thawla leh Pu Rama deuh chauh kha rangva sem lampang kha a tha hle si a, min tih puitu an awm a. Pu Thawla pawh khan bundle 2,3 vel chauh kha min dil a ka duh aiin a inthlahrung a.

Pu P.P.THAWLA : Quota pathum tihna a ni e kha kha. Ka lo sawi sual palh a ni. Quota thum tihna a ni.

Pu R.LALZIRLIANA, MINISTER : Quota thum mai pawh kha a inthlahrung lutuk a. A aia tam kha kan MLA ten pek an duhin ka hria. Chuvangin Pu Rama pawh kha a tul dan azirin hei kan Finance Minister phei chuan 'Pu Thawla kha quota thum a ti a, quota 12 pe rawh' a ti a. Chuvangin Independent i ni baw kha. MNF i ni chiah lo baw kha, kan pe ngei ang che. Tin, Pu Rama pawh kha thahnemngai taka minrawn sawi chhuah saktu a ni a. A mamawh zual ang chi kha chu engngemaw zat kha chu kan puhruk thei ang tih ka ring a ni.

Tin, Ice Plant, Cold Storage chhia, heng hi repair tlak pawh a ni tawh lo han tih kha a dik maithei a. Ama'rawhchu, kan lo hmuh ve dan chuan Bawngkawn ami te hi chu tunah kan repair mek a. A thawh tur angin a thawk tan leh mek a. Tin, Bilkhawthlir leh Kolasib ami pawh hi tunah repair mek a ni tih kha ka'n hrilh duh a ni. MLA zahawm tak Pu T.T.Zothansanga zawhna kha IWMP hi duh hmun hmuna dah theih a ni lova. Work Programme kan siam a, chutah chuan a tah tawl deuh hlek a kal tur a ni a. Nikum lamah pawh khan ka bialah khian a hmasa berah khan kan lo telh lova, 'hei engtinng e ni ang' ? anrawn ti a. A hminga changtu nih takah chuan, 'Work Programme Schedule ang khan kal mai sela, a lo herchhuah ni a awm ve ang a, tahchuan kan hmang ve mai dawn alawm', ka ti a. Chuvangin khawngaih takin lo nghak ve hram hram selangin

Pu T.T. ZOTHANSANGA : Pu Speaker, proposal ang deuh chauh khan a la awm si a. Kha lai kha proposal ang stage a la nih chuan tih danglam theih a la ni lo'm ni ka'n ti ania.

Pu R.LALZIRLIANA, MINISTER : Proposal stage kha midang ta kha kan lak sak chuan MLA dang kha an vui ve zel ang a. Chuvangin ruling MLA i nih manah kan hnawl rih deuh ang che. Nakinah a lo kal ang a, mite tihthat loh dan kha a tha zawk anrawn zir chhuak ang a. Tun aia tha zawk dang (**Pu T.T.ZOTHANSANGA**:Kum 2021-ah daih asin kan hun kha.) Chulaiah pawh chuan i MLA leh mai dawn lo'm ni? Engngeni i lungngaih ? Tichuan DRDA lam arawn sawiah khan IWMP a PIA te hi anmahni an ni fur mai a, hei hi chu a dik lo a ni, ei rukna a tam a ni, sum siam tumna ang a ni, ti hialin arawn sawi a. Amaherawhchu, hei hi chu a changtute RD Department ah hian mi tha tam tak nei ila chuan hetah hian awm vek sela, PIA te pawh hi ka duh a. Ama'rawhchu chutiang chuan kan

indaih loh avangin a tih theih loh a. Chutiang chuan department dangah hian kan sem darh a ni tih kha ka'n hrilh duh a.

Tin, department danga kan va tih khan pawisa siamna ang tho khan kan department in an enkawl a kan ngai a nih chuan pawisa kha a vaiin an hnenah PIA te hnenah kan release tho a. Chuvangin anni khan pawisa siam nan khan an dik lo a nih chuan an lo hmang ve tho dawn a. Chutiang tur chuan kan sorkar department a thawk te hi an rinawm lo lem love, rintlak tak vek an ni tih kha ka'n sawi duh a ni.

Tin, Home Department ah hian tunah hian a bial lamah khan repair tur emaw in sak tur emaw a lang ve lo a'n ti kha a dik khawp mai a. Thudik tak a rawn sawi a. Amaherawhchu, nichina kan sawi ang khan NLCPR ah hian kan sorkar hotu ten Police Quarters chhiat zia te an hnathawh tam zia te an hriatin helamah hian tun tumah hi chuan i ti tam deuh teh ang an ti a, crore 30 chuang lai min retain sak dawn a thuphung chuan niin nimin lama an meeting thu kan hriatah chuan a ni a. Chuvangin heng atang hian kan bial kilkhawr deuh deuh leh a sensitive area deuh lai bik hi chu tih kan tum dawn a ni.

Col. Z.S. Zuala, MLA zahawm tak khan 'Home Guard permanent staff te hi ex-service tam tak te hi awm sela a tha ang e, khilai CTI te pawh khi anmahni enkawl a ni a, a tha hle mai' a ti a, a dik khawp mai a. Chutiang chuan tuna permanent a awm hi chu ex-service deuh vek an ni mai awm mange aw ka ti a, a dang atanga lak an awm vak lo mai thei, chutiang chuan kan Home Guard te hi kan lo enkawl ve thin a ni tih kha ka'n sawi duh a.

Tin, Pu N.P. Chakma MLA zahawm tak khan 'Fisheries hi a pawimawh tehlu nen rampawn ami te tunah kan la lei reng mai a,' a ti a, a dik khawp mai a. Rampawn ami lak lut lo turin NLUP lam atang in tan nasa taka lak a ni tih kha ka'n sawi duh a.

Pu P.P. Thawla khan Darlawn daia MST Bus accident a thi te ralna te leh nimin lawk a Saitual bula Bus accident a thi te ralna te kha a va intam hleih em em ve ti ang deuh niin ka hria a, kha kha zawhna awm thei tak a ni a. Darlawn bula mi phei kha chu sorkar bus a ni lehngal a; amaherawhchu khatah khan sorkar bus a ni a, an lo la insured lo lehngal a. Tin, an tlak dan kha a kal lohna tur route ah pumpelh ah a kal a; tin, kawng nal avangin a control zo lo va, driver thiam loh a ni kha kha. Chuvangin accident pangngai liau liau a ni a, Saitual bula tuna bus tla kha chu an lo kal vang vang a, keimah ngeiin khatihlaia meng kar patling hliam lova kha ka zawt a, 'a ding em bus hi,' ka ti a. A ding miah lo, kan kal vang vang a, chhaklam atangin lei a rawn min thut a, a ri bup a, kan tla ta vang vang mai a ni,' a ti. Chuvangin natural calamity hei hi chu a nih avangin tunah hian khatiang zat kha pek a ni a. Tin, Thingsul bul ami kha nuai khat in pe si a, tunah nuai khat leh singnga pek in tum bawk si a han tih te pawh kha a awm thei a. Amaherawhchu hman deuh lawkah khan an revised avangin nuai khat kha nuai khat leh singnga ah natural calamity a thi hi chu pek tur a ni tih a awm avangin nuai khat leh singnga vek pek tur an ni tih kha ka'n hrilh duh a. (**PU P.P. THAWLA** : Pu Speaker, khami rual khan New Serkawn daia thil thlengah pawh khan Chiang deuh a House

hriattir tur a awm em ? Electric in a man chungchang thuah khan). A department lamin an chhui lai mek a nia, a department lamah zawh nisela a tha in ka ring a.

Tin, Fire ah khan Tanky a awm lova tih te kha kan ngaihthlak kha niin ka hria a, Saiha ah hian litre 4000 dawng pahnih tunhnai ah khan kan dah a ni tih ka'n hriattir duh bawk a.

Tin, I.R. saw lama dah kha chu Thingkah ah khan kan dah dawn a ni. Tin, I.R. Battallion ram pawn a kal hi kum hnih kha a term kha a ni si a, engatinge tunah hian an va awm rei ta ve tih te a awm a. Kha kha I.R. Battallion an thang rei tur hun hi bithliah pakhatmah a awm lova, Central in tul an tih angin an hmang mai dawn a ni tih kha ka'n sawi duh bawk a ni.

Tin, BADP ah hian a bial chhungah Committee Member te, BRGF ah te hengah hian an awm a, MLA te an tello a nih chuan ka hre lova. Tin, IAY ah hian PD work order hi engatinge ni kei opposition ka nih lai pawh khan kan demand a, min pe ziah a, vawiinah pawh hian min la pe ziah mai a, an lo pe lo palh che a nih chuan heng hi PD te pawh kan lo hriattir dawn a nia. (Pu Thawla: DIG board member a quota te min tihsak theih dan a awm em aw) Pu Lalduhawma MLA zahawm tak kha performance budget tih kha chu kan sawi tawh a, department dangin an lo pe vek a keinin kan lo pe lo kha chu a vanduai thlak ka ti khawp mai tih kha ka'n sawi nawn leh duh a ni.

Tin, Fisheries chungchang ah kha chuan nuai 301 emaw ni ka lo hre Chiang chiah lova, hei hi release loh angin kan lo hria a ni mai thei a. Vawilekhatah min pe mai lova, nuai 301 kha min pawm sak kha a ni a, chutah chuan nuai 22 first installment atan min rawn released sak tawh a, chu chu kan han hmang zo ang a, UC kan han pe ang a, chumi dawt ah chuan min rawn release mai turah kan ngai a ni.

Tin, Home Department ah khan 'OB status hi sorkar enge kan dinhmun ? Gorkhali te OB status pek leh pek loh chungchang hi' tih a rawn zawt a. Committee in 'OB status a hlankai hi an tul a ni,' a ti a, pek a rawn recommend a, chu chu a nihna dan tak ah phei chuan cabinet in a thial ngai lo, Central a thawn thlak mai tur a ni a. A committee in Law department atanga an rawn tih kha; ama'rawhchu an fimkhur avangin cabinet in hei hi en leh phawt rawh se kan ti a, kan la dah ta rih a. Chumi chhung chuan thurawn te kan in pe duh a nih chuan in pek theih a ni e, lawm tak in kan lo dawng ang tih kan sawi duh a ni.

Tin, Jail hungna hi duh aiin a hniam deuh a duh duh a, in bah liam theih ang chi hi chu a dik lo khawp mai. Ama'rawhchu, hei hi kan rem san dawn chuan pawisa pawh lo nei ta teh reng ila kan rem san dawn chuan a foundation atanga tih vek a ngaih dawn avangin feet 4 vel lekah kan rem san a dawl zawh dawn loh chuan vanduai mangkhawng kan siam ang tih kan hlau va, chuvangin hei hi chu la ngaihtuah chhunzawm deuh tur a ni.

Tin, Phainuam School ho buaina eng engemaw a awm a kan hotute pawhin an enfiah tawh a, Assam lama awm a ni a, Mizoram lam mi in hmunah an loh neih si, a inner line ah kha chuan khulama awm a ni a. Ama'rawhchu a ram kha Mizoram mi pakhat ram a nih avangin keini hian kan chuh ve thei tho em ka hre lo va. Heng hi thu kal lai mek a ni tih kha kan sawi duh a ni.

Tin, ka sawi tawh khan IAY thlan chungchang hi BDO leh VC te, hman deuh ah phei kha chuan NGO te nen kan ti thin a. Helai atang hi chuan order hi a tha thin khawp mai a; ama'rawhchu a tak tak a lo implement ah hian politics te hi a lokal ler deuh va, a lo kal firfiak thin a ni mai thei a. Chutiang lo va thlan a awm a nih chuan a pawl khawp mai a, a rawtna kha ngaihtuah tlak niin ka hria a, kan lo ngaihtuah zel ang tih kha ka'n sawi duh a ni.

Pu LALDUHOMA : Pu Speaker, mipui pungkawmin public meeting a thlan nise tih kha Minister hova kan rel kha a ni a, district level pawh khan a passed tawh a. A kal dan ngai hian kan kal dawn nge mipui hi kan thlan tir ang tih kha, khaw mipui pungkawm hi chuan thlang ila a dik dawn tih a chiang a, khalai kha in keng kawh tak tak ngam dawn lo tihna a maw ni le ?

Pu R.LALZIRLIANA MINISTER : Pu Speaker, ken kawh ngam leh ngam loh tur pawh a awm lova, tunah hian a nawlpui a thlan hun kha... engemaw han belh zeuh zeuh mai chauh kha a ni a. Chuvangin party induhsakna chi-ah ka ngai lo reng reng a, kei chuan he thil hi. Pe thei lovin IAY in sak sak an chak tur a ni lo hrim hrim a. Chuvangin a retheite in sak sak mai tur a ni, chu chu vanneihna dawna tur a nih pawh ka ring zawk a. Chutiang chuan kan committee pawhin kan lo pass tawh, khatiang kha chu kentlang kan tum dawn a ni. Tlema hemi permanent wide list thlan thar leh turah hi chuan kan lo ti ngei ang tih kan tiam ang e.

Pu LALTHANSANGA : Pu Speaker, IAY chungchang hi Serchhip District Vigilance Committee pawh khan kan khel nasa hle a. A department ho pawh hian a thlan awm deuh engemaw gramsabha pawh in a thlan, heti laiah office tih danglam leh mai te hi a thlan avang khan a department te pawh hian lo va verification se thlan awm deuh chu, khatiang awm deuh deuh a kha thlalakte hi lo nei se tih ang deuh khan kan han rel a. Chutiange pawh chuan kan han tih tir hial a, a nih loh kha chuan VCP fa te, a makpa te hmun hnih hmun thumah te khan an dah mai zel a. Chutih lai karah chuanin luah ngam manglo leh silpouline nena tuam mai mai a tam hle mai a. Khatih laia ka'n tui hnih duh chu a department lam pang pawh hi lo tang ve deuh sela tih te kha han tel thei se a van tha em.

Pu P.C. LALTHANLIANA, MINISTER : Pu Speaker, kan Minister zahawm tak khan a tiam mai dawnin ka hria, ka ding lawk duh a. Hetiang thil gramsabha a thlan tih hi a thu a tha viau a lang hi, a that loh dan hi a tamin ka hria a. Family anga awm tak tak, pahnih pathum awmah hian a mipuiah te hian innawr theih deuh mai a ni. Chuvangin a thu a that viau lai hian a takah hian thil tha tak niin ka hre lova, chuvangin a practical ah kan zawh ka ring lo. Mipui kal khawm hian in sak tanpuina dawng tur pahnih thlang dawn ila, a veng veng, a chhungkua, a ni nuai mai lawng maw tih te kha a awm ve thei a. Chuvangin khawtlang hotute thlanchhuah tawhin an thlan hian fair tak hi chuan a khua a fair lo deuh te pawh an awm theih tho laiin a tlangpuiin khaw tam zawkah hi chuan a dawng awm tak tak hian an dawng ve tho a ni tihte pawh hi ka hre ve a. Chu chu arawn tiam ngawt kha a dik ber em aw ka'n ti ve deuh a ni.

Pu R. LALZIRLIANA, MINISTER : Aw, a tha thei ang ber mipui thlan chu a tha ber turah ngai ila, a tha thei ang ber turin kan lo kal ang. Pu Speaker, kan thlan tir tur dik tak, in bial a an lo thlang a nih pawhin tikhan an thlang zel a, a tha a ni mai a lawm hlauh tur a awm hlei nem.

Pu JOSEPH LALHIMPUA : Pu Speaker, khawngaih takin kha kan sawi kan sawi a. Lunglei District ah chuan Member of Parliament pahnihte kaihhruaina hnuaiyah meeting hmanni lawka kan neih ah chuan tuna kan member zahawm tak kan Minister-in a sawi ang khan, mipui thlan hi a tha lo a ni. khawtlangah inpumkhat lohna a siam thei a ni tih kha District level a kan MP pahnih hova kan meeting ah chuan kan sawi tlat mai.

S P E A K E R : A area a zir te, khua a zir te pawh a ni ang e, chhunzawm ang aw.

Pu R. LALZIRLIANA, MINISTER : Pu Speaker, a rei tawh hle mai. Midang nin chu sawi loh kei mah tak hian ka kawngte hi a na a, rei ka ti tawh khawp mai a. Mahse sawi tur a la awm si a,

S P E A K E R : A la awm maw? Midang pawh kha darkhat leh minute 10 an tling ve tho a ni. Darkar khat emaw ila la dawn chiah chiah tho a nia.

Pu R. LALZIRLIANA, MINISTER : Min han ngaihtlak sak zel tho a niang chu MGNREGS tih hi alo chhuahna bul chu a ngai tawh lova, kan hmanna a rei tawh a, hengah hian sawi tur a tam a. Kuminah hian hetah hian nuai 32748 leh sing 6 leh sangga labour Budget atan Central sorkarin min pawmpui a ni. Chu kan hman tur lam hlir a nia, kan kalna tur kha, kan in sawimawina lam ala ni lova. Tichuan matching share-ah hian nuai 2533 ruahman a ni a. District zawng zawngah hian ni 100 inhlawh ngei tura beisei kan ni tih kha ka'n sawi duh a. Tin, material component kha chu nichinah khan kan sawi chiang tawh a, a tawh tawhin ka hria a. Material component te leh ni 100 inhlawhnaah hian a lang tlang thei ang ber transparent a pawimawh a. Chutiang tur chuan Social Audit hi neih thin a ni a. Kumkhatah vawihnih kan nei thin a ni tih kha kan sawi leh duh bawh a. Tin Central sorkar chuan NREGS hi kum 2000 schedule one kha rawn kaipharh zau deuh hlek a, chung ah chuan thil dang dang tih theihna turin kawng laih buh bal thar theih na atana khatia kawng va laih te, sum tling thlai thar chhuah te, ran vulh lam te nasa zawka tan kan lak theih na turin waviin ah hian min rawn phalsak ta a ni. Waviin ah hian V/C awmna khua zawng zawng ah BNRGSK in hi sak sak tum a ni bawh a ni.

Tichuan, IAY lam kha tunah khan kan sawi a, new construction hi cheng 48500/- a ni. Hei hi duhawm tham ve tak a ni, mahni in sa thei ve lo tan chuan YMA te leh engemaw ten an puih pheh chuan in tha tak an sa thei a. A siam thatna upgradation hi 15000/- a ni a, hei hi state sorkar in tum ve state share kan nei a, 9:10 a tih kha kan sawi leh duh bawh a. Tin kum 2012 khan nuai 1261 leh sing 5 leh sang 3 kan hmu a, tichuan Ministry of RD chuan in 2332 sa tura beisei kan nih laiin in 3227 kan sa ta a, kan achievement record hi chu 138.38 lai kan thleng phak a nih chu. Tiang chuan kumin ah hian Central sorkar atanga pawisa kan dawn beisei zat chu nuai 1172 leh sing 8 leh sang 4 a ni, a Plan fund ah hian nuai 220 leh sing 2 leh 3000 dah a ni a, Central sorkar target min tuk zat chu in 2687 sak a ni. IWDP kan tih kha chu kan zo tawh a, sum tam tak kan hmang a, helai ah hian a tawp dawn lamah kan han lut ve a, kan hlawhtling tha tehchiam lova, a pawh kan ti khawp mai a, December ni 31 hi a tawp hun tur a ni. Chumi thlak nan chuan IWMP alo chhuak leh ta a, hei hi tunah hian kan kalpui tan leh mawp mawp a, District tin ah hian water set .. cum data te

kan bun fel vek tawh a; tin, a thawktu tur pawh kan la fel vek tawh a. IWMP hnuai a hma lak na tur ah hian preparatory phase te, work phase te, consolidation phase tih a te awm a, chung ah chuan preparatory phase kalpui mek a ni a, Project works pawh hi kan hmang dawn tan chauh a ni tih kha ka'n sawi duh a, kumin a kan hman turah hian nuai 500 hi state share atan dah a ni, hei hi Central atanga lo kal do ve na tur a ni tih kha ka'n sawi duh a.

SGSY a tum ber chu chhungkua rethei te retheihna atanga khaichhuah a eizawwna ngealnghet neih tir a ni. Chutiang chuan National Rural Life Mission hi Mizoram ah pawh bul tan a ni tawh tih kha ka'n sawi theih ni sela a tha ang e. Sawi tur a tam a, amaherawh chu kan nin lutuk chuan kan ngaithla tha thum duh lo ang a, ka hnung ah Minister zahawm tak ala awm si a. Tichuan annual action plan anga sum ruahman chu cheng nuai 470 a ni, matching share ah hian nuai 47 kan dah a. Kum 2012-13 atan hian approved sa chu nuai 281 a ni tih kha ka'n sawi duh a, NRLM hi kum 7 chhungin Mizoram pum huap a kalpui tur a ni a, a bul tan nan Kolasib District Thingdawl leh Bilkhawthlir te, Serchhip ah Lungdar leh Serchhip Block te dah a ni tih kha a ni.

Tichuan hei lo hi thil thar deuh, keini hi Central Sponsor Scheme atanga thil thar ngah kan ni a, chu chu kan zavaia hriat tulin ka hria a, North East Rural Livelihood hi kan nei leh ta a, Ministry of North Eastern Region chuan World Bank nena tang kawpin North Eastern Region-a thingtlang mirethei ten eizawwna ngielnghet an neih theihna turin scheme hi a kalpui dawn a, hemi atan hian cent per cent central funding a ni tih kha kan han sawi duh bawka ni. Tichuan DRGF te hi chu kan hriatsa tawh kha a ni a, sawi tam pawh a ngai lova, kumin ah khan District pahnih development fund hi tihpun a ni a, Lawngtlai ah hian 1151 atangin 1182 a tih pun a ni a; tin, Saiha ah hian 1147 atangin 1176 a tihpun a ni. Capacity building & training atan hian nuai 200 hi dah ngar ngar a ni. Hetiang a lo nih takah chuan nidang aia kan pawisa hmuh aia tam kha ruahman a lo tul ta a, chu chu nuai 2558 kumin atan hian ruahman a ni. BADP lamah hian Block 16 kan kal tih kan hria a, cent per cent central grant a ni tih kha kan sawi nawn leh duh a ni. Tichuan, kumin atan hian nuai 4017, nikumah khan nuai 3702 hmuh a ni a, kumin atan hian nuai 4017 hmuh a ni tih kha ka'n sawi duh a ni. Chu chu heti laiah pawh hian BADP pawh hi endiktu an ngai a, third party inspection neih tur a ni a, chuta tan chuan Consultancy Firm pakhat kan ruat bawka ni, tunah hian hna an thawk mek tawh a ni.

Tin, NEC funded project tih hi a hranin kan la nei leh a, tunah hian Ngopa ah hian Irrigation and Flood Control Project nuai 432 leh 16000 in kan thawk mek a, hei hi kum 2013 a zawh tur a ni. Tunah hian Ngopa thlengin khitah Damdai thlengin a chhak ngaw, zo ngaw tha tak mai khi tui kan khuap a, a han kal tawh te chuan K.M khat lai a dil ang an ti mai a, chutiang chu kan hmalakna a ni a, khilailah khian an chakai khi a tui em em mai a, ka rilrua lo lang chu Ministry hmasa lama kan Chief Minister in 'Chakai farm kan din ang' a tih te kha ka hre chhuak a, hmanni a Ngopa a ka kal pawhin ka hre chhuak a, an chakai chu an lo man a, Aifiar hlir a ni mai a, helaia kan thutho laia ka sawi kha ka hrereng a, ka pu, a tha khawp ang, a bawppui te hi a tui tehlul nen,' ka va ti, a phur lai hmel siam siam te kha ka mitthla in a hmu a, khatih lai hun khan lo ti hman se Chakai farm han siam nan khan a tha tak tak awmin kan hriatpui a ni.

Tichuan hei, kan Rural Development Department hi motor kan BDO ten an nei chhe em em mai a, a buaithlak khawp a an khawngaihthlak khawp mai a, chutiang atan chuan kumin ah khan Gypsi paruk lei turin kan han peih fel a, fur lai hi chu motor thar a tlan te pawh an chak tawh vei nen, ama'rawhchu vanduai thlak takin K deposit ah an lut leh hlauh mai a, kan nei thei lova, kan Finance lam pawh hian min release hma thei se, kan BDO te pawh hian motor tha deuh ah an bial te pawh hi han vil ve se kan duhpui hle a ni tih kha ka'n sawi duh a. Tin, heng sum te hi uluk taka kan hman, motor leina tur te hi a hranpa a lo kal a

ni lova, sum kan renchem avanga khata tanga kan pawh chhuah hlawm kha a ni a, chuvangin kan department hnathawktu te pawh hi an fakawm hle in ka hria, hei chauh hi a ni lova, department hian motor repair-na bill emaw, staff te damdawi in awmna bill emaw hi tunthleng hian chengkhatmah kan nei lo a ni. A ropui hle in ka hria, hei hi keini Police Department te chu kan tam bawk a, ba kan ngah zia kha kan hria a, T.A./D.A vel te. Chutiang nilova kan department an lo tang hi an chhuanawm takzet in ka hria a ni. Kan MLA ten in sawi Social Education atang te, Housing for project staff tih atang te hian kumin ah hian tuna kan Plan dinhmun atang hian in pekbelhna tur on going pawh kha han thuam thatna tur kan nei dawn lova.Ama'rawhchu hei hi kan opposition ten 'Central fatlum in ti si' min ti min ti bawk a, kan hotute nen tan kan han la vak ang a. Nakinah RE lamah te chuan engemaw chu kan hmuh theih ka beisei a, chutiang tur chuan kan Chief Minister pawhin tan a la ngei ang tih ka ring a ni, chu chu RD lam ah chuan ni mai sela.

Tin, SAD hi tunhnai lawkah khan ka'n chang ve a, SAD hi a lian khawp mai a, Department 62 leh personal branch 82 a thawktute hi enkawl a ni a. Chuta thawk chu mi 1204 lai an ni a. Hengah hian electric khawl t,e stationery te, thil dang hrang hrang, medical traveling allowance zawng zawng te kha SAD atanga pek vek an ni a , sawlaih sawn kan hautak viau a ni tih min hriatpui ka duh a.Tin, Khatla leh Secretariat hlui Treasury square ami te, helai vela ami zawng zawng hi kan enkawl vek bawk a ni a. A hna hi a hautak hle a, nichina ka sawi tak ang khan room repair a lo ngai a, vawiinah hian an awm theih loh avangin tih that a pin te a lo ngai a.Chutiang chung chuan vawiinah hian kan officer te engemaw zat room chang lovin kan la dah a ni.Tichuan nichina ka sawi tawh ang khan Secretariat additional building hi ruahman fel tawh a ni a.Chu chu 13th Finance Commission atang khan nuai 2000 min pe a, PWD in tunah hian tender turin an buatsaih mek a ni.Tichuan SAD hian motor 91 a enkawl mek a, heng zinga 27 hi kum 10 chuang tawh an ni a.Jt. Secretary leh Addl. Secretary te pawh motor pek theih loh mi 10 chuang kan la nei nghe nghe a ni.Kan sorkar hnathawkte an dawhtheihna avangin lawmthu kan sawi a ni.

Home Department lamah hian kal tawh ila a tha in ka ring a. Halpuah leh silai lem hi chu kan hria a. Kumthar leh Chrismass bawr vel te a tel lova kan hmang thei kha Zofate tih kan nawm zia, kaihhruaina tha ah chuan mipuiin thu an awih zia helai atang hian a lo lang em em in ka hria a.Mipui chungah lawmthu ka sawi a,Tin, hetiang hma lo la tu, a thim a var pawh thlu lova theihtawp lo chhuahtu kan NGO te, kan Police te, kan Magistrate te chungah pawh hian lawmthu sawi tur tam tak a awmin ka hria.Tichuan Chrismass bawr velah te pawh khan Home Department kan chan chiah chu nilo mahsela Bazar lun laiah mipui, motor chuanna nei ve lo tam tak, thingtlang mi an lo kal khawm a, chutiang ang te free taka an kal theihna turin kan Transport Minister in hma a rawn la a, mipuiin nuam an ti a, khang te kha lawmawm kan ti a.Tichuan, nichina kan sawi tawh ang khan 3rd leh 5th leh 4th Battalion Headquarter hi tihfel tawh a ni a.Chung chu Thingkah ah 3rd Battalion, Lawngtlai District ah dah a ni ang a. 5th Battalion hi Sakawrtuichhun Police Training Centre kan tih thin Pu Duha bial ah hian dah a ni ang a.Tin, 4th I.R. battalion chu Rengdil, Pu Lalrinmawia bialah dah a ni dawn a ni. Chutiang chu a sakna turin tunah hian pawisa ngaihtuah mek a ni a. TCIL in he a sak hna hi an thawk dawn a, a sum pawh hi an rawn hai chhuak tur ah kan ngai a ni. Tin,hmanniah khan kan Union Home Minister lo kal khan min tiam tawh bawk a ni. Tin, Sakhn tlangdunga Mizo chhungkua awm mi 83 te hi sorkar hmasa lam atang tawh khan chhawmdawlna pek duh a ni a.Amarawhchu kum 10 chhung khan an ti hlawhtling hman lo hlauh mai a.Tichuan keini kan han luh ve khan kan han bei ve ngar ngar a, chhawmdawlna hi pek a ngai a ni, Tuikuk te pawh Mizoram atangin an tlanhhia a, anmahni duhthal renga tlanhhia an ni a,heng Sakhn tlangdunga Mizo awmte hi chu huan thlai tam tak neitute an ni a.Anmahni duhthu ni lovin ral hlauvin an lo tlanhhia a ni

a, umchhuah tak tak an ni a. Chuvangin chhawmdawl na hi an in hlutna leh an huanthlai hlutna ang zawng chu kan phut phak lova, chhawmdawl na in pe ve tur a ni kan ti a. Tichuan nuai khat leh singnga pe turin sorkarin hma an la a, khatia kan tih kan tih lai khan sanction min pe thei lova, chuvang chuan hemi Tuikuk repatriation atan hian pawisa tam tak a la awm a, heta tang hian first installment 75000 hi chu kan pe tawp mai ang kan ti a, kan lo risk a, kan pe ve tawp mai a. Tiang chuan kan zu dil zui a, tunah hian min rawn sanction tawh nghe nghe a ni tih kha ka'n sawi duh a. **(PU LALDUHOMA** : Pu Speaker, Sakhan tlangdunga awm ho kha khawngaihkhaw hian an awm a, Tripura tlang dungah khuan khaw hian nge an awm tih kha a hmun kha min hrilh thei em ?) Sakhan tlangdunga lo tlangchhe ho kha tuna Tripura a la awm ho kha chu Jampuitlang dung hmun hrang hrangah khuan an awm a; tin, Mizorama rawn tlangchhia kha Zawlnuam bialah khuan an tam ber a, Champhai leh hmun danga awm pawh an awm nualin ka hria a ni. Tin, keimahni sorkarin a pek loh tur Tripura ami te he pawisa min rawn release tawh ah hian Tripura sorkarah hian kan pe ang a, khulai Tripura Jampui tlangdunga la awm kha chu annin an pe ve dawn bawka ni tih kha ka'n sawi duh bawka ni.

Hei CCTNS kan tih Crime and Criminal Tracking Network System hi a pawimawh khawp a, hei hi kan Police Station zawng zawng internet-a thlun pawhna tur a ni a. Vawiin hian agreement BSNL te nen signed tawh a ni a. Tin, CCTNS hmalakna pawimawh ber pakhat chu Assistant Integrator thlan hi a ni a, hemi atan hian MS Waltra Private Limited hi ni 29.3.2012 khan anni nen khan inremna kan zia tawh bawka ni. CCTNS hma laknaah hian India rama titha berte zinga mi kan ni nghe nghe a, kan Police a thawktute a tan lakna avangin lawmthu kan hrilh bawka ni.

Hei ralthuam tha hi sawi a ngaiin ka hria a. Kan Police te han cho phurna zel pawh a ni ang a, chuvang chuan Mizoram Police ten khawvel-a silai tha berte zinga an ngaih kan nei tan tawh a, kan nei mek zel dawn a. Call M 4 an ti a chu chu Carbine a ni a, hei hi 200 lei phalsak tawh kan ni a, import hi duh ang anga lo tih mai theih a ni lova, a channel a thui deuh hlek a, hemi hi kan la buaipui a, hemi permit hi kan neih chuan kan lei mai tawh dawn a ni, a man te pawh hi kan nei vek tawh a ni. Chu lo chu Heckler & Coach MP5 te A 3 an ti a, hei 9 mm hi Commando te hman turin 18 lei fel mai theih tawh ani a. Hemi bakah hian Heckler & Coach MP5K hi 50 tlema lian deuh a niang, hei hi lei tura tih fel vek tawh bawka ni a. Bereta MX4 an ti a, chu chu MX4 storm hi 200 Stengun Carbine thlakna turin Union Minister-in Mizoram a rawn zin khan kan lo dil a, hei hi BSF atanga la turin an hman hlui ni lovin, BSF khan tam tak import an lo nei a, an lo la tawh a, la tura tih kan ni a, la turin kan buaipui mek a ni. Tin, 9 mm glock 19 Pistol hi 116 kan nei dawn bawka, kan Police te hi tha taka thuan an ngai a, huaisena ram venhimna turin anni lo chu hmabak, hmachhuan kan neih loh avangin an pawimawhna hi kan sorkarin a hria a. Hemi bakah hian 300 a dang pawh lei belh tum a ni tih kha ka'n sawi duh a. Tin, Sniper Rifle, hla deuh hlek atang pawha va saina tur hi engemaw zat kan lei dawn bawka ni.

Tichuan, I.R deployment kha chu nichinah kan sawi tawh a, kan sawi bakah hi chuan... repeat tawh lo ilangin 2007 -2008 a 2ndIR Chattisgarh a zuk kal te kha kan pawisa reimbursement kha min pe duh lawk lo a, an ba reng a tunah hian, hman deuh lawk khan crore 18 leh nuai li leh sing thum min rawn pe fel tawh a ni. Ba Chattisgarh lam atang kha chuan a awm tawh lo a ni tih kha ka'n han sawi duh a. Tin 3rd IR Battalion hi January 2010 khan Assam ah an kal a, tahchuan tunah vawiin thleng hian an la awm a ni. Helaia kalte hi Chattisgarh a kalte an kal laia an insawi hlauh leh rawn haw an chak em em ang kha a tam ber hi chu an ni lo a, a

then te hian kal minrawn dilzawka, a lawmawm ka ti a, kan khawvel hawi te pawh hi a lo zau chho zel a ni tih heta tang hian a lang Chiang Hle in ka hria a ni. Tin, 5th IR hi Manipur ah leh Uttar Pradesh ah Khan election duty tein an zuk kal ve bawka ni.

Tichuan Pu Speaker, 13th Finance Commission atang Khan 31 crore Police Station 24 leh Outpost eng emaw zat quarter te sak nan minrawn pe a, tunah hian chutiang ti tur chuan hma kan la meka, Pu Rina kha Zophai leh Phaisen ami pawh PWD ten, hei in kan sa dawn a, khate kha an hma meka ni tih kha ka'n hrilh duh a ni. A pawimawh zia kha nichin ah Khan an sawi a. Tichuan Mizoram Police headquarter sakna tur hi tunah hian buaipui meka ni a, hei kan Police Headquarter Aryamess, sawlai vel IG, DGP awmna lai vel saw rambuailaia hmanhmawh taka pioneer ten min sak sak kha a ni a, tunah hian a chhe tawh a, India rama chhe ber pawl a ni tawh ang a, a zahpuiawm hle a, hei hi kan hotuten an ngaimawh hle a, hemi sa tur hian theitawp an chhuah tawh a, Tele-communication Consultant India limited te hemi sa tur hian tih an ni a, an ni hian Battalion thum headquarter leh saw saw an sa dawn a, sum mamawh pawh hi Central sawrkarin minrawn tum sak dawn a ni.

Forensic science laboratory hi kan hlawhtling chho zel a, tunah hian sawlai complex kawng a in tha tak RD, DRDA office chhak a mi saw a ni a, tunah hian hawn theih a ni tawh a, amaherawhchu electric lamah harsatna kan neih avangin kan la hawng thei lo a, nakin lawkah chuan hawn theih tura beisei a ni a. Tin, hei hi a pawimawh em avangin Cabinet in min phalsak tawh a, Asst. Director atan heng subject bik finger print leh photography te, lie detection, cyber forensics tih te, DNA post siamte hi ngaihtuah meka ni a. Tunah hian scientific officer post 4 pawh siam tum meka ni bawka ni. Tin, Fire ah hian han sawi leh zawka ila, tunah hian nikum maiah Khan SSO post pahnih hi MPSC kaltlangin kan hnawh khat tawh a; tin, SO post pahnih hi promotion in kan hnawh khat bawka, quarter khawi hmunah te emaw repair tam tak kan nei a; tin, sak thar te pawh kan nei a Fire emergency service tih changtlun nan hian 13th Finance Commission atang Khan 20 crore minrawn pe bawka, hei hi kumin ah hian, nikum ah Khan tlem kan lo hmang tawh a, kumin ah hian 2012 – 2013 ah hian nuai 600 hman tum bawka ni. Chuta tan chuan Fire hi hmun pawimawh an chan a ngai a, kan DGP te, kan Police lampang hotute an lo in phalna avangin sawlai Assam Rifle luh thlak dawn, secretariat kal thlak dawna kawng chhak lampang, bazaar bul saw, kan thiat darh vek ang a, kan nawr hek ang a..... chutah chuan chhawng ruk awm theihna tur kan sa ang a. Tin, ITI-ah hian chhawng nga awm theihna tur kuminah kan sa ang a; tin, Armed Vengah Type-II quarter awm theihna tur pali kan sa ang a. Tin, Champhai lamah, Pu TT-a kha kan telh ve miah lo emaw ka ti a, kan telh ve a nih hi, Staff Quarter pali kan sa dawn a ni. 1st Station Staff Quarter pali kan sa dawn a ni tih kha ka'n sawi tel duh a.

Tin, Sainik-te hi chu kan sawi tawh a, nichinah Khan Chhingchhipah hei hi din tur a ni a, tunah hian hma lak meka ni a, vaibelchhe za senga sak tur a ni a, tunah hian nuaih 50,63,23,000 hi administrative approval kan hmu tawh a. Tunah hian 1st Instalment minrawn released tawh a ni. Heng hi Executive Agency atan thlan tawh a ni a, Hindustan Prefed Ltd. thlan an ni a. An hnuai hna thawktuten tunah hian metre 600 lai an lai tawh a; tin, a zau lam pawh kha 8 metre lai a ni. Home guard hi nakinah pawh kan la sawi ang a, tah hian a theih ang ang – Civil Work-te leh an mahni tih changtlunna turin hma kan la meka ni.

Prison, a zo tep tawh a nia, min lo ning deuh a nih pawhin....Finance Commission atang Khan pawisa crore 20 lai kan hmu a, heng hi kan Jail sak sa te leh khatiang tih changtlunna tur kha a ni a. Tichuan kuminah hian nasa taka hmalak kan tum a. District Jail Serchhip hi hawn kan tum tawh bawka, hman deuh lawkah Khan District Jail Lawngtlai kha kan hawng tawh a, District Jail Serchhip hi hawn kan tum tawh a, hei hi Central lamin hawng turin minrawn nawr sek a, amaherawhchu, post create hi a ngai a, Out POST han tih

hian post create kha a ngai zel a, khatiang tho kha a ni a, posts 59 lai kan dil mek a, kan Finance Minister hian min lo hriat sak a, tih laiah khian kan hawn vat theih hi kan beisei a ni.

Police bikah hian Budget hi crore 442 lai kha a ni a, a tam kan han ti a, a dik a, amaherawhchu, Home Department chhungah hian Unit 25 lai hi kan awm a, kan hautak viau a ni tih hi min hriatpui kan duh a. Tiang chuan kan medical treatment-ahte hian kum kal taah khan nuaih 716 kan hmu a, hei hi a tlem tham khawp mai a. Tin, travelling expenses-ahte pawh hian nichina ka sawi tawh ang khan zin reng mai kan ni a, a hautak a, TA/DA-ahte pawh hian a hautak hle a, motor-te pawh hi mi dang aia kan hautakna a awm a, a chhan chu chumi hmunah pawng sual, chumi hmunah rukru, chumi hmunah chuan hel, khatiang kha englai pawhin a awm a. Chutiang chu dawhkan atanga lo monitor mai chi a ni lo va, officer-ten a hmunah an kal chilh zel a, chutiang a nih avang chuan sum pawh hi a ngai hnem bik a, sum kan heh bik tak zet a ni tih kha ka'n sawi duh a. Tichuan, kha kha duh tawh mai tawh ila, hengte avang hian Department dang ang lo takin sum leh pai kan mamawhna hi a tam em em a ni tih kha ka han sawi nawn duh a. Home Department atangin Zoram hmel a lang a, chuvangin sawiselna tam tak pawh phur thin mah ilangin, theih tawp kan hotuten an chhuah zel dawn a ni. Mipui changkang ila, sum ngah ila, mipui him si lo ila, kha kha kan tan a tha chuang lova, chuvangin, kan Police-ten theih tawp an chhuah theihna tur atan kan zavaia kan MLA-te pawhin heng kan Budget-te hi min support-a, min rawn sawi saka, kan lawm a..... si lo ila kha kha kan tan a tha tun hnuah pawh kan that tlan na zel tura thurawn te min pe zel turin kan sawm duh che u a.

A tawp nan tak tak chuan vawiinah hian hmar lamah HPC 'D' hel te, kan luh tirh khan hel angah kan ngai lo va, a chhan chu engmah min ti buai lo va, hel an awm lo Zoramah kan ti a. Amaherawh chu thawkkhat deuh lai atang khan tih loh tur Hmar mipuite manganna turin thil tam tak an rawn ti ta a. Chhiah an khawn a, NREGA atangin V/C te hnenah chuti zat in rawn dah tur a ni, sorkar hnathawkte hnenah chuti zat in rawn dah tur a ni, chumi hmunah an ti a. Kan V/C te pawh keimahni V/C siam ngei te pawh tam tak kan man a ni. Chutiang chuan ti tawh lo turin kan duh a, kan sawi cham chi a. Amaherawh chu vut laka vawih an sawi ang chauh niin an ti zual zel emaw tih turin a lo awm chho a. A tawpah phei chuan kan NGO lian ber YMA, Kristian Thalai pawl tluka mi tam takin an lo ngaih Pawl thianghlim leh tha, kan inzawmkhawmna atana pawl duhawm ber ni a ngaih theih mai chu an Area lamah chuan an din an lo khap ta a, an lo phal ta lova. Hengte hian sorkar ngeng a chhun hle a, pawh a ti a. Chuvang chuan hetiang ti tawh lo turin thurawn te pawh kan pe thin a. Amaherawhchu ka tih theih tak emaw tiin ti hian an ti zel a. Chumi avang chuan sorkarin ti lo tura kan tih, entirna tam tak kan siam tawh hnuah pawh an tih luih zel avanginan hotu pathum an Chairman te, Army Chief te, Deputy Army Chief te kan man ta a. Hetiang hian hmun dangah kan zuk man a, heng SOO agreement Mizoram sorkar hian an bawhchhia a ni tih ang chi te. Tin, mi thenkhatin Home Dept., a bikin sorkar te an charge a. Amaherawh chu heng hi an area pawnah vek kan man a ni a. Tin, keini nen hian SOO kha kan sign bawh lova; tin Manipur-ah kan va man bawh lova. A tul chu SOO agreement-ah khan mipui pawh an sawi tur a ni lo, tumah an ti thlabar tur a ni lo, silai nen an ram chhuak tur a ni lo. Khang zawng zawng kha a awm vek a ni. Chutiang an tih luih avang chuan khawiah pawh awm se langin a tul chuan kan man thei a ni tih hi entirna tha tak a lo chhuak tawhin ka hria a. India ram khawpui berah pawh an Chairman kan zuk man thei a, Delhi Police puihna in. Tin, Silcharah an Army Chief te pahnih kan zuk man thei bawh a. Chuvangin hetiang an tih hi kan duh lo tak zet a, anmahni ka haw lo va, an thiltih hi a dik lo a ni, ram mipui tan, Hmar mipui tan. Rambuai kan hre tawh a, helaia awm chuan kan hre vek a. Mizoram a buai laiin a hrehawm em em a ni, development a kal thei lo va. Chuvangin hmar lamah pawh development hi a kal that theih kan duh a. Saw lama contractor apiang nasa takin pawisa an

lo dil a, awm pawh an awm ngam lo a ni. Chutiang chu a awm tawh lohna turin vawiih hian hna kan thawk a. Tiang chuan Hmar mipuite kan duhsak em em a. Vawiih pawh hian Sinlung Hill Development Council-ah vaibelchhe 3 zet (nuaih 300) kan pe a. Tin, chutiang piah lamah RKVY atangin crore 3 bawk, vawiih hian crore 6 saw lama hman tur liau liau in kan dah a. Hmar mipuite manganna hi he sorkar hian a hria a. Chuvangin development pawh a thlen that theih ve hi kan duh a, chuvangin helte hi thenfai an ngai a ni. Vawiih a hetiang zaidawh taka an hotute kan man hnu ah kawhmawh an la bawl lui a nih chuan hei aia na hian kan Police te hian an nawr zel dawn a ni tih kha he House hi ka hrilh duh a. Chutiang anih rual chuan, a mihring mimalah tumah kan haw lova, tumah tihnat pawh kan duh lo a ni. Vawiih hian fapa tlanbo a pa hnen ah, a pa sum tam tak a khawhral hnu-in a lo haw leh a, a pa in khawngaih leh duat takin, duh takin a lo kuangkuah leh a. Thil tha ber ber a pe a, a sin a, a eiin a in tir a ni. Chutiang chuan, vawiih ni-a volunteer HPC (D) a awm mek te pawh hi Zoramah hian lo haw leh sela. Helai hian sorkar hian tuamhlawm a inhuam a ni tih hi vawiih hian ka puang duh a. Chutianga lo haw leh duh an awm a nih chuan NLUP atang pawhin helai a awm reng sa pawh Rs. 1,00,000/- thlengin kan pe a. Chutiang piahlam atang chuan RKVY atang pawh hian training an duh pawhin an training na tur te, an harsatna kawng engkim kha sorkar in a tih theih chin chu tih sak a duh a ni. Chutiang chuan anmahni in leh lo ah, an nupui fanau, an nu leh an pa te nen, an thian te nen hlim taka he Remna leh Muanna kan neih hi rawn enjoy a, rawn hmang ve turin kan chah duh a. Kan tan a hlauhawm ang a, thil kan lo tisual tawh a. Mi kan lo that tawh a, chhiah kan lo khawn tawh a, case tam tak nei thei vek kan ni a, an ti a nih pawhin, vawiih ni a chutiang ang a lo haw leh duh chu sorkar in chutiang zawng zawng atang chuan ngaihdam a duh a ni tih hi ka hrilh duh a ni. Chu chu kan zavaiin min hriatpui turin House zahawm tak hi ka' n ngen e.

Pu Speaker, dawhthei taka min ngaihthlak sak avangin ka lawm khawp mai. Ka Demand, Demand No. 11-na Secretariat Administration Rs. 71,51,39,000/- , Demand No. 16-na Home (including Prison) Rs. 442,24,58,000/-, Demand No. 35-na Fisheries Rs. 24,23,73,000/- , Demand No. 38-na Rural Development Rs. 127,40,73,000/- a vaiin Rs. 665,40,43,000/- hi min pass pui turin ka ngen e.

S P E A K E R : Minister khan a rawn wind up a. Tunah chuan pass a rawn dil ang khan kan buk ang a. A Demand No. 11-na, Demand No. 16-na, Demand No. 35-na, Demand No. 38-na, a vaiin Rs.665,40,43,000/- te hi pass rem ti apiang in 'rem ti' ti rawh u le. Rem ti lo kan awm chuan 'rem ti lo' ti rawh u le.

Rem ti lo kan awm lova. Pu R.Lalzirliana Minister zahawm tak Demand No. 11-na Secretariat Administration ah Rs. 71,51,39,000/- , Demand No. 16-na Home (including Prison) ah Rs. 442,24,58,000/-, Demand No. 35-na Fisheries ah Rs. 24,23,73,000/- , Demand No. 38-na Rural Development ah Rs. 127,40,73,000/-, a vaiin Rs. 665,40,43,000/- chu House in lungrual takin a pass ta a ni.

Pu R. LALZIRLIANA, MINISTER : Pu Speaker, ka lawm e.
S P E A K E R : Tunah chuan Pu J.H.Rothuama Minister zahawm tak in han wind up sela, pass rawn dil bawk selangin. Pu J.H. Rothuama i lo ko ang.

Pu J.H. ROTHUAMA, MINISTER : Pu Speaker, ka lawm e. Sawi tul hrang hrang te pawh a awmin ka ring a. Department-wise hian sawi tum ta ila. Tin, vawiih ah hian mi 18 laiin an sawiin ka hria a, hei hian kan Department a mi chi hrang hrangte in rawn khawih tel vek avangin a mal te te a in hrilhfiah kha chu kan ti seng lo

tur ah dah i la, maherawhchu, Department thil leh pawimawh eng emaw in neih chuan kan member zahawm tak ten minrawn zawt fiah mai se la a tha in ka ring a.

A hmasa berin Land Revenue a zawhna lam sawi kan tan phawt ang a, chi hrang hrang sawi tur pawh a awm ang a. A hmasa berah chuan Land Revenue hi Department harsa tak a ni tih hi kan member te hian min hriatpui vek in ka ring a. Tunhma atangin a tu a te mah kan in dem thei lova, Sorkar lo kal tawh zawng zawng pawhin kan lo kalphung tawh ah khan eng eng emaw harsatna in chhek khawl hret hret, vawiin ni thlengrawn inchhekkhawl a ni avangin vawi leh khata tih fihlim mai kha a har khawp a ni. Mahse, theihtawpin tan kan han la a, pass lo in thuah te, eng emaw lai phei kha chuan zep thu pawh a cheng lova, Pass te pawh hi a Sorkar tak tak pawh thleng lo in Revenue seal eng emaw lo chhu ve thei si a, Loan lakna tawh chauh Pass te kan han tih thin ang kha a awm teuh a ni. Chuvang chuan hengte hi sorkar hian han palzut dawn ringawt ila eng emaw chenah chuan a dik bik lohna te a awm a, eng emaw chen chu kan palzut lo thei lo bawh a, Pass in thuah te a tam a, heng zawng zawng han siam tur hi chuan Revenue Department in hma tam tak lak tur a neih ah hian a kal hlei thei dawn lo a ni. Chuvangchuan hengte hi kal pui thoin hmalakna chi hrang hrang kan buatsaih chho a ni.

Pakhatah chuan kan hmalakna lian deuh chu Land Reform chung chang thuah hian, Land Reform kan tih dawn chuan infrastructure kha kan tih hmasak a ngaiin kan hria a, chuvang chuan a ruangam kha kan han buaisaih chho va, chutiang chuan Champhaiah te, District khawpui tinah, Lunglei lamah te, D.C ten a phai ramah pawh a District Collector an nihna ang power kha pe ve in, SDO-te pawh power pe in thuneihna in sem tlang a daihzai zawk a in sem tur khan ruahmanna kan han siam chho va, chu chu tih puitlin tawh niin heng power-te pawh hi District hrang hrangah te pek an ni a. Mahse, hemi hian a ken chu, chhiah kan han lak, inhmun chhiah kan tih te leh mipui ten kan han chawi chi hrang hrang te khawn tur pawh hian Revenue hian staff kan indaih lova, kut ke kan nei lova, chuvangin heng zawng zawngte khawn tur hian BDO emaw, SDO-te thleng a kut ke a kan hman kha a ngai a, chu chu state dangah pawh an lo tih dan thin a ni a. Tin, chu mai bak ah chuan Revenue Village-te pawh a hranpa a han siam a, khatianga a lak khawmna tur khaw eng emaw zat huam chin bithliahte pawh kha han tih chhoh a ngai a, chutiangte chu ti chhovin hei hi chu kan kalpui chho mek tawh a.

Tunah hian kan hmachhawp lian leh chu Land Reforms Bill, 2011 kan ti a, chu chu kan tihna a rei tawh khawp mai a; tin, Minister hrang hrang kan hma ami te pawh khan an lo tih tawh a ni a. Amaherawhchu, he Revenue Department-ah hian Minister hi an in thut dawt deuh zut avangin Minister pakhatin lo ti zo hman kan awm lova, thahnem ngai taka keng tur chuan hun rei deuh hlek a mamawh ve avangin hei, tun tumah hian kei kan thu rei deuh hlek a, tih puitlin hram nisela kan ti a, chuti a nih loh chuan engtikah mah kan puitlin lovang tih a hlauhawm si a. Tin, Land Reform hi kan ramin a mamawh ngawih ngawih tawh a, chung zawng zawng khawih tur chuan dan leh dun te, tunhma Britishrawn awm tih atanga vawiin thlenga dan an lo siam tawhte kha ennawn a, a tha lo laite ennawn a, a tha lai te zuah a, belh ngaite belh turin kan han en chho va. Tahchuan, kan mithiam rual bik te, kan IAS senior-ho, a pension tawh te hi a Committee kan siam sak a, chung chuan Law Department ami te leh keimahni Department-a mi hlui te nen mi hrang hrang la khawmin he Committee hi kan han din chho va, Expert Committee kan ti a, chung chu eng emaw zat mai vawi tam tak an thu tawh a, tunah hian kan hrual mum tan tawh a. Amaherawhchu, kan in hrualmum thawkkhatah khan sawisel duh emaw rawtna emaw

thlen duh te kan awm thei a, he thil hi thil pawimawh tak tak kan hnam hnuk a nih avangin tihsual palhte a hlauhawm a, dan chu kan han siam a, a thalo lai chu a siamthat leh mai theih a. Amaherawhchu, khatiang siam that mai a nih hmaa danrawn siam chhuah pawh kha uluk taka ngaihtuah a ngaih avangin he Land Reform Bill kan han buatsaihnaah hian kan Expert Committee-te leh kan mithiam hrang hrangte'na ngaihdan an han siam a, an hrual mum tawh hnuah pawh ngaihdanrawn siam thei hemi thil thua thurawn thawh tur nei te, paih duh nei emaw, belh duh nei emaw, siamthat duh nei emawte kha hun kan pe leh a, tahchuan, mi eng emaw zatin a pawl ho angt e pawhin anrawn thehlut a, chungte pawh chu kan en ho leh tawh a.

Tin, he Bill-ah hianin dan siam anih avangin, dan lampanga kan mithiamte hi an pawimawh em em mai a, chuvangin, Law-in an vet thin kan han tih maiah pawh hian dan tak tak siam tur hian uluk lehzuala kalpui a ngai a, chuvang chuanin, kan Law Department pawh hi kan tihah em em a ni. Chuti chung chuan tunah hian Expert Committee-te'n han en leh a chumi hnuah chuanin Consultative Committee-te hnenah te leh a tulna ang a la tih leh a, he House-ah hian Bill hi putluh theih turin a rang thei ang a buatsaih kan duh tawh a. Tun tumah hian kan han tum a, amaherawhchu, kan hman ngang lova hun in min daih lo a ni. Chu chu Land Reform Bill kan kalpui dan a ni.

Tin, nichina kan han sawi tak infrastructure-ah khan heng BDO awmna ah te, SDO awmnaah te hian surveyor pakhat tal technician kan dah loh chuan awmzia a nei vak lova, chuvang chuan hengah hian surveyor pakhat te te emaw pahnih emaw, bial awm dan a zirin dah kan ngai a, chumi tur chu tunah hian kan nei si lova. A post ruak engemaw zat kan neih hi kan la hnawhkhat thei si lova. Chuvang chuan kan duh angin kan chak thei dawn lova. Nichina kan member zahawm tak Pu Piana'n Sawleng khua pawh hi survey nive sela a tih kha heng inhmun te, keimahni bial ngei ngei ah te pawh la tihchhuah theih loh kan la nei a, kan surveyor-te an la indaih loh avangin, a thawktu indaih loh avangin tum angin kan kal chak thei rih lova. Chumi nghawng chu chhiah tam tak kan lak tur a kha kan la thei lo va ni, an la chawi lo va ni tih te pawh kha an lo hriat atan a tha a.

Tin, heng Department hi Revenue kan han tih mai ah hian survey lam kalpuitu bik hi kan awm leh a, chung chuan theihtawp chhuah in survey hi hma an la ngat ngat chho a, tah chuan hma pawh kan sawn chho khawp mai a. Kum in chho ah hian Lunglei District saw survey beihpui kan nei mek a, nakumah chuan Serchhip bial vel khi survey leh tur a ni anga. Heta tan hian Central atang pawhin tanpuina, Lunglei bial survey-na tur hian cheng nuai 549.76 kan hmu a. Tin, Mizoram pawh in hemi atan a tum ve tur nuai 32 pawh tihfel tawh a ni a. Tin, kumin chhunga Serchhip District han survey mai tur pawh khi nuai 359.55 hi dil leh mek a ni a, hei hi hmuh leh ngei pawh kan in ring a. Tin, Mizoram sorkar tum ve tur nuai 37 pawh hi Budget-ah hian dah a ni tih kha ka'n hrilh duh che u a.

Tin, hmun khirkhan tak tak Revenue Department hian kan nei a, Assam Riffle hmun te, in leh lo hmun pek te a awm tih hai rual a ni lo va. Amaherawhchu vawiinah hian Assam Riffle Brig. hian hma chak taka la in, a hmalakna chu a kalpui chho mek a. Tin, 2002 Acts siam ah khan helaiah hian civil mite an awm tur a ni lo, in hmun pek tur an ni lo tih leh an pek te pawh chu hlih sak a ni ang tih thlengin kan sorkar hmasa khan Dan a lo siam tawh a. Engpawh nisela Advisory Council kan din ang tih te leh thil dang tih tur kha Assam Riffle hi an la

chhuah loh avangin a la hmanhmawh thlak vak lo va, hei hi kan la kalpui lo nachungin kan House Leader zahawm tak hian vawi duai lo a sawi tawh a 'Assam Riffle ram chhung ami hi chu kan cancel ang,' tiin a sawi tawh a. Chuvang chuan 'civil mi tuma hnen ah pass pawh kan inpe lovang,' tih a lo sawi tawh thin kha keini chuan kan ring tlat a ni.

Tin, ram buai kan neih hi member zahawm tak Col. Sangzuala'n a han sawi Vairengte ram, Sipai ram kan han tih ang chi te pawh khu..... Kan mualpho khawp mai a, a zahthlak khawp mai a. A bik takin he compensation hi a tawp ah chuan Revenue Deptt. hian kan awrh lo thei lo va. Vairengte ah te pawh sipai in an training na, helai hmar kil chhak lama Jungle Warfare Training na hmunpui, India ram chauh pawh ni lo, khawvel ram dang pawhina an pan ve thin pawimawh tak mai tih len an duh na ah pawh khuan, compensate siam a nih dawn khan V/C pass dik lo, a dik lo tih pawh hetia zu en mai pawh a hriat theih mai kha tam tak a lo awm mai a. Chuvang chuan, 'he compensation dik lo lutuk hi chu keini ramah hian kalpui tur a ni lo vang,' tiin kan House Leader pawh hian a sawi thin a.

Chuvangchuan chungte chu kan han ennawn a, kan han in tir thla a. Chutih karah chuan High Court a lo kal te an awm a. Tin, Central lam ngei pawh hian, a sipai lam pawhin High Court ah Mizoram sorkar leh Vairengte a ram neitute kha khinna an lo theh lut ve bawk nen, vawiinah hian kal hlei thei lovin kan awm a. Hengte hi tihfel a, ram kan inpek theih ang ang chi te pawh kha sipaiho hnenah hlan fel a, khu lai an training-na hmun pawimawh tak khu Mizoramah hian awm mai se tih hi kan duh em em bawk a ni.

Tin, chu bak ah chuan, Brigade ram kan tih te, khutah complex kan han neih ang chi te, hun engemaw chen hun rei tawh tak atanga chin fel hleih theih loh a la awm tam tak hma kan la chho mek a. Chung chu zawi zawi in kan ti a, Brigade ram te pawh saw tunah chuan engemaw zat chu fel thei turah kan ngai a. Hei hi fimkhur taka kalpui a ngai a. Revenue Department bikah hi chuan Court hi a hnai a, thiamlo a kan hriat ngei ngei pawh hi a hmuna uluk taka an han ena thiamlo zawk pawh hian High Court-ah te min khing ve leh tho a.

S P E A K E R : An khing chauh a ni lova, Court in thu a titlu thei lova, kum 10 chuang te a kawl a, ram hmasawna a thuan-awp vek zel a ni.

Pu J.H. ROTHUAMA, MINISTER : Chuvang chuan khatiang kha kan case a nih avangin a tih zung zung theih loh a. Chak deuh a kalpui kan thei, mahse chak deuhin kalpui ila kan sorkar hian kan leibat hi compensate-na tur emaw, kan leibat tur hi kan pe seng dawn chuang lo a ni. Chung avang chuan fimkhur taka thil buai rei tawh te hi kan ken chhoh-a kan kal chhoh pui a ngai a.

Tin, ram acquisition chungchang thu ah hian fimkhur a ngai a. Helai chang a ni lova, Chhimtuipui ramah te pawh ram acquire tur a awm chuan passed a tam em em zel a ni. Hengah hian kan kristianna leh dikna te pawh hi hmangin, mipuite pawhin dik taka hmalak hi tum ta ila, kan neih ngei hi chu compensation kan hmu tur a ni. Amaherawhchu kan neih loh nei chawp a compensation lak kan tum ang te hi a dik lo. Chuvangin, dik taka kal thei turin inbuatsaih ila. Heng compensation bikah hi chuan D.C te hi a endiktu tawp khawk

an ni a, an thu tih tluk hi keini chuan kan lo approve tur chauh a ni. Chuvang chuan D.C te hi an pawimawh em em a ni.

Mualkhang ram tih pawh kha kan Forest Minister nen hian theih tawpin kan ngaihtuah thin a, compensation an dil te pawh hi tam kan ti a. Amaherawhchu a tawp ah han in tih thluk theihna hram an neih pawh kha khulamin an rawn pawm tak si lovah chuan vawiin thleng hian tih theih lohvin a la awm rih kha pawl kan tih pui em em a ni. Chu chu Land Revenue bikah ni sela engemaw in rawn sawi, kan sawi loh palh a awm a nih chuan in hrilhfiyah ila Bawngkawn kha chu, sawlaia party pakhatin tih kha chu kan lo en ang e.

S P E A K E R : tih vak chi pawh a nilo, kei a bialtu hi ka chiang deuh ber a, court thil a nih avangin chhui mah ula a chet theih rih loh a ni, kha kha kan sawi sak ang e. Court-ah mi an kal hian a awm ta reng thin a, hmasawna a thuanthu vek zel

Pu J.H. ROTHUAMA, MINISTER : Tin, Demand No. 7-na Excise-ah hian, kan Excise Department hi chhuanawm khawpin ka hria a, hna an thawk nasa a ni. A dik emaw, diklo emaw MLTP Act kan han nei hi, zu khapna dan kan han nei a, zu kha man a lo ngai ta a, hna a ti tam em em mai a ni. Chuvang chuan, zu leh drugs ah hian kan force-te hian an tha hi an hmang zo niin ka hria. Hmun dangah tih tur dang pawh nei sela, helam hi hawi hman lo khawpin kan ram hi kan kalpui chho mek a ni a. Chutih karah chuan post ruak hi 97 tunah hian a awm mek a, chung pawh chu hnawh khah theih lohvin, indaihlo tak chungin kan awm a. Tin, heng zu leh drugs bik angah te phei hi chuan Central YMA, CADS kan tihte nen kan thawhhona te, Police lam nena kan thawhhona te leh hmundang dang atanga kan thawhpuiho te atangin puihna kan hmu tha em em mai a. A chang chuan ka ngaihtuah thin a ti, zat hi zu man tur a awm a nih chuan man loh hi eng zat tak awm ang maw tih hi, Mizoram hian zu kan khap chung hian kan Governor-in a sawi dan takah dry state-ah chuan a wet ber kan ni deuh thaw mai awm mang e aw tih a rin theih rum rum tak tak a. Hei hi tuna force kan neih mek ten an sutkian mai theih a nilo. Chuvangchuan hengah hian kan mamawh sum leh pai mai pawh ni lovin a post hnawh khah te hi kan sorkar hian chak zawkin min hnawhkhah sak thei sela kan duh khawp mai a. Tin, sum leh pai tam zawk hengah hian plan pawisa pawh nei velo kan ni a, chu chuan a rawn ken chu he Excise Department hian MLTP Act kan han tih ang te hi a rawn keng a, chu bakah chuan a pawl ang pawhin study group kan tih ang chite, X-Mas dawn ah duty turte kan han insiam ve a. Central YMA hotute tanpui tur te'n kan han duh ve a. Sub-headquarter-ah te pawh a ni a. Theihtawp an chhuahna ah hian puih ve hi kan duh khawp mai a. Lo va thawh ve pawh hi kan duh khawp mai. Ama'rawhchu, keimahni atang hian hetiang lama hman tur hi plan pawisa he Department ah hian a awm ve lo a ni tih kha min hriatpui ula ka duh a. Chuvang chuan kan han pek theih te pawh hi nasa taka min puitu ni hlawm mahsela kan pui thei lo a ni. Ama'rawhchu, tun kan sorkar chhung hun rei lo deuh chhung hian helaia kan Commissioner office sak zawh theih loh a kan dah rengte pawh kha sak mek niin tunah khuan sak zawh tep tawh a ni tih te kan hmu theiin ka ring a. Tin, kan Inspector ho kha Gazetted ah te hlang kain Police ten an dawn thin ration money ang chi pawh hmu lova an lo awm reng kha an han dawng chho ve a. Chungah chuan hmasawna hrang hrang kan nei a. Tin, kan Commissioner te, Secretary te thahnemngaihna a ni ang chu, thil lawmawm tak pakhat chu hmanah helaiah hian kan sawi tawh a, zep deuh chung a sawi a ngai a. Duh ang takin kan pho chhuak ngam chiah lova. Ama'rawhchu, a lawmawm bawk si a. America atangin khawl,

Rs.vaibelchhe 2 man dawn lai minrawn pe a, hman ngaihna pawh kan hre miah lo tluk ania keini chuan. Amaherawhchu, anmahni bawk kha lo kal chhovin helaiah kan mite anrawn zirtir tawh a. Chung khawl te chu tangkai taka hman tur a nih ngei kan ring a. Hetiang kan han nei te pawh hi kan lawm tak meuh meuh a. Heng hi a department a thawkte felna avang te a ni ang tih hi kei chuan ka ring a, ka fak em em bawk a ni.

Tin, Champhaia Winery an han siamah khian, nia, a tira an din dan chu sawi duah a ngai lovang a, miin wine an siam dawn a nih a, thilsiam a lo nih kha chuan Excise lamin a pawisa a lak ve kha a tih tur a ni a. Tin, chu chu an pe thei tur pawh a ni a. Ama'rawhchu, Champhai Winery-a kan wine neitute khian ti khian Winery siamin production te pawh an han bei chho ve a. Tichuan nikum kha chu kumtir a ni bawk a, an tluang viau, an hlep pawh a tha. Anmahni pawh an hlim khawp mai a. An leiba an lo puk pawh tam tak an rul thei nghal a ni tih kan han hria a. Kumin a lo nih chhoh khan nikuma Zawlaidi, ral khat atanga lo zu deuh riau tura kan ngaih, a, ruih chak deuh te pawh an ni ang e, kan nula leh tlangvalte, khatiang tem chakna nei khan a awmzia an lo hria a. Tin, a alcohol content kha kan lo tihnam leh tawh bawk si a. Kumin hian an hralh thei dawn lovang tih hlauhna kan nei sa a ni. Chuvang chuan a department chuan a tirah khan uluk takin, hniam deuhin a rate ti ila an help a tha tho alawm, tiin a man kan bithliah pui a ni. Amaherawhchu, a Winery neitute khan, 'hetiang hi a nih si chuan loan kan la tam si a, anmahni profit tur thlir khan a hralh lehna tur kha an ngaihtuah thiam chuang si lova. Chuvang chuan a man hi min san leh rawh u, tiin nasa takin min hau va, nasa takin an tang a, thawk khat phei kha chu an in tibuai lek lek nghe nghe a, kan force te nen khilai hmunah, mahse chutiang thleng em lo chuan an han kalpui chho va, tahchuan a man kha an duh dan takin, min bithliah sak ula an tih ang takin kan bithliah sak a. Keinin kan lo thlir danah chuan an sub-agent tur, a zuar chhawng turte khan hetiang hi chu an la ngam lovang tih kha kan ring sa a, anmahni pawh kan hralh vek a ni, mahse an ni khan a man san an duh a, Burma ah te, Manipur ah te kan hralh mai ang an ti a ni. Chutiang chuan a hralhna ah chuan kan ngaihtuahawm lo vang tiin min chhan avangin a man kha kan han tihsan sak a. Amaherawhchu, an lak ngam tak si loh avang khan hralhna an hmu lova, an mangang leh ta a, tah chuan a hmun rate bawkah khan tihdanglam an ngen a. Tin, VAT te nen excise duty te kha awl te anrawn ngen a ni. Kan han ngaihtuah pui a, a rah a lo thar leh mai dawn si a an hralh hlei thei bawk silova an khawngaihthlak hle a ni tih kan hmuh in, VAT kha kan awl leh ta a. Tin, excise duty pawh kha a chanve chauhin, awl thak kha chu a dik lovin kan hriat avangin kan han ti a. Tichuan, tunah hian a man a tira kan bithliah aia hniam takah khan a rate kan han tuk chho ta a, kan siam that sak leh ta a. Tunah khian engtinngan kal chiah chu kan hre lo na in a hralhna hi tunhma ang kha chuan a chak lo a ni. Chuvangin a quality te, a siam phung te pawh hi uluk zawka winery atanga improvement kan neih loh chuan kan mipuite hian wine a nih anga han in mai pawh hi, wine hi zu anga kan ngaih deuh tun avang hian kan la insum bawk si a, helai hi khirh laklawh lai tak a ni tih min hriatthiampui kan duh a. Hei hi anti workers emaw anti-labour emaw a ni lova, an labour hlawh te, an chin dan te agriculture-a grape chingtute hian tha taka an hralh hi kan duh sak em em a ni. He sorkar hian chutiang chuan kawng pawh a zawn pui nasa em em a. Tin, NLUP-ah pawh hian hman la chho mek a ni a. Chungah chuan he winery khawl bun tur hian mi pahnih hnenah a permit nikum lam khan pawh pek belh a ni nghe nghe tawh a. Mahsela hengte hi an tan ang a, competition te pawh a awm ang tih kan beisei a, hei hi uluk taka kan thlir chhoh pui chu a ngai khawp mai tih kha kan sawi duh a.

Tin, prohibition council a hi a tlangpui chuan Christmas dawn a thut thin a ni a. Tunah hian kum 15 lai MLTP Act hi hman a lo nih tawhah chuan study sroup-te insiamin hengte hi siam that a lo ngai tawh em, eng nge mipui ngaihnan in zir Chiang Teh ang tiin Committee te kan han siam a, chu chuan an en pui a, report te pawh anrawn pe lut tawh a, hei hi kan enchho dawn mek a.

Nichina kan sawi tawh ang Khan Excise Department-hi department lian a ni lo va, plan sum nei pawh a nih loh avangin heng MLTP Act leh Prohibition Council, kal pui turin sum leh pai pawh hi harsatna kan nei a ni, Prohibition Council te pawh hi vawi tam zawk kova sawisel tur te buatsaih tur hian sum leh pai hi kan mamawh hle ani tih hi kan hriat a pawimawh a ni. Kan luh tirh khan kan dil a, nuai 5 min pe a, chu chu vawiin thlang pawh hian sum tlem chu an la kawl ni in ka hria a. Sub headquarter leh hmun hran hran ah VC hrang hrang ami te kan kalna YMA hotute puih nan te kan hmang a. Tin, khawi lai lai ah emaw ...lawmthu sawi nan te leh tanpuina te kan han pe ve a, tiang khan kan hmang a ni. Tunah pawh hian kan han dil chho ve mek a, a chhan chu hetiang hi kan neih miah loh chuan kan kut hi a sei theih lo bakah harsatna kan tawh hle a ni tih kha min hriatpui ka'n duh bawh a ni.

Tin, Demand 33-na hi kan la in hmel hriat tha lutuk lo va, Soil & Water Conservation hi a pawimawh khawp mai a, hmalakna tur pawh a tha a, a prospect pawh a tha in ka hria a, NLUP hnuai dah a nih avangin rubber te, hmunphiah te, coffee te hi Soil & Water Conservation hian a chang ve a, chung chu Mizoram-ah hian kan thlai hlawh tling ber ber tur te zing ami niin a lang tlat a ni. Rubber chungchang ah hian NLUP-ah khan a hnu ah chi pek an ni lo tih te pawh kha inrawn sawi a. Ama'rawhchu theitawp kan chhuah a ni, a chhan chu Industry Department ah pawh hian kan hriat pui a, rubber chingtu a tir a sorkar in chuti zat vel an thlang ang an tih kha, a let engemaw zat an thlan takah chuan an pawisa lo dah te khan a daih lo va, chutiang chuan Industry lam pawhin harsatna an tawh a ni. Tunah chuan a chi hi an han pe a, poly bag a dah chi phei hi chu October thla lam thlang pawh hian pe ila a phun nun theih a ni tih te pawh kan hria a, churang chuan a stem ang chi a pek tur nikum lama an lo inbuatsaih khan a daih si lo va an han tih belh leh chuk chuk a ngai a, tunah pawh hian an sem chhuak chho leh mek tawh a, a hun takah a chi te pawh hi pek kanrawn tum dawn a ni. Tin, Rubber hi kan thenawm mai Tripura ah khuan an hlawhtlin pui em em a, Kerela lam te khu a lo ching rei tawh te an ni a an hlawhtlinpui hle tih kan hria a ni. Kan thenawm mai a kan hmuh theih chu Tripura khu a ni a an ni khuan an hlawhtlinpui hle tih kan hria a, kan ramah pawh hian rubber chin na tur hmun heng khawthlang, chhimtawp thlengin rubber chin theih na hmun vek a ni a; tin' ram pawh kan nei a, churang chuan rubber hi hemi NLUP bakah hian mipui tam zawk pawh hian mahni private ang pawhin chin hi uar sela kan duh a, hei hi kan sawi mawi tak meuh a, uar sela kan duh a, hlawhtling turin kan ngai a ni. Chutiang chu Rubber Board pawh hian an ngaihven hle a ni. Tun ni 24 ah khan, kar hmasa khan Rubber Board Chairman Aizawl ah hian alo kal a, inkawmna te kan nei a, ani pawh a phur khawp mai a. Tin kan ram ah hian rubber hi kan thar that theih a ring a, a sik leh sa leh a hmun hmai leh lei te pawh hi kan nei tawh rih in a ngai bawh a, a phur khawp a, ani through pawh hian engemaw zat chu sum leh pai heng chinna atan a lo kal thei, a ching duh te tan puihna awm thei turin kan ngai a ni.

Tin, hmunphiah hi kan hlawkpui tawh hle a, kan hre theuh a, churang chuan hmunphiah ching tute hi kan Mizo rilru nen phei hi chuan a in awm tawh khawp mai a,

nikum ami kha tunkum ah hian a thar chho deuh mai a, chutiang chuan hmunphiah atang pawh hian nasa takin kan economic hi kan chawisang thei a ni. Chhungkaw tam takin awlsam takin ei kan zawng thei a ni, kan dinhmun kan siamtha thei a ni tih hria in NLUP-ah hian dah a ni a. Tin, private a nei te pawh an awm ang, heng zawng zawng te pawh hian a hralhna chungchang ah te pawh harsatna an nei in kan hre lova, a lawmpui awm kan ti a.

Tin, coffee pawh hi Coffee Board chuan an rawn ngaihsak a, tunhma khan Soil ho hian Rubber te, Coffee te hi a enchhin na ang deuh khan pilot project an lo kalpui tawh thin a. Amaherawhchu khatiang tlem tham ang deuh kha chu a hralhna te pawh a lo har a niang; tin, a chi te pawh a lo har ang a, tanpuina te pawh an hmu hlei theilo niin a lang a, churangchuan vawinah hi chuan heng coffee te pawh hi kan ram ah kei ka lo ngaih dan chuan, ngawpui vel ah te tha turah ka lo ngai a, mahse kan thar tamna chu Hriphaw ah te a ni. Chung chuan kuhva hnuai ah hian hlawhtling takin coffee hi an ching thei a ni. Tin, zo ngaw hnuai ah te zo lei pawh hi a ngam bawk a, heng te pawh hi Coffee Board hian theihtawpin tunah Mizoram ah tan rawn lak an duh a, chung atan chuan NLUP a lo thlang kher lo pawh in a dang kan thlan belhchhah khan heng te pawh hi eizawna turin private ang pawhin hma kan la thei a ni. Chu chu Coffee Board te pawh in tanpui turin a inhuam hle a ni tih pawh hi kan han sawi tel duh bawk a ni.

Tin, hei District Office te sak tur kan dil chho mek a, Lunglei, Lawngtlai, Serchhip, Khawzawl, Kolasib district ah te hian Ministry of Urban Development atangin sum hi kan dil mek a, hei hi kan hmuh ngei pawh kan beisei a, District Office mawihnai zawka kan neih te pawh hi kan duh a ni. Tin, hei coffee chi tha ber ber Coffee Board ten an rawn recommend ang chi hi anmahni kaihhraina hnuai ah nikum lama kan lo kalpui tawh danah pawh hian mahni duh duh a tuten emaw an supply duh a, duhsak zawngte supply tir mai ni lovin hengho ina an rawn recommend atang hian a chi te hi lak a ni tih kha kan sawi duh a. Chu chu Soil-ah hian a tlangpuia kan rawn sawi theih ni mai sela.

Co-operation, Demand 37-na hi ka'n sawi vele ang a. Co-operation hi kan sum leh pai helai a kan Budget-ah hi chuan a tam hauh lova. Vaibel chhe 10 renrawn ani a. Amaherawhchu, Co-operation hnuai hian State Level Co-operative Society sawm vel lai kan nei a, tin, chumi rual chuan District level te leh Village level te kan nei a, hemi state level-ah hian a bik takin a lian pahnih chu Apex Bank kan tih mai, Co-operative Apex Bank kan tih te, MIZOFED kan tih te hi chuanin vaibelchhe za tel fe, a sang telin an sumdawna hi an kalpui chho mek a ni. Thil lawmawm tak mai chu Co-operative a kan state level hrang hrang te hian nikum lamah te pawh khan profit lo nei chho in vaibelchhe telin, vaibelchhe bi in ti ila a dik awm e, a tel tak tak chu ala ni lo deuh a, hlep an nei chho ve tawlh tawlh ani tih hi kan hriat a thain ka hria a. Tin, heng kan state level a Co-operative Society hote hian thahnem an ngai em em mai a, an sum nitina chevel te ngaihtuahin an hlawhte a tlem a ni tiin kan in fuih sauh sauh a, an ni pawhin hna hi taima takin an thawk chho a. Mithiam zawk te, mi remhre zawk leh hmangchang hre zawkte rawn hreh lo turin chungah chuan kan inkawhmuh a, theih tawp kan chhuah a, churang chuan tun aia chak zawka kan than chhoh theih kan in beisei a.

Tin, heng state level hote hian board kan nei a, kan inthlang thin a, kum 3 danah, tunah hian kan inthlang chho mek a, harsatna nei hranpa lovin sorkar lamp pawhin a duh zawng emaw duh loh zawng emaw tling tur melh run lovin an mahni duh apiang kha thlang thei mai turin zalenna kan pe a. Chutiang chuan Co-operative Society te pawh hi State Level atanga primary level thlengin tunah hian an kal chho mek a ni a. Hei hi kan ramah nasa leh zuala kan uar a ngai a. Kumin hi Co-operative bik atan chuan International Year of

Co-operation tih a ni a, kum 2012 hi. Chumi denchhen chuan Madhya Pradesh-ah keini pawh March thla khan min sawmna angin he kum hi Bhopal-ah hmang turin minrawn sawm a. Minrawn sawm angin kan zu kal ve a, chutiang chuan state hrang hrangah te leh khawvel pumpuiah Co-operation hi an uar chhoin ram changkang apiang hian an ti nasa a. Tin, an ram development, an thanna tak tak bul inghahna hi a ni vek ani. Heng Co-operative Society te pawh hi NLUP ah hian kan rin luh ve ngei kan ring a, Co-operative hi a la tangkai chho dawn chauh. Tin, kan tharchhuah lei tur te, an thar chhuah dahkhawmna tur atan te Co-operative hian hma kan la chho mek zel a ni tih kha ka han sawi duh a. Tin, Co-operative Development Council hi kan siam ang kan ti a, hei hi kan sorkar manifesto ah, kan party manifesto ah pawh kan dah a, kan sorkar chuan kan ti ang kan ti a. Chumi ti tur chuan Co-operation Act kha tihdanglam a rules kan neih phawt kha a ngai a, chu mi rules chu tunah hian kan buatsaih mek a. Nichina ka sawi tawh ang khan rules siam te, Dan la awmlot atanga siam chhuak tur phei hi chuan Dan thiammi te hi an pawimawh lehzuah a. Chutiangin wawiiin niah hian hei kan ram ah hetiang ang hi nive bawkh mahilangin taimak te a ngaia ngaihtuah te indaih te a ngai a hmanraw neih that te a ngai a, chuvang chuan Dan siam han vet tur reng reng hian hun hi a duh rei thin a, vawikhat mai hi a tawkh lova, Co-operative Society chungchang thu ah kan in lehbunh ngun hle a, tunah chuan kan final thei dawn tawh a. Cabinet in a pass hnu ah hei hi siam chhoh peih mai a ni tih pawh kha kan sawi duh bawkh a ni. Sawitur a tam a mahse a vai chuan kan sawi seng lo turah ngai ila.

Pu LALDUHOMA : Pu Speaker, intih harh nan te pawh a ni ang a, a danga a kai leh hma khan Bawngkawn a inhmun kha i bial a ni a, i hrechiang ber bawkh ang a, tawite in min hrilhfiah thei mai lawm maw ni le, Court a put luh tih te kha a ri a, enge kha kha kan hre ve si lo va.

S P E A K E R : Speaker kha chuti zawngah chuan House ah hian a tawng thei tlat lo.

Pu J.H. ROTHUAMA, MINISTER : Pu Speaker, thil a nih avang khan House ah chuan kan sawi thui loh kha a tha in ka ring a, sawitur tam hle mahse hun te a rei tawh deuh bawkh a, kan sawi rei lo mai ang a, khang kha kan sawi theih tlangpui te chu ni mai sela. Co-operative Society a kan state level te hian theihtawp kan chhuahna azarah hlep nei chho in MULCO phei hi chu hlep insem tur nei chho hial tawh an ni in kan hria a. Mahse an la insem thei chiah lova, chutiang dinhmunah chuan kan ding mek a. Tin, co-operative-ah hian STCC kan tih scheme hnuaiyah hian sorkar-in Central ah Co-operative Society hmuh tur a nei a, chungah chuan cheng vaibelchhe hnih aia tam kan state hian 10% a tum ve tur atang khan a pe tawh a, chu chu cheng vaibelchhe 20 Co-operative Society te tih chakna tur leh Apex Bank te chak lehzuah an kal theihna tur ang chi, khang tanpui na tur ang chi kha a ni a, thil lawmawm tak kuminah hei hi atanga kan beisei lo awm mai thei tur a ni tih kha ka sawi tel duh bawkh a ni e. Awle Pu Speaker, hei kan Demand No. 6-na Land Revenue and Reforms cheng 21,23,22,000; tin Demand No. 7-na Excise and Narcotics cheng 20,25,58,000, Demand No.33-na Soil and Water Conservation cheng 59,96,74,000, Demand No. 37- na Co-operation cheng 13,12,69,000; a vaiin Rs 114,58,23,000 hi he House in min pass pui turin ka han dil e.

S P E A K E R : Aw le tunah chuan Pu J.H.Rothuama Minister zahawm takin a rawn wind up a, a Demand te pass a rawn dil a, kan lo buk dawn ang a. A Demand te chu Demand No. 6 na, Demand No. 7-na, Demand No. 33-na, Demand No. 37 na a vaiin Rs 114,58,23,000 a ni a. Hei hi pass remti apiangin 'remti' ti rawh u le, remtilo kan awm chuan 'remti lo' ti rawh u le, awm lo maw. Aw le, Pu J.H.Rothuama Minister zahawm

tak Demand No. 6-na Land Revenue and Reforms-ah Rs 21,23,22,000; Demand No. 7-na Excise and Narcotic-ah Rs 20,25,58,000; Demand No. 33-na Soil and Water Conservation-ah Rs 59,96,74,000; Demand No. 37-na Co-operation-ah Rs 13,12,69,000; a vaiin Rs 114,58,23,000 te chu House-in lungrual takin a pass ta a ni. Awle, vawiin atana kan tih tur chu kan lo zo ta a, kan chawl tawh ang a, naktuk ni 27.7.2012 Zirtawpni zing 10:30 ah kan thu khawm leh dawn nia.

Sitting adjourned.